

شكون هو عضو الكنيسة السليم؟



تابيتي إم . أنيابويل

"كتاب "شكون هو عضو الكنيسة السليم؟" كيسد إحتياج كبير في كتوب الحياة المسيحية العملية. هو ميزان بزاف بصيفتو مُرشد مباشر وقرائتو ساهلة على ود الكنيسة. وهو في نفس الوقت مُلخّص عميق وكتابي لعقيدة الكنيسة العملية، مكتوب بشغف قوي وإستعجالية. وهادشي علاش هو أداة ميزانة لكل عضو في الكنيسة - من المؤمن المُبتدئ للزاعي المتمرس. في عصر فين كيبانو المسيحيين بشكل عام مشوّشين من جبهة نوع المجتمع اللي خاص الكنيسة تكون عليه، هاد الكتاب هو مُرشد مُفيد كيوضح الأولويات الكتابية الحقيقية للكنيسة، خصوصا كيفاش كينطابقو على أعضاء الكنيسة بشكل فردي".

— جون ماكآرثر، رئيس خدمة "نعمة ليك"

"تابيتي أنيابويل سد فراغ كبير في الأدب المسيحي المُعاصر. شحال كتارين الكتوب اللي كيهدر على كيفاش تكون راعي أولا قائد كنيسة أمين، ولكن قليل فين غتلقا كتاب كيهدر بشكل مباشر على كيفاش تكون عضوا كنيسة أمين. من خلال تروة غنية من وجهات النّصر الكتابية والتعليمات التطبيقية، أنيابويل كيشجّع المسيحيين ماشي غير باش يحضرو في الكنيسة، ولكن حتّى باش يكونو أعضاء كنيسة أمّناء ومنخرطين كيما بغا الله باش يكونو. بالنصر لحالة بزّاف ديال الكنائس اليوم، هدا الكتاب جا في الوقت المناسب".

— آر. ألبرت مولر جونيور، رئيس

كلية اللاهوت المعمدانية الجنوبية

"كاينين كتوب بساط بزّاف لدرجة تقدر تقراهم بالزرية؛ وكاينين كتوب معقّدين بزّاف، وإلا ماكانش الموضوع مهم بزّاف، ماغيكونوش كيستحقّو الوقت الطويل في القرابة. ولكن بعض المزّات كئلقا كتاب بسيط وعميق في نفس الوقت - وهاد الكتاب هو واحد منهم. في جيل فين بزّاف من الناس كيهدر على أهمية المسيحيين اللي كيعيشون "في مجتمع"، غير ناس قلال قدرو يشرحو شنو هادشي كيغنيه بطرق كتابية وعميقة وشخصية. تابيتي سد واحد الإحتياج كبير. قرا الكتاب، وفكّر فيه، وصلّي - ووزعو في مجموعتك".

— د. أي. كارسون، أستاذ باحت في العهد الجديد،

كلية ترينيتي الإنجيلية اللاهوتية

" هاد الكتاب كييعطي تركيز ميزان وضروري بزّاف على عضو الكنيسة الفردي. كلنا نقدرو نستافدو بزّاف من هاد الكتاب الرائع".

— آر. سي. سبرول، رئيس المجلس ومدير خدمة
Ligonier Ministries؛ الراعي اللّول ديال الوعض والتعليم
في كنيسة القديس أندروز، سانفورد، فلوريدا

"الراعي الأمين هو في نفس الوقت عضو ميزان في الكنيسة. راه تابيتي أنيابويل هو دليل على هاد الحقيقة، وهادشي علاش هو كتب برؤية رعية وخبرة شخصية على شنو يعني أنك تكون عضو سليم في الكنيسة. وأي كنيسة بغات تقوّي العضوية فيها راه خاصها غادية تدير خدمة ميزانة إلا وقّرات هاد الكتاب والمبادئ ديالو للأعضاء ديالها. راه ماشي ساهل تكون عضو أمين في الكنيسة في عصر ديال الفشوش والدوافع الأنانية. ولكن واحّا هكداك راه أنيابويل ماشي غير كيفكرنا بلّي هادشي ممكن، ولكن حتّى كيشجّعنا بالواقع الكتابي اللّي كيؤكد على ضرورة هادشي".

— أنتوني جيه كارتر، الراعي اللّول في
كنيسة إيست بوينت، إيست بوينت، جورجيا

"راه كتاب تابيتي أنيابويل "شكون هو عضو الكنيسة السليم؟" كي طرح الأسئلة المناسبة على عضوية الكنيسة، وكيشجّع كل جسد محلي ديال المؤمنين باش ينمّيو ويدعمو ممارسات الجماعة اللّي كيشكّلها الإنجيل. هاد الكتاب هو مرشد عملي بزّاف، و واحّا هكداك مافيهش مذهب المنقّعة الدينية اللّي غالبًا ما كتميّز الأعمال في هاد النوع. راه أي قيادة أولا جماعة مُحايِدة كيختارو يقرأو هاد الكتاب مجموعين وكيقبلو التحذيرات ديولو غيلقاو بلّي حياتهم كعائلة الله كتكبر في حكمتها وقوتها ومحبتّها وشهادتها في العالم. شحال مشجّع الكلام اللّي كئلقاوه كلنا في هاد الكتاب!"

— إريك سي. ريدموند، الراعي اللّول في كنيسة
هيلكريست المعمدانية، تيمبل هيلز، ماريلاند

شكون هو
عضو الكنيسة
السليم؟

تابيتي إم . أنيابويل

CROSSWAY BOOKS
WHEATON, ILLINOIS

شكون هو عضو الكنيسة السليم؟
حقوق الطبع والنشر © 2008 تابيتي إم. أنيابويل
Crossway Books الكتاب نشراتو خدمة
Good News خدمة النشر ديال دار نشر
1300 Crescent Street
Wheaton, Illinois 60187

كل الحقوق محفوظة. ماخاصش إعادة إنتاج أي جزء من هاد المنشور أولا التخزين ديالو في نظام استرجاع
أولا النقل ديال بأي شكل من الأشكال بأي وسيلة، إلكترونية أولا ميكانيكية أولا بالتصوير أولا التسجيل أولا
غيرهم، بلا إذن مسبق من الناشر، باستثناء ما ينص عليه قانون حقوق الطبع والنشر في الولايات المتحدة
الأمريكية.

تصميم الغلاف: جوش دينيس
الطبعة اللولى 2008
الطبع في الولايات المتحدة الأمريكية

اقتباسات العهد الجديد الكتاب المقدس موخودة من الترجمة المغربية القياسية والعهد القديم من الترجمة
ديال مُترجم الكتاب، حقوق الطبع والنشر © 2001 خدمة Crossway Bibles، وهي خدمة نشر تابعة
J Good News Publishers. مستعلمة بادن.
كل الحقوق محفوظة.

9Marks ISBN: 979-8-89218-176-1

Library of Congress Cataloging-in-Publication Data

Anyabwile, Thabiti M., 1970–

What is a healthy church member? / Thabiti M. Anyabwile;
foreword by Mark Dever.

p. cm. — (IX marks series)

ISBN 978-1-4335-0212-5 (hc)

1. Church—Marks. I. Title.

BV601.A59 2008

248.4—dc22

2007051434

LB 17 16 15 14 13 12 11 10 09 08
14 13 12 11 11 10 9 8 7 6 5 4 3 2 1

من أجل يسوع المسيح، رأس الكنيسة،
ومن أجل جسده وكل عضو كدير الدور ديالو،
ومن أجل الكنائس المحلية اللي علموني:

الكنيسة المعمدانية اللّولى في جراند كايمان،
كنيسة كايتول هيل المعمدانية،
الكنيسة على الصخرة

و

من أجل الكنيسة اللي كتعيش في داري:
كريستي، أفيا، إيدن، وتيطس

الفهرس

10	تقديم للسلسلة
12	تقديم للكتاب
14	مقدمة
20	العلامة 1: عضو الكنيسة السليم هو مُسْتَمِعٌ تفسيري
28	العلامة 2: عضو الكنيسة السليم هو عالم ديال اللاهوت الكتابي
40	العلامة 3: عضو الكنيسة السليم كيكون متشع بالإنجيل
50	العلامة 4: عضو الكنيسة السليم كيكون بالحق تغير
60	العلامة 5: عضو الكنيسة السليم هو مُبشِّرٌ كتابي
68	العلامة 6: عضو الكنيسة السليم هو عضو ملتزم
78	العلامة 7: عضو الكنيسة السليم هو عضو كيقلب على التأديب (التربية)
90	العلامة 8: عضو الكنيسة السليم هو تلميذ كيزيد كيكبر
102	العلامة 9: عضو الكنيسة السليم هو مؤمن متواضع
112	العلامة 10: عضو الكنيسة السليم هو مؤمن مُحارب في الصلاة
124	كلمة أخيرة
128	المُلحق: عهد نموذجي ديال كنيسة سليمة

تقديم للسلسلة

سلسلة "تسعود ديال العلامات" (9Marks) هي مبنية على جوج ديال الأفكار الرئيسية: الفكرة اللّولى، أهمية الكنيسة المحلية في الحياة المسيحية، واللّي تقدر تتخطّى بشكر كبير الفهم ديال بزّاف ديال المسيحيّين. حنا في خدمة "تسعود ديال العلامات" كنأمنو بلّي المؤمن المسيحي الصّحّي هو عضو صّحّي وسليم في الكنيسة.

والحاجة الثانية، النمو ديال حياة الكنيسة المحلية والنشاط ديالها من خلال تركيز حياتهم على كلمة الله. الله كيهدر. والكنيسة خاصها تسمع وتتبع. بهاد البساطة. ملّي الكنيسة كتسمع وكتتبع، رها كتبدا توّلي على صورة هاداك اللّي كتّبعو. كتبدا تعكس المحبة ديالو والقداسة ديالو، وكتوّرّي المجد ديالو. الكنيسة غتوّلي كتشبه لهاداك اللّي كتسمع ليه.

ومن بعد هادشي، القارئ ديالنا يقدر يلاحض بلّي هاد التسعود ديال العلامات الموحودين من كتاب "تسعود ديال العلامات على كنيسة صّحية" ديال مارك ديفر هما مبنيّين على الكتاب المقدّس:

- الوعض التفسيري.
- علم اللاهوت الكتابي.
- فهم كتاي لبشارة الإنجيل.
- فهم كتاي لقرار الإيمان.
- فهم كتاي للتبشير.
- فهم كتاي لعضوية الكنيسة.
- فهم كتاي للتأديب ديال الكنيس.
- فهم كتاي للتلمذة والنمو.
- فهم كتاي للقيادة في الكنيسة.

نقدرو نقولو بزّاف ديال الحوايج على شنو خاص الكنيسة تديرو باش تكون صحّية وسليمة، بحال الصلاة. ولكن راه هاد التسعود ديال الممارسات الّتي يلاه دكرناهم، حسب الرأى ديالنا، هما أكبر ممارسات كنتجاهلوهم اليوم (على عكس الصلاة). هادشي علاش راه رسالتنا الأساسية للكنيسة هي باش ما تقلّش على الممارسات المشهورة أولا على الموضة الجديدة، ولكن تقلّب على الله. بداو تسمعو لكلمة الله من جديد.

ومن هاد المشروع الشامل كتجي السلسلة ديال الكتوب ديال "تسعود ديال العلامات" والّتي الهدف ديالها هو فحص التسعود ديال العلامات من كل جبهة ومن كل زاوية. بعض منها كتهدر مع الرّعاة، والبعض لآخر كيتهدر مع أعضاء الكنائس. وكنتمّاو باش كل هاد العلامات تجمع بين تحليل كتابي عميق وبُعد لاهوتي واعتبار ثقافي وتطبيق جماعي وحتى شوية من الإجتهد الشخصي. راه أحسن الكتوب المسيحية هنا الكتوب الّتي كيجمعو بين اللاهوت وبين التطبيق.

كنصلّيو باش يستعمل الله هاد الكتوب وغيرها باش يوجّد كنيستو العروسة ويعمّرها بالنور والجمال حتّى لنهار يعاود يرجع.

تقديم للكتاب

"خويا لعزیز"، أولاً "ختي لعزیزة"، كل نهار الحد في الصباح، بهاد الطريقة وبهاد الكلام كان طابيتي كيسلم على الخوت ديال الكنيسة اللي كتنا بجوج كترعاوها. وكان كلامو في محلّو. بالحق كان كيحبهم، وهما كانو كيحبّوه. بعض الخوت الكبار في السن ماكانوش قادرين ينطقو سميتو مزيان، ولكن كانو عارفين مزيان بلي كان كلامو جاي من القلب.

"صباح الخير خويا لعزیز"، مازال كنسمع صوتو وكلامو في ودي.

هاد الطريقة نفسها اللي سنعمل الرسول يوحنا بزّاف ديال المرّات في الرسائل اللولين ديالو للكنائس. الله نعم علينا وعطانا بزّاف ديال التعليم على شنو يعني نكونو مسيحيين مع بعضياتنا في الرسائل ديال الرسول يوحنا، وفي العهد الجديد كامل. كيعلونا كيفاش نكونو أعضاء ديال الكنيسة، وهادا هو الموضوع اللي كيهضر عليه هاد الكتاب حتّى هو.

طابيتي من تجربتو كيعرف بلي الحياة المسيحية ماخصناش نعيشوها بشكل فردي كل واحد بوحده. أه، راه الإيمان المسيحي هو حاجة شخصية، ولكن ماشي شي حاجة كنعيشوها بشكل فردي معزولين على المؤمنين لخرين. ملي كتأمن وكتاخذ الولادة الجديدة من الروح، راك كتولد في عائلة. وديك العائلة هي ماشي غير شي عائلة عالمية وعامة وغير ملموسة وصافي، ولكن في نفس الوقت راها عائلة خاصة مكونة من جماعة حقيقية كتجتمع في بلاصة محددة.

كنت عضو في نفس الكنيسة مع طابيتي لمدة طويلة، وتباركت بمعرفة طابيتي والزوجة ديالو كريستي. مازال عاقل على أول نهار تلاقيت طابيتي. تفاجئت بشحال كان مُتبر للإهتمام (كان كيخدم في "مركز أبحاث")، وشحال كان متميّز، وكيفاش كان كيفكر (ديما كيوزن كلامو قبل ما يهدر).

ولكن راه ماكانش غير شي إنسان عندو قبول عظيم وصافي. ولكن في نفس الوقت كان أخ عندو قلب كبير! بالزرية بدا كيدخل راسو في الحياة ديال الناس لخرين في الكنيسة. غير في شي سيمانات قلال، بدا طابيتي بالحق كيعاون الخوت ديال الكنيسة وكيدير الخدمة ديال الراعي. واخا دازو سنين عاد عيّناتو الكنيسة كشيخ فيها، راه في الحقيقة كان كيدير الخدمة ديال الشيخ والراعي من النهار اللؤلؤ.

كل هادشي كيدل على أن طابيتي كيفهم مزيان الفكرة ديال أن الخرفان خاصهم يكون مجموعين في نفس القطيع، وأنا شفتو بالحق عضو عظيم في القطيع ديال الخرفان وفي نفس الوقت راعي كبير.

خديت كافي من الوقت ديالك دابا. هاد الكتاب هو كتاب قصير ومابغيت نكتر في الهضرة. دابا بغيت تشجعك تدخل في الكتاب وتستافد متو. ولكن في اللؤلؤ خود واحد الدقيقة باش تصلي. صلي باش يستعمل الله طابيتي في حياتك، حيث راه الله ستعملو في الحياة ديال بزاف ديال الناس. صلي باش الله يستعمل هاد الكتاب باش يعاونك تعرف كنيستك المحلية وباش تبغيها بالطريقة ماسبقليكش عشتها من قبل. صلي باش ملي تعرف كنيستك وتبغيها، تزيد تعرف المحبة ديال الله وكيفاش تعكس هاد المحبة ديالو.

الله يباركك الله خويا لعزيز أولا ختي لعزيزة، وقراءة سعيدة.

مارك ديفير

واشنطن العاصمة

2007 شتنبر

مقدّمة

فاجأتني جيبي مليّ بدات كتبكي في وسط المقابلة ديالها باش تويّ
عضوة في الكنيسة. عشرين دقيقة اللّولى كانو عاديين بحال أي مُقابلة خرا.
كان كتهدر على الطفولة ديالها وكيفاش كبرات في عائلة مسيحية، وهدرات
على السنين ديال قرايتها في الثانوية وكيفاش كانت عامرة بالخوف، الوقت
اللّي عاشتو في الجامعة وهي تالفة على الطريق بحال قصة الإبن الضال.
وبكل فرح بدات كتتفكّر نهار أمانات وتبدلات حياتها في واحد الكنيسة
محلية في المدينة ديالها.

هادشي علاش ماتوقّعتش منها تبكي مليّ سولّتها هاد السؤال "كيفاش
عاواناتك هاد الكنيسة من الناحية الروحية؟ واش كبرتي ونضجتي في الروح
تمّا؟ "

بعد ما سكتات واحد الشوية، بدات كتشرح ليّا وقالت، "من بعدما
أمنت والله غير قلبي، ضنّيت بليّ شي واحد غادي يعاويّ في النمو
كمسيحية." زادت كتهدر وهي متوترة ومقلقة في نفس الوقت، قالت:
"ولكن كانو حظوني في واحد القنت، وبغاو مّي نفهم كلشي وندير كلشي
بوحدتي. ديك الفترة كانت صعبةة وكنت كنحس بوحدتي ومعزولة".

شحال من شخص بحال جيبي شفّتي في حياتك؟ تقدر نتا تكون دزّتي
من شي حاجة بحال هاكدا. تقدر تكون دوزّتي وقت طويل في كنيسة محلية
وحدة أولا بزّاف ديال الكنائس. وتقدر تكون حياتك المسيحية كتشبه
بشكل كبير للحياة المسيحية ديال جيبي. تقدر تكون جيبي للإيمان بقوة
وحماس، وعندك رغبة كبيرة باش تدير أمور عظيمة من أجل. ولكن دغية
لقيتي راسك كتتسائل وكتقول: "شنو بالضبط اخصني ندير بصفتي عضو
في هاد الكنيسة المحلية؟"

إلا كانت حالتك بحال هاكدا، راه هاد الكتاب غيعاونك بزّاف. وفي حالة
لا، راه واخا هكداك هاد الكتاب غادي يعاونك بزّاف.

سواء أمنتني بالمسيح لبارح أولا هادي تلاتين عام، راه الله بغاك تلعب
واحد الدور مهم وحيوي وفَعّال في الجسد ديالو، اللّي هو الكنيسة المحلية.
هو بغاك تعيش حياتك الروحية في الكنيسة بصيفتها الوطن العجيب
ديالك واللّي عندو قيمة كتر من أي بلاصة خرا في هاد الأرض. الله بغا باش
الكنائس المحلية ديالو يكونو صحاح وسليمين باش الأعضاء ديال هاد
الكنائس حتّى هما يكونو صحاح وسليمين.

كنتمّي باش هاد الكتاب يعاونك تكتاشف شنو كييعني أنّك تكون عضو
سليم في الكنيسة المحلية، أولا يعاود يفكّرْك بهاد الحق إل نسيّتي. وكنتمّي
يعاونك تعرف شنو يعني أنّ العضو ديال الكنيسة يساهم في الصّحة
الروحية العامة ديال الكنيسة.

في عام 2007، خدمة كروسواي (Crossway) نشرات واحد الكتاب
ديال مارك ديقر سميتو "شنو هي الكنيسة السليمة؟"، داك الكتاب عطا
تعريف واحد كيوضّح كيفاش نقدر و نعرفو واش الكنيسة سليمة من
الناحية الكتابية والتاريخية، وحتّى معا الكتاب ديالو اللّي جا قبل سميتو
"تسعود ديال العلامات ديال الكنيسة السليمة"، وهادشي أثر في التفكير
ديال بزّاف ديال الرّعاة والقّياد ديال الكنائس من اللّول.

هاد الكتاب كيبيّن التعليم ديالو من كتاب " شنو هي الكنيسة
السليمة؟" ولكن في نفس الوقت كيحاول يجاوب على واحد السؤل
مختلف شوية: "شكون هو عضو الكنيسة السليم حسب الكتاب
المقدس؟". الكتاب ديال "تسعود ديال العلامات ديال الكنيسة السليمة"
هو كيهدر بشكل رئيسي مع الرعاة اللّي بغاو يديرو إصلاح داخل الكنيسة،
أما هاد الكتاب فهو بغا يهدر مع الناس اللّي كيقودوهم رعاة في إطار الكنيسة

المحلية وكيشجّع هاد المؤمنين باش يقومو بالدور ديالهم في مساعدة الكنيسة المحلية باش تعكس مجد الله كتر وكتر.

نت كعضو في كنيسة محلية كيفاش تقدر تساهم وتعاون في الصحة الإيجابية ديال كنيستك؟

واحد نهار الأحد في الصباح من بعد الاجتماع ديال الكنيسة جات عندي واحد المرأة سميتها السيدة بورنز. مكانش عاجبها الحال بسباب بعض الأمور اللي كانو كيتغيرو في الكنيسة وبسباب أمور خرين اللي باقين على حالهم ولكن هي بغاتهم يتغيرو. كنت كنحاول نسلم على الخوت اللي كانو خارجين من الإجتماع وفي نفس الوقت كنحاول نسمع بأدب للسيدة بورنز وهي كتشكي على دوك الأمور.

ملي حبسات تهدر، أول حاجة فكّرت فيها هي كنت بغيت نسؤلها: "إذن شنو بالضبط بغيتيني ندير دابا مع كل هادشي؟" ولكن في ديك اللحظة الله فتح ليّا تفكيري وطرحت عليها سؤال آخر أحسن. سؤلتها: "إذن شنو بغيتي نتي تديري مع هادشي في الكنيسة؟ كيفاش تقدري تّولي عضوة أفضل في الكنيسة وتساهمي في صحة ديال عائلة الله في هذا البلاصة؟"

هاذ الأسئلة هما مهمّين لكل مسيحي، وماشي غير المؤمنين اللي كيشكيو بحال هاد السيدة. الصّحة الروحية ديال الكنيسة المحلية كتعتمد على الاستعداد ديال أعضائها باش يفحصو قلوبهم، ويصحّحو تفكيرهم، ويخدمو كنيستهم بيدّهم.

الفصول اللي جاينين في هاد الكتاب غادي يقدمو اقتراح واحد باش العضو ديال الكنيسة يوّلي سليم وصحيح روحيًا في كنيستو المحلية. هاد الكتاب راه كيفترض أنك عضو في كنيسة محلية وربما راك غير كتحتاج

لشوية ديال التشجيع أولا الفرصة باش تفكر مزيان في بعض الأمور المهمة.¹

الفصل الأول كيشجع على "الإستماع التفسيري" لكلمة الله. عضو الكنيسة السليم هو اللي كيسمع بطريقة خاصة لكلمة الله في الوعض أولا في أي درس كتابي- كيخلي الله هو اللي يهدر ويحكم من خلال أنه ديما كيبيغي يسمع المعنى الحقيقي ديال كلام الله باش يقدر يطبقو في حياتو.

الفصل الثاني كيشجع أعضاء الكنيسة باش يكرسو نفوسهم باش يتعلمو المواضيع العامة ديال الكتاب المقدس. يعني تعليم مزيان ونافع باش كل مؤمن يولي "لاهوتي كتابي" باش يكون قادر يحمي راسو والكنيسة ديالو من التعاليم المغلوطة واللي ماشي صحيحة وسليمة.

الفصل الثالث كيشجع أعضاء الكنيسة باش يتشبعو بإنجيل يسوع المسيح. راه هو الإنجيل اللي كيخلصنا (يعني كينجينا) (رومية 1: 16)، وهو الإنجيل اللي كيقوينا وكيشجعنا في حياتنا المسيحية اليومية.

إلا ماكانتش عندي رغبة قويّة باش نبشر بإنجيل ونولي مُبشّر كتابي، راه مانقدرش نستماع للكتاب المقدس من جبهة التفسير اللاهوتي، ومانقدرش نستوعبو بشكل كامل وصحيح ونفهم المواضيع ديالو العامة، ومانقدرش نعيش حياة متشعبة بالإنجيل. الفصل الرابع والفصل الخامس كيقدمو بعض الاقتراحات باش نفكرو في الإيمان والتبشير بطريقة كتابية سليمة وصحيحة.

¹ إلا إكنتي مؤمن مسيحي وماشى عضو في شي كنيسة، بغيت نشجعك تقرا كتاب زوين بزّاف اللي يقدر يعاونك تفكر في الأسباب اللي يخليوك تكون عضو في شي كنيسة. الكتاب سميتو "حبس تكون غير صديق للكنيسة" من تأليف جوشوا هاريس (دار نشر سيسترز، أوريجون: مولتنوماه، 2004).

الفصل السادس كيعطينا دعوة باش نلتازمو بالعضوية في الكنيسة المحلية بشكل جدي وفعال. ومن بعد كيحي الفصل السابع وكيعطينا سبب واحد كيوضح لينا الأهمية ديال العضوية الملتازمة في الكنيسة المحلية: الكنيسة المحلية هي البلاصة فين المؤمن المسيحي كيختبر التأديب ديال الرب والتغيير ديالو.

الفصل الثامن كيهدر على النمو الروحي من المنضور ديال الكتاب المقدس، والفصل التاسع كيقدّم بعض النصائح ليك كمؤمن عضو في الكنيسة باش تقدر تدعم القادة ديال كنيستك المحلية بشكل فعال.

الفصل 10 غيشجّعك باش تشوف الصلاة على أنها حاجة أساسية ومهمة باش تولّي عضو سليم في الكنيسة. هاد الفصل غادي يناقش بشكل مختاصر الأساس الكتابي للصلاة، وغادي يقدّم بعض الإقتراحات لكل عضو سليم وصحّي في الكنيسة باش يدخلها في حياة الصلاة الشخصية.

كل فصل في هاد الكتاب غادي يقترح عليك باش تقرا نصوص خرين باش تزيد تتوسّع في الدراسة ديالك. ماشي غير هاد الأمور اللي يقدر يخليوك تكون عضو سليم وصحّي في الكنيسة؛ كاينين أمور خرين مهمين.

ولكن كنتمّي باش هاد الكتاب يقوينا ويشجّعنا كلنا على المحبة وأعمال الخير على ود المجد ديال المسيح والجمال والبهاء ديال العروسة ديالو الكنيسة.

ياربنا العالي، كنترجّاوك باش تبارك الشعب ديالك وتخليهم يكونو متواضعين، ومتّاحدين، وزرع فيهم الفرح، والسلام، وخليهم يحبو ويخدمو بعضياتهم. كنصلّيو ليك يارب باش تخلي كل الشعب ديالك يكونو صحّتين في الروح وباش يجيبو ليك الغلة والثمار اللي بغيتي، ماشي غير كل واحد بوحدو، ولكن

كشعب وكجسد واحد. عاونهم باش يخدمو مجموعين ويكبرو
وينضجو باش يولّيو شوي بشوي بحال المسيح. باركهم في
قرايتهم وسماعهم ودراستهم للكلمة ديالك باش إسمك
يتمجّد. ويا رب، ستعمل هاد الكتاب الصغير بالطريقة اللّي
ترضيك باش مملكتك تتوسّع وعروستك تزيد تبان بهية
وجميلة. يا بونا اللّي في السما، كنطلبو منك كل هادشي وحنّا
عارفين بلّي حتّى حاجة ماصعبية عليك، كنجيو لعندك وحنّا
عامرين بالإيمان بيك، باسم يسوع المسيح. آمين.

العلامة 1:

عضو الكنيسة السليم هو مُسْتَمِعٌ تفسيري

شنو هو "الإستماع التفسيري"؟ قبلما نجاوبو على هاد السؤال، خاصنا في اللؤل نعرفو شنو هو "الوعظ التفسيري". أول وأهم علامة على الكنيسة السليمة هي الوعظ التفسيري. "الوعظ التفسيري ماشي هو غير شي تعليق سطحي على بعض الآيات من الكتاب المقدس. راه الوعظ التفسيري هو الوعظ اللي كيّتبني على نفس النقطة الرئيسية اللي كاينة في الآيات ديال الكتاب المقدس اللي كنوعضو منهم".² إلا بغينا الكنائس تكون عندهم صحة روحية سليمة، فراه خاص الرّعاة والمعلّين في الكنائس يلتزمو باكتشاف المعنى الرئيسي ديال الآيات في الكتاب المقدس وخاصهم يخليو هاد المعنى يوجّه ويرشد الخدمة مع الخوت ديال الكنيسة.

كاينة واحد النتيجة طبيعية مهمة لكل عضو في الكنيسة المحلية. كيما خاص الخدمة ديال الراعي والوعظ ديالو يتبني فوق المعنى ديال كلام الله في الكتاب، راه خاص تكون الخدمة ديال الإستماع المسيحي مبنية على الكلام ديال الله. ملي كنسمعو للوعظ من كلمة الله، راه ماشي غير كنقلبو بشكل أساسي على "نصائح وإرشادات عملية"، وأخا راه الكتاب المقدس كيعلّنا بزّاف على الحياة اليومية وكيعطينا بزّاف ديال النصائح. وماخاصناش غير نسمعو للوعظ اللي كيشجّعنا باش نقدّرو نفوسنا أولاً كيعلّنا أمور سياسية أولاً إجتماعية. ولكن راه حنا كأعضاء في الكنائس المحلية، خاص يكون الهدف ديالنا الرئيسي هو نسمعو لصوت الله

² مارك ديفر، تسعود ديال العلامات على الكنيسة الصحية (ويتون، إينوي: كروسواي، 2004)، 40.

وللرسالة ديالو كيما كاينة في الكلمة ديالو. خاصنا نبغيو نسمعو للكلام اللي كتبو لينا، بمحبته اللي كتعرف كلشي، باش هو يتمجد وحنا نتباركو.

شنو كنعنيو بالضبط بـ "الإستماع التفسيري"؟ الإستماع التفسيري هو نسمعو للمعنى ديال الأيات اللي كندرسوهم في الكتاب المقدس ونقبلو داك المعنى باعتبارو هو الفكرة الرئيسية اللي خاصنا نفهموها ونعيشوها في حياتنا الشخصية وحياتنا الجماعية كمؤمنين مسيحيين.

شنو هما الفوائد ديال الإستماع التفسيري؟

الإستماع التفسيري، أولاً، كيفيدنا من خلال أنه كيزيد كيقوي الجوع والإشتياق ديالنا لكلمة الله. ملي كنفتحو وديننا على الوعض اللي كيخلي النقطة الأساسية ديالو تكون هي النقطة الأساسية اللي كاينة في الأيات ديال الكتاب المقدس، فراه تما كنبداو نولفو نسمعو لله. كنوليوم فاهمين كتر اللغة ديال الكتاب المقدس والمواضيع العامة ديالو. الكلمة ديال الله، والصوت ديالو، كيوليو حلوين للدوق ديالنا (مزمور 119: 103-104)؛ وفاش كيوقع هادشي، كنوليو قادرين كتر نعلزو الأصوات الكتيرة اللي كتنافس صوت الله ومانخليوهمش يتحكمو في حياتنا. الإستماع التفسيري كيخلق فينا ودين صافيين باش نقدرو بيهم نسمعو الله.

الفايدة الثانية كتجي من الفايدة اللولى. الإستماع التفسيري كيعاوننا باش نركزو على المشيئة ديال الله وكيعاوننا نتبعوه. جدول أعمالنا وأهدافنا كيوليو في المرتبة الثانية. الأهداف ديال المعلم أولاً الراعي اللي كيوعض كيوليو حتى هما في المرتبة الثانية. المشيئة ديال الله للشعب ديالو كتولي الأهم، وكتعاود ترتب الأولويات ديالنا، وكتعاود توجهنا في الطريق اللي كتتمجد الله كتر. الرب بنفسو قال: "خُزْفَانِي كَيْسَمْعُو الصُّبُوتْ دِيَالِي، وَأَنَا كَنْعُرْفُهُمْ وَهُمْ كَيْتَبْعُونِي" (يوحنا 10: 27). الإستماع لصوت يسوع المسيح كيما كتعلنو كلمة الله هو حاجة مهمة بزاف وضرورية باش نقدرو نتبعوه.

الفايدة الثالثة، الإستماع التفسيري كيحيي الإنجيل وكيحيي حياتنا من الفساد. الكتاب المقدس يقول "عَيَّجِي وَأَخَذَ الْوَقْتَ مَا عَيْسَتْخْمَلُوشْ فِيهَ النَّاسُ التَّغْلِيمِ الصَّحِيحِ، وَلَكِنْ عَيْتَبَعُو الشَّهَوَاتِ دِيَالَهُمْ، وَعَيْضُورُو بِيَهُمْ مُعَلِّمِينَ عَيْكُولُو لِيَهُمْ ذَاكْسِّي اللَّي بُعَاوُ يَسْمَعُوهُ" (2 تيموتاوس 4: 3-4). إلا ماسمعناش لكلمة الله بشكل لاهوتي تفسيري راه غادي نواجهو نتائج كارتيّة. المعلمين الكدّابة غاديين يدخلو للكنيسة وغادي يخرّجو الإنجيل الحقيقي. وفي الأخير الأساطير والكدوب غاديين ياخدو بلاصة الحق. ملي الأعضاء كيطورّو وكيقويو العادة ديال الإستماع التفسيري لكلمة الله، راهم تمّا غيكونو كيحميو ريوسهم من "الودنين المسدودين" وغاديين يحميو الإنجيل.

الفايدة الرابعة هي أن الإستماع التفسيري كيشجّع الرّعاة المُخْلِصِينَ والأُمَمَاء. هاد الرجال اللّي كيخدمو الرب والكلمة ديالو بأمانة كيستحقّو التكريم والبركة (1 تيموتاوس 5: 17). من بين الأمور اللّي كتفشّل هاد الخُدّام ديال الله هو شي جماعة ديال المؤمنين اللّي ماكيسمعوش لكلمة الله وماكيهتّموش بيها. هاد الخُدّام المُخْلِصِينَ كيتشجعو وكتقوّوا ملي كلام الله كيدخل لودنين مفتوحين وصافيين. كيتشجعو بزّاف ملي كيشوفو شعب الله كيسمعو لصوت الرب وكيكون باين بلي كلمة الله كتغيّر حياتهم. كأعضاء في الكنيسة، نقدرو نتهالّو في الرّعاة والمعلّمين ديالنا وخاصنا نعاونوهم ونشجّعوهم من خلال أنّنا نتعلمو نسمعو لكلمة الله من خلال اللاهوت التفسيري.

الفايدة الخامسة، الإستماع التفسيري كيفيد الجماعة ديال الخوت المتاحدين في الكنيسة. الرُّسُل اللّي كتبو العهد الجديد بزّاف ديال المرّات كيشجعو الكنائس المحليّة باش يكونو متّاحدين – باش يكون عندنا نفس الفكر. بولس كتب لواحد الكنيسة المحليّة وقال: "رَّانِي آ خُوتِي كَنْظَلْبَ مِنْكُمْ فَأَيْسَمُ رَبَّنَا يَسُوعَ الْمَسِيحَ، بَاشْ تُكُونُوا كُلُّكُمْ مُتَّفَقِينَ عَلَي كَلِمَةِ وَحْدَةٍ.

وَمَا تَحْلِيُوشَ الْمَشَاكِيلَ يُفَرِّقُوكُمْ، وَلَكِنْ كُونُوا مَتَّاحِدِينَ فُفَكْرَ وَاحِدٍ وَفُرِّي وَاحِدٌ" (1 كورنتوس 1: 10؛ قرا حتى رومية 12: 16؛ 2 كورنتوس 13: 11؛ 1 بطرس 3: 8). ملّي كنجتمعو مع بعضياتنا في كنائسنا المحلية وكنعطيو لريوسنا فرصة باش نسمعو صوت الله من خلال الكلمة ديالو في الوعض، راه الروح كيعاود يشكّلنا باش نكونو جسد واحد. كنوليو متّاحدين في الفهم ديالنا وفي الأهداف ديالنا. وهاد الوحدة كتشهد لحقيقة إنجيل يسوع المسيح (يوحنا 17: 21). ولكن راه إلّا كئنا كنسمعو من خلال اهتماماتنا وأهدافنا الشخصية، وإلّا شكّلنا "تفسيرات خاصة بينا" ووجهات نظر شخصية، فراه هنا غنكونو كنهدمو ديك الوحدة الروحية، وغنكونو كنغلقو صراعات على أمور ثانوية، وغنكونو كنضعفو الشهادة الجماعية ديالنا بالإنجيل.

كيفاش يقدر أعضاء الكنيسة بينيو هاد العادة ديال الإستماع التفسيري؟

واخّ، إلّا كان الإستماع التفسيري حاجة مهمة وضرورية للصحة والسلامة الروحية ديال أعضاء الكنيسة بشكل فردي وبشكل جماعي، إذن كيفاش المؤمن يقدر يبني ويطوّر بحال هاد العادة؟ على الأقل كابين سته ديال الأفكار العملية اللي يقدرو يعاونونا مع العادة ديال الإستماع الفعال لكلمة الله.

1) تأمل في الآيات ديال الوعض ملّي تكون بوحدك

قبل من الوعض بشي يّامات، سؤل الراعي على الآيات أولا الفقرة ديال الكتاب المقدّس اللي غادي يوعض منهم نهار الحد اللي جاي. شجعو وقول ليه بلّي راك غادي تصلّي من أجلو ملّي يكون كيوجد الوعض وغادي توجّد راسك حتى ننا باش تسمع. ملّي تقرا دوك الآيات أولا ديك الفقرة، حاول تلقا الخطوط العريضة والأساسية وكتبهم في شي دفتر خاص باش تعرف

على ود شنو كتصلي. راه التعلّم ديال تحديد الخطوط العريضة ديال الآيات في الكتاب المقدس هو طريقة رائعة ومفيدة بزّاف باش تلقا المعنى الأساسي ديال كلمة الله وتفهمو. من بعد هادشي تقدر تستعمل هاد الخطوط الأساسية اللي لقيتي كوسيلة كتعاونك ملي تكون كتسمع للوعظ؛ وقارن النقط اللي كتبتي مع النقط ديال الراعي باش تقدر تفهم كتر وبشكل أعمق كلام الله.

2) ستتمر في شي مجموعة مزيانة من الكُتب التفسيرية

دعم الوقت ديال الدارسة ديالك الشخصية بشي عقول عضيمة اللي دازو في التاريخ المسيحي. درس الكتاب المقدس مع دجون كالفن (John Calvin) أولا مارتن لُونْد-دجونس (Martin Lloyd-Jones)، تقدر تشري التفاسير ديالهم للكتاب المقدس وتقرأ معاهم الكتاب المقدس وتسمع أفكارهم وتعاليقهم على كل أية في الكتاب المقدس. إلا كان الراعي ديالك كيوعض شي سلسلة من إنجيل يوحنا، متلاً تقدر تختار التفسير ديال دي. أي. كارسون (D. A. Carson) أولا التفسير ديال جيمس مونتغمري بويس (James Montgomery Boice) لإنجيل يوحنا. خلي هاد الأساتدة الكبار في كلمة الله والرعاة يعاونوك تسمع كلمة الله بودنين صافيين وتكتاشف المعنى ديالها الغني والعميق. السلسلة التفسيرية "الكتاب المقدس كيهدر اليوم" هي بلاصة مزيانة باش ييداو المؤمنين اللي بغاو يجمعو مكتبة مزيانة ديال التفاسير والكتب التوضيحية لكلمة الله. تقدر حتى تبغي تشري كُتب دراسية عامة يعاونوك تدرس العهد القديم والعهد الجديد باش تقوي الكُتب ديال التفسير. الدراسة العامة للعهد القديم ديال "تريمبر لونجمان" (Tremper Longman) والدراسة العامة للعهد الجديد ديال دي. أي. كارسون (D. A. Carson) هما مصادر مزيانين ومفيدين باش تبتدا.

3) هدر معا صحابك وصلّي معاهم على ود الوعض من بعد الاجتماع ديال الكنيسة

عوض ترجع لدارك دغية من بعد الإجماع، أولا تهدرو على أحر الأخبار، تعود تهدر على الوعض مع الخوت من بعد الاجتماع ديال الكنيسة. بدا حوارات روحية، تقدر تستعمل سؤال بحال هاكدا: "كيفاش شجعاتك الكلمة ديال الله اليوم أولا كيفاش تكلم الله مع قلبك اليوم؟" أولا تقدر تسؤل: "شنو في شخصية الله اللي فاجئك اليوم أولا شجعتك؟". شجع خوتك من خلال أنك تشارك الأمور اللي تعلمتها على الله وكلمتو في الوعض. كتب الملاحظات ديالك على كيفاش تغير التفكير ديالك بالكلام ديال الله. وصلّي مع الخوت باش الله يعاونكم ما توليوش غير كتسمعو بلا ودين فايقين وبلا عقل مستوعب، وصلّي باش الله يبارك الخوت ويخليهم يبغيو الماكلة الروحية ديال كلمتو (إشعيا 6: 9-10، عبرانيين 5: 11-14).

4) سمع للوعض وطبقو في حياتك السيمانة كلها

نقدرو نبنو العادة ديال الإستماع التفسيري من خلال أننا نسمعو للوعض السيمانة كلها وفي نفس الوقت نعيشو داك الوعض ونطبقوه في حياتنا اليومية. ماتخليش الوعض بالإنجيل ديال نهار الحد يكون غير حدث كيوقع مرة وحدة ومن بعد كيغير من العقل ديالك من بعد كتسمعو (يعقوب 1: 22-25). ختار تطبيق واحد أو جوج من الكتاب المقدس وطبقهم، صلّي وطلب المساعدة ديال الرب، وطبقو في حياتك اليومية السيمانة كلها. إلا كانت كنسبتك كتسجل الوعض وكتحطو في يوتوب أولا في الواتساب مثلاً، راه غيكون مزيان تستغل هاد الفرص وتغدي روحك مزيان. تقدر تهدر مع الراعي ديال الكنيسة ديالك، وتقدر تصابو مجموعات صغار في كل مجموعة تقدر تراجع الوعض وتشجع الخوت على التطبيق. وتقدر حتى تستعمل الوعض والملاحظات ديالوك في التلمذة الشخصية ديالك. كنعرف بزاف ديال العائلات اللي كيتلاقوا بشكل منتظم

باش يراجعو الوعض كعائلة في وقت ديال العباداة كل نهار الحد في العشية. كينة مية طريقة باش تخلي الوعض يبقا حي في حياتك الروحية من خلال أنّ المؤمن يراجع كلمة الله على طول الأسبوع. كون مُبدع. هادشي كيستحق الوقت ديالنا والطاقة ديالنا.

5) طَوْر العادة باش تعامل مع سؤال عندو علاقة بالأيات ديال الوعض

جوناتان إدواردز (Jonathan Edwards) قرر أنه ماعمرّو غيخلي شي نهار يدوز بلا ما يلقاو الجواب على أي سؤال فكر فيه أولا جا في بالو وهو كيدرس الكتاب المقدس.³ الصحة الروحية ديال الكنائس ديالنا غادي تتحسن بزّاف إلا الأعضاء كرسو نفوسهم للدراسة ديال الكتاب المقدس بهاد النوع ديال الجهد والعزيمة. طريقة من الطرق باش نديرو هادشي هي نبدأو نتناقشو ونفتحو حوارات مع الرعاة ديالنا ولا الشيخوخ أولا المعلمين ديال كنيستنا على الأسئلة اللي كيدورو في بالنا من الفقرة اللي كيحي منها الوعض. وزيد على هادشي راه ماخصناش نكونو معغازين في الدراسة ديالنا الشخصية للكتاب المقدس. ديما قلب على الأجوبة من خلال أنك تبحت في الكتاب المقدس براسك وتهدر مع الخوت اللي قراب ليك. ولكن ماتنساش بلي الراعي ممكن غيكون ستمتر بزّاف ديال الوقت وهو كيفكر في هاد الأيات ديال الوعض، وضروري غيكون مستعد يعاونك مع كلمة الله. تابع الوعض وماتجاهلش الأسئلة والتعليقات اللي يقدرو يكونو تشجيع للراعي ديالك وبركة على حياتك الروحية.

6) زرع التواضع

³ مَلِي كان إدواردز تقرّيبًا فعمرو تسعطا عشر عام، خدا هاد القرار وكتب: "قَرَرْتُ، مَلِي نفكر في حل أي نضرية في اللاهوت، دغية كندبر كل ما نقدر باش نلقا الحل، إلا ما حبسونيش الضروف". أعمال جوناتان إدواردز، الجزء 1 (بيبودي، ماساتشوستس: هندريكسون)، xii.

ونتا كتتمعمق في كلمة الله، وكتسمع لصوتو، راك بلا شك غادي تبدا تكبر وتنضج وتكتشاف بزاف ديال الكنوز الرائعة. ولكن ونت كتزيد تكبر في العمر ديالك، ماخاصكش تولي بحال شي "مستمع محترف للوعض" اللي ديما كيسمع ولكن ماعمر وكيتعلم. رد البال مع المعرفة المخادعة اللي غير "كتنفخ" الإنسان (1 كورنتوس 1: 8؛ كولوسي 2: 18) واللي كترزع الفتنة والإنشاقات. خاصك في قلبك تقتل أي رغبة باش تتكبر، تتناقد الناس، أولا تحكم عليهم. عوض هادشي خاصك تحاول تتلاقا مع يسوع كل مرة كتوقف قدام الكتاب المقدس؛ خود من الكلمة ديال الله القوة باش تعبدو بكل جهد فيك. وعوض نمجدو ريو سنا، خاصنا نتفكرو كلام الرسول بطرس ملي قال: "تواضعو تحت يد الله القوية باش يعلي شأنكم فالوقت دياله" (1 بطرس 5: 6).

الخلاصة

راه سماع الرسالة وكلمة الله هو اللي كيوصلنا للإيمان اللي كينجي (رومية 10: 17). الأعضاء ديال الكنيسة كيكونو سليمين ملي كيسلمو نفوسهم لسماع هاد الرسالة كتأديب وتعليم متناضم. الاستماع التفسيري كيغزز هاد الصحة بالنسبة للأفراد والكنائس كلها.

باش تزيد تتعمق في التفكير

1. في رأيك شنو هو المستوى ديال القدرة ديالك باش تسمع وتفهم المعنى ديال كلمة الله في القراية ديالك الشخصية للكتاب المقدس كل نهار؟ وملي تكون كتسمع للوعض؟
2. كيفاش كتفكر تدير باش تقوي القدرة ديالك على الإستماع؟

العلامة 2:

عضو الكنيسة السليم هو عالم ديال اللاهوت الكتابي

الجهل بالله – راه الجهل بالطرق ديال الله والشراكة الروحية معاه – هو السبب الرئيسي في ضعف الكنيسة اليوم. هادشي اللي قال جي. آي. باكر (J. I. Packer) عام 1973 في المقدمة ديال المُجلّد ديالو الكلاسيكي "معرفة الله". باكر ستنتج بلي واحد من الأمور اللي كيعطيو بحال هاد الجهل بالله والضعف في الكنيسة هو "أن العقول المسيحية ولأومتوافقين مع الروح المُعاصرة: الروح اللي كتولّد الأفكار العضية ديال الإنسان وكتفتح الطريق غير لأفكار صغيرة على الله".⁴

للأسف كيبان بلي الكلام ديال باكر مازال صحيح وَاخًا دازت كتر من ثلاثين عام. راه الجهل بالطرق دياول الله والشراكة الروحية معاه مازال منتشرين في كل جبهة. مازال الأعضاء ديال الكنائس المسيحية كيفكرو أفكار صغار على الله وأفكار عضام على الإنسان. هاد الحالة كيتورينا بلي راه بزاف ديال المسيحيين هملو الدعوة دياهم الكبيرة والأساسية: اللي هي يعرفو الإله دياهم. راه خاص كل مسيحي يكون بحال شي عالم ديال اللاهوت. إلا كُنّا بغينا نشوفو الكنائس كيتحسنو في الصحة الروحية، راه خاص الأعضاء ديال الكنيسة يلتازمو باش يكونو لاهوتيين كتابيين بأي طريقة ممكنة. هادي هي العلامة الثانية على عضو الكنيسة السليم.

⁴ ج. آي. باكر، معرفة الله، طبعة الذكرى ديال عشرين عام (داونرز جروف، إلينوي: إنترفارستي، 1993)، 12.

شئو هو اللاهوت الكتابي بالنسبة للعضو ديال الكنيسة؟

راه الممارسة ديال اللاهوت الكتابي هي نعرفو الله بنفسو. أنا كنستعمل مُصطلح "علم اللاهوت الكتابي" باش نهدر على جوج ديال الأمور. أولاً، ماخصناش ننساو بلّي الكتاب المقدس هو الله بداتو كيعلن على داتو. هو المصدر اللّي كحتاجو باش نطوّرو أفكار عضيمة على الله. المسيحي اللّي كيهتم بمعرفة الإله ديالو هو المسيحي اللّي باغي يعرف شنو كيقول الله على راسو في الكتاب المقدس. هاد المسيحي مسيحي ماكييداش الهدرة ديالو على الله بشي جملة بحال: "كيعجبني نفكر في الله على أنه..." ماخصناش نخلطو المعرفة ديال الله بالتقافة المحلية أولاً أي دين ديال العالم باش نصابو الإله اللّي كيعجبنا. عضو الكنيسة المسيحية اللّي جدي في معرفة الله هو العضو اللّي كيلتازم بشنو كيقول الكتاب المقدس على الله، حيث الكتاب المقدس هو البلاصة اللّي فين الله كيعلّمنا على راسو.

راه الممارسة ديال اللاهوت الكتابي كتعني نعرفو القصة ديال الله الكبيرة ديال الفداء. ثانياً، المؤمن اللاهوتي هو مؤمن ملتزم بفهم التاريخ ديال الوحي والمواضيع والعقائد العامة والرئيسية ديال الكتاب المقدس وملتزم باش يفهم كيفاش هادشي كلو كيتوالم وكيנסاجم مع بعضياتو. يعني العضو السليم في الكنيسة كيكترس نفسو ووقتو باش يفهم الوحدة والتطوّر ديال تاريخ الكتاب المقدس بشكل عام وكامل- وماشي غير شي آيات أولاً فقرات معزولة اللّي كيفضلهم. هاد العضو كيقرب من الكتاب المقدس وهو عارف بلّي راه كيقرا قِصة وحدة عضيمة على الله اللّي فدا لنفسو شعب على المجد ديالو. وفي هاد القصة، المؤمن كيقدر يشوف بلّي الله هو الخالق، وهو إله قُدوس، وإله أمين، وإله مُحب، وإله عندو كل السيادة، وكيفض الوعود ديالو للشعب ديالو، من آدم وحواء حتّى لأخر الزمان.⁵

⁵ مارك ديفر، تسعود جبال علامات على الكنيسة الصحية (ويتون، إلينوي: كروسواي، 2004). الفصل 2.

كيفاش اللاهوت الكتابي كيعاون في تحسين الصحة الروحية في عضو الكنيسة؟

واين جرودم (Wayne Grudem) في الكتاب ديالو المشهور "علم اللاهوت النضامي"، حدّد بزّاف ديال الفوائد لدراسة علم اللاهوت النضامي. بزّاف من هاد الفوائد كييجيو حتىّ مع ممارسة اللاهوت الكتابي حتىّ هو. الفوائد اللي هدر عليهم جرودم كيستحقّو نهدرو عليهم هنا بشكل ملخّص.⁶

أولاً، ممارسة اللاهوت الكتابي كتعاونًا باش نكبرو في تقديسنا وتمجيدنا لله. ملي كنتلاقوا مع الله ديال الكتاب المقدس اللي أسّس وكيففض الوعود ديال العهد مع الشعب ديالو، تمّا كنشوفو العظمة ديال الله. كيوضحا ليّنا كتر كيفاش كل حاجة دارها الله راه دارها على ود خطة وحدة، من أوّل وعد قطعو الله مع حواء ملي واعدها بليّ النسل ديالها هو اللي غيسحق الراس ديال اللفحة (تكوين 3: 15)، حتىّ نهار الله فتح الرّجم ديال المرأة باش تحمل بهاد "النسل" (تكوين 17: 15-19؛ 21: 1-2؛ 29: 31؛ 30: 22؛ إشعياء 7: 14)، نهار هاد "النسل" تولد في هاد العالم (متى 1: 20-23). ملي كنشوفو بليّ الله ديما كان وديما غيبقا هو نفس الله الخالق والقُدوس والمُخلّص والمُحبّ والسامي معنا كيما كان مع ناس خرين قبل ممّا، راه الإيمان ديالنا والإحترام ديالنا ليه كيزيد يكبر ويتقوّى. إلا بغينا نعرفو الله وإلا بغينا بالحق نمجدوه، راه غاديين نكرسو ليه نفوسنا ونستتمرو وقتنا باش نوليوا لاهوتيين كتابين اللي كيفهو القصة ديال الكتاب المقدس والمواضيع ديالو.

ثانيًا، الممارسة ديال اللاهوت الكتابي كتعاونًا باش نتغلبو على أفكارنا الغالطين. كلنا غنتواجهو مع تعاليم مختلفة في الكتاب المقدس اللي

⁶ واين جرودم، اللاهوت النظامي (جراند رابيدز، ميشيغان: زوندرفان، 1994)، 26-30.

غيكونو صعاب علينا أولا غادي يشوشونا ويحبرونا. في الأغلبية ديال الأوقات كترفضو نقبلو هاد التعاليم بسبب القسوحية ديال قلوبنا وبسباب الدنوب اللي فينا. نقدرو نتجنبو شي آيات اللي ممكن كييجيونا صعاب أولا كيشوشونا. ولكن ملي كنتعلمو القصة العامة والكبيرة ديال كلمة الله المكتوبة والتعليم العام ديال كلمة الله على شي موضوع محدد، فراه تما غيسهال علينا نتعرفو على الأفكار الغالطين اللي كيكونو مخبعين في عقولنا. اللاهوت الكتابي كيعاوننا باش نشوفو كيفاش أن الله ديما كيقول نفس الرسالة للشعب ديالو في بلايص مختلفين وبطرق متنوعة (عبرانيين 1: 1)، هاد الرسالة اللي واحد النهار كلنا غادي نتواضعو قدامها ونقبلوها (إشعيا 45: 22-24؛ رومية 14: 10-12؛ فيلبي 2: 9-11). ملي كنصلبو وكندرسو اللاهوت الكتابي، راه هادشي كيخلينا نتواضعو ونخضعو نفوسنا لله بكل فرح وكيخلينا نتخلّو على الأفكار الغالطين اللي عندنا عليه.

ثالثاً، الممارسة ديال اللاهوت الكتابي كتعاوننا باش نحملو الكنيسة من الخلافات العقائدية (يعني المدايزة على ود العقيدة). التاريخ ديال الكنيسة عامر بالخلافات وسط الكنائس وبين الكنائس. الكنائس كيكونو قادرين يتحملو بحال هاد الخلافات وكيكون قادرين يتجاوزوهم ويلقاو ليهم حل بشكل فعال ملي الكنيسة كيكون عندها فهم مزيان باللاهوت الكتابي والنضامي والتاريخي. هادشي صحيح حيث كل حاجة كيقولها الكتاب المقدس على شي حاجة محددة كتكون مرتابطة بكل الأمور لخر اللي كيهدر عليها الكتاب المقدس. علم اللاهوت الكتابي كيعاوننا نشوفو الارتباط والإنسجام ديال التعاليم ديال الكتاب المقدس. راه المعرفة ديالنا باللاهوت الكتابي هو بحال شي لعبة پوزل ديال التصاور المقطعين لأجزاء صغار. ملي كيبان لينا بلي طرف من الپوزل غريب، نقدرو نقبلو على بلاصتها الصحيحة من خلال أننا نربطوها بالصورة الكبيرة. كلما لقينا البلاصة الصحيحة ديال كل صورة صغيرة، كلما كان سهل علينا نلقاو البلايص ديال كل صورة خرا صغيرة، وكيسهال علينا نشوفو كيفاش يتربطو

بالصورة الكبيرة وهاكدا نقدرو نتجنبو نطبحو في الأخطاء. راه الفهم الصحيح ديال اللاهوت الكِتَابِي هو بحال نفهمو الصورة الكبيرة ديال البولز، وهادشي كيخلينا نكونو قادرين نقبلو الصورة الصغيرة ونعرفو بلاصتها في الصورة الكبيرة. الرسول بولس هدر على كل الأمور اللي وقعت لشعب الله، واللي الله كتبها في الكتاب ديالو وقال: "وَهَذَا الْأُمُورُ كُلُّهَا وَقَعَاتٌ لِيَهُمْ بَاشْ تُكُونُ مَثَالًا، وَتُكْتَبَاتُ لِيَنَا حُنَا اللَّيْ كُنْعِيشُو فُهَذَا الزَّمَانُ بَاشْ تُنَبِّهْنَا" (1 كورنتوس 10: 11)، راه المعرفة ديال الكتاب المقدس كتحمي الكنيسة من الخرافات والخلافات اللي ماعمر و كيساليو.

رابعاً، اه الممارسة ديال اللاهوت الكِتَابِي هي حاجة ضرورية باش نطيعو المأمورية العُضْمَى. يسوع المسيح وَصَانَا بَاش نَعَلَمُو كُل الْمُؤْمِنِينَ بَاش يحفضو كل الوصيات ديالو (متى 28: 19-20). بلا عِلْم لاهوت صحيح وقوي، وبلا فهم صحيح للوصايا ديال الله في تطورها التاريخي والسياق ديالها، راه غيكون صعب بزاف نطيعو الوصية ديال الرب باش نعلمو الناس لخرين كيفاش يتبعوه. شنو غنعلموهم؟ شنو غنطيعو؟ كيفاش نقدرو نعرفو شمن حق خاصنا نطبقوه في حياتنا؟ غنقدرو نجاوبو على الأسئلة المهمة بشكل صحيح ومزيان ملي نكونو كمسيحيين عارفين وفاهمين عِلْم اللاهوت الكِتَابِي ونكونو عارفين الله ديالنا.

ولكن كنضن بلي أهم فائدة في عِلْم اللاهوت الكِتَابِي هي أنه كيعمق وكيقوي الفهم ديالنا بالإنجيل. يسوع المسيح والرُّسُل ديالو ماكانوش محتاجين للعهد الجديد باش يبشرو بالإنجيل. هما عتامدو على العهد القديم وفهمو بلي الكتوب ديال العهد القديم كلهم كيهدر على المسيح يسوع (لوقا 24: 27، 44-45). المؤمن اللاهوتي الكِتَابِي كيتبع نفس الطريق ديال يسوع والرُّسُل من خلال أنه كيتعمق وكيفهم الكتاب المقدس كقصة وحدة، وديما كيخلي قدام عينيه المسيح والإنجيل.

كيفاش تولّي عضو سليم في الكنيسة من خلال أنك تولّي متمكّن من اللاهوت الكِتَابِي

كيفاش المؤمن المسيحي يقدر يولّي عضو سليم في الكنيسة متمكّن من المواضيع ديال اللاهوت الكِتَابِي؟ كايين بزّاف ديال الإستراتيجيات اللي كيعاونو.

قرا شي كتاب مزيان كيهدر على علم اللاهوت الكِتَابِي

واحد الطريق من الطُرق اللي باينين باش تولّي لاهوتي كِتَابِي هي أنك تقرا شي كتاب مزيان على علم اللاهوت الكِتَابِي. كايين بزّاف ديال الكتب اللي مزيانين بزّاف ويقدرو يعاونوك. بغيت نقترح واحد الكتاب سميتو "المُعجم الجديد للاهوت الكِتَابِي"⁷. وإلا بغيتي تبدا بخطوات صغار وتقرا غير مُقدمات للاهوت الكِتَابِي خليني نقترح عليك هاد العناوين:

- صورة الله الكبيرة: التتبع ديال خط قصة الكتاب المقدس (فون روبرتس)
- سمفونية الكتاب المقدس: نفهمو المواضيع المتنوعة ديال الكتاب المقدس (مارك ستورم)
- في القلب ديال الكون: باش كيأمنو المسيحيين (بيتر جينسن)
- حسب الخطة: الضهور المتدرّج ديال الله في الكتاب المقدس (غرايمي گولدسُوردي)

⁷ القاموس الجديد لعلم اللاهوت الكِتَابِي: استكشاف وحدة وتنوع الكتاب المقدس، تحرير ت. ديزموند ألكسندر، بريان س. روزنر، د. أ. كارسون، جرايم جولسورثي (داونرز جروف، إلينوي: إنترفارستي، 2000).

• التلّائية ديال گولدسُووردي: الإنجيل والمملكة،
الإنجيل والحكمة، والإنجيل في الرّؤيا (گرايمي
گولدسُووردي)⁸

السلسلة ديال "الدراسات الجديدة في اللاهوت الكتّابي"⁹ ديال د. أ. كارسون هي سلسلة مزيانة بزّاف. هاد السلسلة كتقدّم لمحات عامة قوية على الوحدة ديال الكتاب المقدس والتنوّع ديالو. وبالنسبة لللاهوت الكتّابي المتعمّق كتر: اللاهوتي الهولندي "غيرهاردوس فوس" كتب كتاب زوين كيتعمّق في اللاهوت الكتّابي سميتو "اللاهوت الكتّابي: العهدين القديم والجديد"¹⁰ هاد الكتاب هو مازال كيّعتّابر من الكُتُب الكلاسيكية والمعروفة في هاد المجال. ستعمل هاد الموارد في القرّاية ديالك اليومية للكتاب المقدّس. قترح على القائد ديال مجموعتك الصغيرة باش تقراو شي كتاب أولاً كتوب بحال هاد العناوين الّتي قترحت عليكم.

درس الكتابات من خلال المواضيع الكتابية

خصص جزء من الوقت ديال القرّاية اليومية ديالك باش تدرس الكتاب المقدس بشكل موضوعي (يعني تدرس المواضيع ديالو عوض تقراه فصل بفصل). أكيد راه أحسن طريقة باش نقراو الكتاب المقدّس هي نتبعو فصل بفصل وأية بأية بلا مانقروو باش مانجاهلوش السياق ديال كلام الله. خاصّك تقرا الكتاب المقدّس في وقت العبادة ديالك اليومية بهاد الطريقة، ولكن مزيان تاخذ شوية ديال الوقت باش تدرس المواضيع الرئيسية الّتي

⁸ فون روبرتس، الصورة الكبيرة لله: تتبع قصة الكتاب المقدس (داونرز جروف، إلينوي: إنترفارستي، 2003)؛ مارك ستروم، سيمفونية الكتاب المقدس: فهم المواضيع ديال الكتاب المقدس الكثيرة (فيليبسبرج، نيو جيرسي: بي أند آر، 2001)؛ بيتر جينسن، في قلب الكون: بشنو كيؤمنو المسيحيون (داونرز جروف، إلينوي: إنترفارستي، 2003)؛ جرايم جولدسورثي، حسب الخطة: الكشف المتكشّف على الله في الكتاب المقدس (داونرز جروف، إلينوي: إنترفارستي، 2002)؛ جرايم جولدسورثي، التلّائية ديال گولدسُووردي: الإنجيل والمملكة، الإنجيل والحكمة، والإنجيل في الرّؤيا (كارلايل، المملكة المتحدة: باتيرنوستر)، 2001.
⁹ د. أ. كارسون، محرر، دراسات جديدة في اللاهوت الكتّابي (داونرز جروف، إلينوي: إنترفارستي، 2001).
¹⁰ جير هاردوس فوس، اللاهوت الكتّابي: العهد القديم والعهد الجديد (إنبرة: راية الحق، 1975).

كأينة في الكتاب المقدس كامل. دوز شوية ديال الوقت باش تفكر في شنو كيعلن لنا الكتاب المقدس على شخصية الله؛ الوحدة والتنوع ديال عهد الله مع الشعب ديالو؛ النبوة والكهنوت والمملك ديال يسوع. ومملكة الله في العهد القديم والجديد. تبع هاد المواضيع في الكتاب المقدس كلو ولاحض كيفاش كيستمترو أولا كيتخبعو في أوقات مختلفة في التاريخ ديال الفداء. ونتا كتدير هادشي، غادي تبان ليك العضمة ديال الله والمجد ديال الفداء ديالو بطريقة واضحة كتر وعتشوف الحكمة ديال خطة الله.

تبنا نفس الفكرة ديال العهد الجديد على العهد القديم

كيما سبق ليا وقلت، راه الكتاب المقدس هو قصة وحدة كتشرح لنا كيفاش الله فدا لنفسو شعب خاص. ملي تكون كتدرس العهد الجديد، درّب راسك باش ديما تربط كل حاجة كتتعلمها بالعهد القديم. تقدر تطرح بحال هاد الأسئلة:

- كيفاش هاد الآيات هما إكمال لشي وعد إلهي في العهد القديم؟
- كيفاش هاد الكفرة في العهد الجديد هي مختلفة أولا كتتشابه مع شي تعليم من العهد القديم؟
- كيفاش هاد الفقرة أولا هاد الآيات في العهد الجديد كيشرحو أولا كيكشفو أولا كيزيدو يبنيو على شي حق من العهد القديم؟

هاد الأسئلة غادي يعاونوك باش تشوف الوحدّة والتنوع ديال الكتاب المقدس والرسالة ديالو. الرسالة ديال العبرانيين هي ممتازة وبلاصة مزيانة باش ندرسو كلمة الله ونشوف الأجوبة على هاد الأسئلة. درس الرسالة

للعبرانيين وغادي تتفاجئ من سمو والسيادة والحكمة ديال يسوع المسيح
اللي سبق الله وراها في العهد القديم.

درس العهد القديم من خلال النور ديال يسوع والعهد الجديد

ملي تكون كتقرا وكتدرس العهد القديم، سول راسك كيفاش كيتناسب
داكشي اللي كتقراه مع الوحي المكتوب في العهد الجديد. متلاً تقدر تسول:

- شمن نقطة في المسار ديال تاريخ الغداء كاينة الفقرة
اللي كندرس؟
- كيفاش هاد الفقرة كتشير للمسيح؟
- كيفاش هاد الحق على شعب إسرائيل مرتابط بالحق
ديال الكنيسة ديال العهد الجديد؟
- كيفاش هاد الفقرة كتعاوننا نفهمو الإيمان المسيحي
ديال العهد الجديد؟ كيفاش هاد الفكرة أولا التعليم
في العهد القديم كيستمر في العهد الجديد أولا واش
مقتاصر غير على العهد القديم بوحدو؟
- شمن آيات أولا شمن فقرة في العهد الجديد يقدر
يعاونوني باش نجاوب على هاد الأسئلة؟

راه التلميد اللي كيدرس اللاهوت الكتابي كيفهم مزيال الإستمرارية
والتكامل ديال القصة الكبيرة الرئيسية في الكتاب المقدس كلو.

درس الكُتب النبوية في العهد القديم

كنضن بلي الكُتوب ديال العهد القديم اللي الأغلبية ديال المؤمنين
كيهملوهم هما الكُتب ديال النبوات، خصوصاً المجموعة ديال الكُتب اللي

كيتسمّاو بـ "كُتُب الأنبياء الصغار". الكُتُب النبوية كتر من أي كتوب خرين في الكتاب المقدس هما عامرين بالتعليم على حياة يسوع المسيح والخدمة ديالو والسّمُو ديالو. متلاً مَلّي تدرس إشعياء أولاً زكريا، ماتنساش بَلّي النبوات ديالهم يمكن تتحقق في مستويات مختلفين. كان ممكن باش تتحقق أي نبوءة بأي طريقة في الوقت ديال داك النبي اللّي كتب النبوءة. وفي نفس الوقت ديك النبوءة براسها تقدر تكون نبوءة "مسيانية" يعني كتهدر على المسيا اللّي معناها المسيح وهكذا عندها تحقيق آخر فيه. وحتّى النبوءة يقدر يكون عندها علاقة بـ "علم آخر الزمان"، يعني عندها تحقيق أُخر في الأخير ديال الزمان مَلّي يكمل كلشي ويرجع المسيح. الدراسة ديال النبوات والفهم ديالهم بهاد الطريقة كيعاونونا نشوفو ونفهمو الصورة الكبيرة اللّي كيعلنها الكتاب المقدس وكيعاونونا نعمقو المعرفة ديالنا بالله.

خاصك تعرف البيان ديال الإيمان ديال كنيستك وخاصك تكون واجد تدمو

مَلّي كتنضمّو لشي كنيسة، خاصنا نعرفو شنو كتأمن بيه الكنيسة باش نعرفو واش حنا متآفقين مع التعاليم والإيمان ديالها. هادشي علاش خاصك تلتزم باش تدرس وتعرف بيان الإيمان ديال الكنيسة. واش العقيدة اللّي كتأمن بيها الكنيسة هي سليمة وكتابية؟ واش هو إيمان خاص غير بديك الكنيسة المحلية؟ واش كيتوافق بيان الإيمان ديالها مع الإيمان التقليدي المسيحي العام؟ واش فهمتي البنود ديال البيان؟ بعض الكنائس كيطلبو واحد القاعدة صحّية ومفيدة، كيطلبو من الأعضاء الجداد يسنيو على بيان إيمان الكنيسة كدليل على الموافقة ديالهم على البنود ديال بيان الإيمان وبَلّي هما مستعدّين يدافعو على الحق اللّي كاين فيه. رواشاه تقدر بضمير مرتاح تسني على بيان إيمان كنيستك؟ إلا الجواب ديالك هو أه، راه خاصك تحافض على السلامة والصحة ديال العقيدة ديال كنيستك.

قلب على الوحدة ديال العقيدة وتجنّب الصراعات اللي ماشي ضروريين

مزة مزة كييانو الإختلافات في العقيدة في الكنيسة المحلية. السؤال الرئيسي اللي كيوافه الأعضاء في هاد الحالة هو: "كيفاش غادي تعاون باش تلقاو حل لبحال هاد الإختلافات؟" كايين واحد المبدأ قديم غيفيدنا بزّاف هنا: "الوحدة هي الأساسية؛ الحرية هي الضرورية؛ والمحبة هي كلشي". عضو الكنيسة السليم اللي ملتاظم باش يوّلي لاهوتي كتابي، خاصو يعرف الفرق بين المعتقدات الأساسية ديال المسيحية الكتابية والمعتقدات اللي ماشي أساسية للسلامة والاستمرارية ديال الإيمان ديالنا. أعضاء الكنيسة السليمين كيكرسو نفوسهم باش يدافعو على الأمور الأساسية ديال الإنجيل (فيلبي 1: 27؛ يهودا الآية 3)، وفي نفس الوقت كيحاولو يتجنبو المدايزات والصراعات اللي كيدورو على أمور ماشي أساسية للإنجيل. الدرس اللي علّمو الرسول بولس لتيموتاوس هو مهم بزّاف في هاد النقطة:

"فَكَزَّهُمْ بِهَذَا الْأُمُورِ، وَظَلَبْ مِنْهُمْ بِكُلِّ قُوَّةٍ فُدَّامَ اللَّهِ بَاشَ مَا يَدْخُلُوشْ فَأَلْمَنَاقِشَاتِ الْخَاوِيَيْنِ اللَّيِّ مَا كَيْصَلَّاحُو لَوَالُو، وَغَيْرِ كَيْخَرَّبُو هَادُوْكَ اللَّيِّ كَيْسَمْعُوهُمْ. دِيرْ جَهْدُكَ بَاشْ تُكُونْ مُقْبُولْ عِنْدَ اللَّهِ بِحَالِ الْخُدَامِ اللَّيِّ مَا كَيْخَشْمُشْ مِنْ الْخُدْمَةِ دِيَالِهِ، وَكَيْفَسِّرْ كَلَامَ الْحَقِّ تَفْسِيرْ صَحِيحْ. وَلَكِنْ الْكَلَامِ الْخَاوِي الْمُنْجُوسِ بَعْدَ عَلَيْهِ، حَيْثُ مَالِيهِ كَيْزِيدُو يُكْفَرُو. وَكَلَامُهُمْ كَيْسْرُخْ بِحَالِ الْمَرَضِ الْخَائِبِ" (2 تيموتاوس 2: 14-17)

من واحد الناحية، خاصنا نكونو ناس جدّيين في التعامل ديالنا بشكل صحيح مع كلمة الحق؛ ومن ناحية خرا، خاصنا نكون أبرياء ومانخلقوش خِلافات ومدايزات على أمور ثانوية ماعندهاش قيمة كبيرة. راه الصّراع والمدايزة على الأمور التافهة واللي ماشي مهمة كيهدم الناس اللي كيسمعو، وكبخلي الناس يتلفو كتر وكتر. خاصنا نخدمو ونجتاهدو من أجل الوحدة

في الإيمان والسلام في كنائسنا، ماخصناش ننساو بلي شنو كيقول النبي سليمان: "مجد الإنسان هو يبعد من الخصام، وكل إنسان جاهل كيتادبز" (أمثال 20: 3).

الخلاصة

كيقول جي. آي. باكر بلي المعرفة ديال الله كتبدا بالمعرفة عليه وعلى شخصيتو. وكيعني بلي خاصني نعطي نفسي لله على حسب الوعد ديالو بلي غادي يكون إله ديالي من خلال التوبة والإيمان بولدو يسوع المسيح. إذن راه معرفة الله كتعني نتبع يسوع بصيفتي تلميذ. وفي الأخير، راه معرفة الله كتعني أنني نكون "كتر من محارب" من خلال أنني نكتافي بالله في كل شي. هاد المعرفة ديال الله كتجي غير منين كناكلو بشكل عميق الرسالة ديال الكتاب المقدس بكل المواضيع الغنية ديالو. وبحال هاد المعرفة ديال الله هي معطية بشكل خاص للأعضاء المؤمنين ديال الكنيسة اللي كيلتازمو باش يوليوا لاهوتين كتابيين.

باش تزيد تتعمق في التفكير

1. شنو هو المستوى ديال معرفتك باللاهوت الكتابي؟
واش تقدر تشرح لشي مؤمن جديد أولا شخص ماشي مؤمن بالمسيح كيفاش الكتاب المقدس كامل منساجم مع بعضو في كتاب واحد؟
2. شنو هما البرامج اللي بغيتي تتبع باش تقوي معرفتك بعلم اللاهوت الكتابي؟

العلامة 3:

عضو الكنيسة السليم كيكون متشبع بالإنجيل

أكبر حاجة كيحتاجها العالم اليوم هي الإنجيل. الإنجيل هو أعظم إحتياج في العالم حيث كل الناس، رجال وعيالات ودراري صغار كيتهلكو بلا معرفة كافية بالله الّلي تقدر تعطيمهم الحياة من خلال خبار لخير ديال ولدو مُخلصنا ويسوع المسيح.

راه أعظم وأكبر إحتياج كاين في الكنيسة فالعصر ديالنا هو الإنجيل. راه الإنجيل هو ماشي غير شي خبار الّلي كيحتاجو يسمعوها الناس الّلي ماشي مؤمنين وصافي، ولكن راه في نفس الوقت هو الرسالة الّلي كتبني الكنيسة وكتحافظ عليها وكتقويها. إلا ماكاينش الإنجيل، راه الكنيسة ماغيكون عندها ماتقول- يعني ماغتكونش شي حاجة الّلي غير الكنيسة تقدر تقولها وفي نفس الوقت العالم مايقدرش يعرفها أولا يقولها حتى هو. راه الإنجيل هو الّلي كيميز الكنيسة على العالم، هو الّلي كيحدّد الرسالة ديالها للعالم والمهمّة ديالها في العالم، راه الإنجيل هو الّلي كيحمي كل الشعب ديال الله من الهجومات ديال الشيطان والكدوب ديال الدنوب. راه الإنجيل هو بالحق ضروري بزّاف للمؤمن المسيحي والكنيسة المسيحية باش يكونو كلهم عامرين بالحياة والفرحة والقوة والرجاء والصحة الروحية الّلي ضرورين. راه الإنجيل هو ضروري في الحياة ديالنا المسيحية لدرجة أننا كحتاجو نكونو متشبعين بيه وعامرين بيه باش نكونو أعضاء سليمين في الكنيسة.

كيفاش تويّ عامر بالإنجيل

إذن كيفاش نقدر نتعمقو في الإنجيل؟ شمن طريق يقدر يوصلنا لصحة روحية قوية؟

خاصك تعرف الإنجيل

أول حاجة هي أننا خاصنا نعرفو الإنجيل. هاد النقطة هي واضحة وباينة لدرجة أننا نقدر نحسو بحال إلا غير كنضيعو الوقت إلا عاودنا هدرنا عليها. ولكن في الحقيقة، بزّاف ديال المسيحيين المؤمنين الحقيقيين عندهم فهم سطحي للإنجيل من بعد سنين وهما كيسمعو "عُرُوض سطحية للإنجيل". بزّاف ديال المؤمنين بالمسيح مازال كيلقاو ريسهم واحلين وماقادرينش يشاركو خبار الخير ديال الإنجيل بشكل واضح مع العائلة والأصدقاء. إذن راه ضروري نجتاهدو ونخدمو باش نتأكدو بلي كنعرفو الإنجيل بشكل واضح وعميق.

غيكون مُفيد بزّاف لينا باش يوضحو لينا بعض الأفكار المنتاشرين اللي هما في الحقيقة ماشي إنجيل. الإنجيل بكل بساطة ماكيعنيش (أ) بلي حنا بخير وعلى خير، (ب) بلي الله محبة، (ج) بلي يسوع بغا يكون صديق قريب ليك، أولا (د) بلي خاصنا نعيشو بشكل صحيح وبالتقوى.¹¹ وفي نفس الوقت راه الإنجيل ماكيعنيش بلي كل المشاكل ديالنا غاديين يتصلحو إلا تبعنا يسوع، أولا بلي الله بغانا نكونو بصحة مزبانة وشبعانين وحُكماء. كل هاد الأفكار يقدر يكونو صحاح من واحد الناحية، ولكن بشكل جزئي وصافي، حيث هادا هو التعبير أولا التفسير الكامل ديال معنى الإنجيل.

راه المعنى الحرفي ديال كلمة "إنجيل" يسوع المسيح هو "خبار لخير". حيث هو خَبْر، راه داخل فيها شي كلام وإعلان حقيقي وفيه الحق اللي جاي من داك الإعلان. وراه الإنجيل بصيقتو خبار ديال الخير هاز معاه رجاء مبني

¹¹ مارك ديفر، تسعود ديال العلامات للكنيسة الصحية (ويتون، إلبنوي: كروسواي، 2004). الفصل الثالث.

على الوعود ديال الله ومرتاكز على الأحداث التاريخية والحق التاريخي اللي
كبيرهنو على دوك الوعود.

راه الإنجيل أولا الأخبار السارة على يسوع المسيح هي أن الله الآب،
القدوس والبار في كل أعمالو، هو غاضب من الناس المُنذنين وغادي
يعاقب على الذنوب. الإنسان اللي كيخالف الوصايا ديال الله كيْتَفصل من
محبة الله وكيواجه خطر الدينونة الأبدية المؤلمة على يد الله. ولكن الله
الغني بالرحمة بسبب محبتو الكبيرة صيفط ولدو الأبدي اللي تولد من مريم
العدراء، باش يموت كفداء في بلاصتنا باش ياخذ العقوبة ديال الذنوب ديال
كل واحد كيأمن بيه. ودابا، من خلال الطاعة الكاملة ديال ولد الله والموت
ديالو على الصليب اللي خلّص تمن الدين ديال دنوبنا، راه كل إنسان كيتوب
من دنوبو وكيأمن بيسوع المسيح، وكيقبلو كمخلص ورتب وكيبتبعو، غادي
ينجا من الغضب ديال الله اللي جاي، تما الله كيعلن بلي هاد الإنسان تقي
وبار، وكيأخذ الحياة الأبدية، وكيأخذ روح الله بصيْفَة عربون للمجد اللي
غنعيشوه في الجنة مع الله براسو.

بكل إختصار راه هادي هي الرسالة اللي خاصنا نزرعو في فكرنا وإيماننا
واللي خاصنا نفرحو بيها إلا بغينا نكونز أعضاء سليمين في الكنيسة.

**غاصك تبغي تسمع الإنجيل وخاصك
تبشّر بالإنجيل لراسك**

خاصنا نبنيو رغبة قوية لهاد الرسالة وخاصنا نحميوها. راه الإستماع
الدايم للإنجيل والتعمق فيه كيقوي المعرفة ديالنا بالرسالة، وكيقوي
محبتنا للمخلص، وكيقوي القدرة ديالنا باش نشاركو الرسالة.

هادشي علاش راه خاصنا نسمعو بنشاط للإنجيل والتطبيقات ديال
الإنجيل في الوعض. ماتسدش وذنك ملي يبدأ الراعي يبشّر الناس اللي

ماشي مسيحين برسالة الإنجيل. فتح ودنيك وقلبك وعاود سمع. زيد قوَي إيمانك بالحق ديال الإنجيل وبالوعود ديالو والقوة ديالو في حياتك. حط الإنجيل قدام أي دنب الله كيكشف عليه في حياتك من خلال الوعض أولا ملّي كتبدا تفحص راسك. هز عينيك باش تشوف الدنوب ديالك مسمرين فوق الصليب ملّي تكون كتسمع لخبار الخير ديال الإنجيل. تأمل في واش كينين شي وعود أولا جوانب جداد للإنجيل أول مرّة كتسمعهم في الوعض. كيفاش غادي تقبل وتعيش هاد الحق؟

سمع بنشاط وشوق لهاد الأخبار حتى تبدا روحك تحس بالعطش والجوع كل مرّة ماكتسمعش للوعض بالإنجيل. وملّي تلقا راسك جيعان أولا مشتاق لهاد الحق، بشّر بالإنجيل لراسك. الإنجيل هو رسالة تعطات ليك وتعطات على ودك. قبلها وعطي حياتك ليها. عوض غير تسمع للوعض ديال ناس خرين، أولا غير تسمع لداك الصوت اللي غير كبيرزتك بالشكوك والتخمام والخوف، سمع لصوت الله في الإنجيل من خلال أنك تبشّر لراسك. سي. جي. ماهاني (C. J. Mahaney) في كتابو المتميز والمفيد "عيش حياة مركزة في الصليب: خلي الإنجيل هو المركز"، "ماهاني" كيشجعنا نفحصو الإنجيل، ونصلبو بالإنجيل، ونرتمو الإنجيل، ونتأملو في كيفاش الإنجيل غيرنا، وندرسو الإنجيل.

تبع الإنجيل حتى توصل للخلاصة ديالو

ملّي تكون كتفكر وكتتأمل في الأحداث والوعود ديالو الإنجيل، زيد كمل حتى توصل للختام ديال الإنجيل. چون باير كيفكرنا بلي الله هو الإنجيل، وبلي الإنجيل هو الرسالة اللي كتعلن لينا بلي الله عطا نفسو لينا حيت كيحبنا، قال باير:

إلا الأحداث ديال الإنجيل في الجمعة العظيمة وعيد الفصح وعود الإنجيل بالتبرير والحياة الأبدية مازال ماوصلوكش

تشوف في الله بنفسو وتقبلو على أنه أعظم وأعلى فرح في حياتك، راه هنا غتكون مازال مافهمتيش إنجيل الله. تقدر تكون خديتي بعض البركات والمكافآت من الله وتقدر تكون فرحتي بهادشي. وتقدر تكون فهمتي وتأمّلتني في شي معجزات ديالو. ولكن في نفس الوقت تقدر تكون مازال ماحليتيش عينيك باش تشوف وتفهم علاشة هاد البركات والمكافآت والمعجزات كائنين. هما كائنين لسبب واحد عظيم: باش نشوفو المجد ديال الله في المسيح إلى الأبد، وتما نقدرو نوليّو في هاد النوع من الناس اللي كيفرحو بالله فوق كل شي، وبكل سعادة نعلنو الجمال والبهاء ديالو السامي ومجدو الدائم للأبد.¹²

نضم حياتك على أساس الإنجيل

كأعضاء في الكنيسة، هدفنا هو نفهمو الإنجيل بشكل عميق وبشكل شخصي حتى يعطي الحياة لكل جزء في حياتنا. بغينا الإنجيل يكون هو الأساس في تواصلنا مع الناس، هو الأساس في كيفاش كنشجعو وكنصححو بعضياتنا، بغيناه يكون هو الأساس في قرارات حياتنا المهنية وعلاقتنا، بغيناه يكون هو الأساس في القرارات اللي كتأخذهم الكنيسة بشكل جماعي، والأساس في كل عادات حياتنا. بغينا باش يكون الإنجيل والإله ديال الإنجيل هما الأولوية في كل مجالات الحياة ديالنا. أعضاء الكنيسة اللي عامرين بالإنجيل خاص يكون عندهم بزاف ديال الإستراتيجيات باش ينضمو حياتهم على أساس خبار الخير ديال يسوع المسيح:

- نحاولو نمشيو لنفس الحانوت أولا نفس المطاعم
أولا أي بلاصة في مدينتنا باش نحاولو نبنو علاقات

¹² جون باير، الله هو الإنجيل: تأملات في محبة الله كهدية منو (ويتون، إلينوي: كروسواي، 2005)، 38.

- مع الناس اللّي كيخدمو تمّا، ونقلبو على فُرص باش نبدأو حوارات ونشاركو معاهم خبار الخير.
- نستغلو العطل ديالنا ونديرو رحلات تبشيرية قصار.
- نتطوعو في الجمعيات أولا الخيرات المحلية باش نخلي أتر الإنجيل في حياة الناس.
- نقدرو ننضمو لإتماعات في الديور فين نقدرو نفتحو باب الحوار بين الأديان والفلسفات.
- نعرضو على جيرانا باش ياكلو معنا أولا في المناسبات باش نهذرو معاهم على المسيح.
- نبدأو دراسات الكتاب المقدّس في الخدمة إلاكائية الإمكانية.
- ندخلو في المُجتمع ديال الحومة إلاكين، بحال شي مجموعة ديال النظافة، أولا ديال الأمن، أولا ديال الرياضات، باش نبنو علاقات ونفتحو باب قدّام الإنجيل.
- نعرضو على صحابنا للإتماعات ديال الكنائس والأنشطة الروحية فين الإنجيل غادي يكون هو المركز ديال كلشي.
- خاصنا نكونو عارفين بلّي ماكينش شي خطر باش نشاركو الإنجيل، كائنه غير المكافأة من الرب والأمانة ديالنا. خاصنا نكونو "ديما واجدين ومستعدّين" باش نشاركو كلام الحياة.

شارك الإنجيل مع الناس لخرين

بعض المرّات كيبان لينا بحال أن بعض المسيحيين كيفكرو بلّي خاص الناس يبشّرو بالإنجيل في كل بلاصة ممكنة حتّى يوصل لعندهم وتمّا صافي كتكون العملية سالات وغير خاصهم يخبعوه في شي خزنة في حياتهم

الشخصية ويعدوه من الناس لخرين. يقدرو المسيحين يفكرو بلي التبشير الصحيح يعني غير يشاركو الشهادات دياولهم أولا يعيشو حياة مسيحية مزيانة. بلا شك راه هادي حتى هي شهادة للإنجيل، نوع من التبشير. ولكن واش هي شهادة على الصليب ديال يسوع المسيح؟ واش "الشهادة" من خلال شهادتنا الشخصية وأعمالنا الصالحة كيشيرو بشكل كافي للصليب وللمخلص؟

في الأغلبية ديال الحالات، بحال هاد المحاولات غير كيخليو فكرة غامضة ديال التدين السطحي وصافي، وماكتكونش شهادة واضحة وكافية باش توزي المجد ديال الله من خلال الخطة ديالو باش يفدي المدينين من خلال التضحية ديال ولدو يسوع. إلا كنا بغينا نسامو في الصحة والسلامة الروحية ديال خوتنا في الكنيسة المحلية، راه خاصنا نلتازمو ماشي غير باش نحصدو الإنجيل للمنفعة دبالنا الشخصية ولكن خاصنا نحصدو لنفوسنا وللناس الخرين. خاصنا نديرو الخدمة ديال المبشر. بشكل مستعجل وبكل محبة خاصنا نهדרو مع كل شخص قريب لينا ماشي مؤمن بالمسيح ونعطيوه دعوة باش يتوب من الذنوب ديالو وباش يأمن بيسوع المسيح. خاصنا نقولو لهاد الناس بلي الإيمان بالله مايعطيش حياة ساهلة، ولكن واخا هكداك راه القرار كيستحق منا كلشي. راه الغفران والسلام اللي ارواحنا كيقلبو عليهم موجودين غير في يسوع المسيح.

عندنا فرصة باش نحسنو الخدمة ديال الراعي دبالنا من خلال أننا نغرسو الزريعة ديال الإنجيل ونسقيوها واخا يكون الراعي كيزرع وكيسقي الإنجيل من خلال الوعض من المنبر ديال الكنيسة. نقدرو نسلمو على الناس اللي كيزورو الكنيسة ونقدرو نهדרو معاهم ونقدرو نعرضو على صحابنا والناس في عائلاتنا اللي ماشي مؤمنين باش يجيو. وخاصنا نستغلو المناسبة والفرصة ديال زيارتهم باش نهדרو معاهم على الأمور الروحية، ونقدرو نهדרو معاهم خصوصاً على شنو فهمو من البشارة و واش قبلوها

أولا رفضوها. نقدرو نتلاقوا مع مسيحين خرين غير باش نصليو ونفكرو في الفُرس باش نبشرو بالإنجيل. الحياة المتبشعة بالإنجيل هي حياة كتفيض بخبار الخير ديال الإنجيل على الناس لخرين. من واحد الجبهة راه الكنيسة السليمة كتبنا على أعضاء عندهم صحة روحية مزيانة والإنجيل هو اللي كيقودهم وكيحزكهم.

حامي على الإنجيل

في الأخير، راه العضو السليم ديال الكنيسة كياخذ بجدية المسؤولية ديال حماية الإنجيل من الفساد واللامبالاة. واضح لينا أن العهد الجديد كيحط هاد المسؤولية في النهاية على الكتاف ديال كل الخوت أعضاء الكنيسة وماشي غير الرعاة بوحدهم. ملي الكنائس في الجبهة ديال غلاطية تشوشو بسباب المعلمين الكدابة اللي كانو كيحاولو يزيدو الختانة كخطوة ضرورية في الإيمان بالإنجيل، راه الرسول بولس ماكتبش رسالة للرعاة والشيوخ ولكن راه كتب للخوت كلهم في دوك الكنائس. الرسول هدر مع الأعضاء ديال الكنائس في المنطقة ودعاهم باش يحميو الإنجيل اللي بشرهم به. كان قوي في التعليمات اللي عطاهم:

وَلَكِنْ إِلَّا خَبَرْتُمْ شَيْءًا وَاحِدًا، وَاحًا نَكُونُوا حَنَا وَلَا شَيْءَ مَلَائِكُمْ مِنْ السَّمَاءِ، بِإِنْجِيلٍ آخَرَ مِنْ غَيْرِ هَذَاكَ الَّذِي خَبَرْنَاكُمْ بِهِ، رَاهُ غَيِّكُونَ مَلْعُونُونَ. وَكَيْفَ كُنَّا مِنْ قَبْلُ، كَنُكُولُ دَابَا عَاوَاتَانِي: إِلَّا خَبَرْتُمْ شَيْءًا وَاحِدًا بِإِنْجِيلٍ آخَرَ مِنْ غَيْرِ هَذَاكَ الَّذِي قَبَلْتُوهُ، رَاهُ غَيِّكُونَ مَلْعُونُونَ. (غلاطية 1: 8-9)

المؤمنين ديال غلاطية، وكل المؤمنين أعضاء الكنائس في كل العالم وفي كل زمان، خاصهم يردو البال من شنو كيسمعوه في الوعض بالإنجيل. الرسول يوحنا حذر المؤمنين وقال "إلا جاكم شي واحد بتعليم آخر من غير هاد التعليم، ما تقبلوهش فداكم وما تسلموش عليه. حيث اللي سلمت

عليه، كَيْشَارُكُ مُعَاهُ فَأَعْمَالُ الشَّرِّ" (2 يوحنا 10-11). والرسول بطرس فكّر المؤمنين وقال ليهم بلّي الناس اللّي كيتبعو "الفساد" ديال المعلمين الكدّابة بسبابهم الناس "عَيَكُولُو كَلَامَ الكُفْرَ عَلَى طَرِيقِ الحَقِّ" (2 بطرس 2: 2). هادشي علاش الرسول يهودا (ماشى يهودا الإسخريوطي) شجّع المؤمنين وقال في الرسالة ديالو "أَحْوِي العَرَازُ... خَاصُّنِي نُكْتَبْ لِيكُم بَاشْ نُشَجِّعَكُم تَكَا فُحُو عَلَى وَدِّ الإِيْمَانِ اللّي عَظَاهُ اللهُ فَمَرَّةً لِلْمُؤْمِنِينَ دِيَالَهُ الْمُقَدَّسِينَ" (يهودا 3). الأعضاء السليمين ديال الكنيسة والكنيسة حتّى هي كيتحاربو على ود الإنجيل الرسولي اللّي عطاه لبنا الله وحافض عليه في الكلمة ديالو المقدسة وكيجاهدو باش يحميوه. ملّي ماكنتحملوش هاد المسؤولية وماكتردّوش البال باش نفهمو ونطبّقو الإنجيل، راه كينخلّيوه يغمل ويخسر بحال الحليب وتمّا المعلمين الكدّابة اللّي ما عندهم ضمير كيستعلموه على ود الرغبات ديالهم الشريرة.

الخُلاصة

في إنجيل يسوع المسيح، الله عطا نفسو للمُدنّبين وعلى ود المُدنّبين. راه الإنجيل هو اللّي كيخلّينا نفهمو المحبة ديال الله ونشوفو الفساد ديالنا واحتياجنا للفداء والفرصة الوحيدة باش نعيشو الفرح الأبدى هي من خلال عبادة الله. راه هاد الإنجيل بنفسو، والفهم الصحيح والسليم ديالو، هو اللّي كيغطي الصحة الروحية والقوة لأعضاء الكنيسة المسيحية. أجبو نتشبعو به!

باش تزيد تتعمّق في التفكير

شنو هما الاستراتيجيات اللّي غتطبّق في حياتك باش تحافض على تفكيرك في الإنجيل وفي التطبيق ديالو والمشاركة ديالو مع الناس؟

العلامة 4:

عضو الكنيسة السليم كيكون بالحق تغيّر

صاحبي كورتيس (Curtis) عندو فرحة مسيحية كتعادي. هو كيحب الرب وعندو غيرة على التبشير. الحماس ديال كورتيس كيتميز بالرغبة ديالو باش "يدير كل ما في جهدو" باش يشارك خبار الخير مع أي شخص ويحاول يقنعو باش "يأمن بالمسيح".

واحد النهار، صاحبي كورتيس بالفرح اللي ديما فيه قال ليا بلي واحد الصديق اللي بجوجنا كنعرفوه، سميتو كيني، أمن و "تولد من الروح". تفاجئت من الطريقة باش هدر معايا كورتيس والكلام اللي ختار باش يشارك معايا هاد الأخبار. ومن بعد سؤلتو وقلت ليه "كيفاش كتعرف بلي هو "تولد من الروح"؟".

حبس شوية كورتيس، وميل راسو بالفضول بحال إلا تفاجئ شوي بالسؤال ديالي وقال ليا "شنو بغيتي تقول؟".

"واخا، كيفاش تقدر تكون متأكد بلي واحد الإنسان هو تولد من الروح؟"

وتما كورتيس رتاح وتطلق وقال "أه. هادشي سهل. من بعدما سالا الاجتماع ديال الكنيسة جا قدام الكنيسة وصلّي وعلن بلي أمن المسيح – هادي هي نفس الطريقة اللي بيها بزاف ديال الناس آمنو".

بعد تقريبًا شي عام من الحوار ديابي مع كورتيس، تآصل وكان حزين ومشوّش. كان كيواجه واحد المشكلة اللي كانت كتبرزطو بشكل متكرّر- هاد المرة صديقنا كيني كان هو السبب. قال ليا كورتيس كيفاش كيني بدا الحياة المسيحية بشكل مزيان، وكان ديما كيحضر للإجتماعات ديال الكنيسة، وكان كيصلّي بحرارة وبقوّة، وكان ديما كيخرج مع الكنيسة باش يبشّرو في الشارع، ومرة مّرة كيخرج بزاف ديال الأحاسيس وكيبان متأثر في الروح في وقت العبادة. قال ليا كورتيس: "العام اللّول كان عام زوين بزّاف. ولكن من بعد هادشي، كيني بدا كيرجع اللّور. بحال إلا بدا كيتقاضا أولا كيتطفا شوي بشوي ... ودابا هو كييعاني من مشاكل زوجية وكيفكّر يخلي الإيمان ديالو بالمسيح".

وبقينا بجوج ساكتين في التيليفون شوي. ومن بعد سّولني كورتيس "واش كتضن بلي كيني بالحق كان مؤمن وكان عندو الخلاص ديال المسيح؟ كيفاش تقدر تعرف واش شي شخص بالحق تولد من الروح؟"

خاصنا نفهمو التغيير للإيمان بشكل صحيح

وحنا كنفكرو وكنهدرو على القائمة ديال الأمور اللي خاص العضو السليم ديال الكنيسة يديرهم، هنا نقدرو نغتانمو الفرصة باش نهدرو على الحاجة اللّولى اللي خاص تكون في القائمة - عضو الكنيسة السليم خاصو يختابر التغيير الحقيقي ديال الروح القدس عضو الكنيسة السليم والحقيقي خاصو يعرف ويشوف الخدمة اللي كتدير النعمة ديال الله لداخل في الروح ديالو. كلنا خاصنا نختابرو التغيير اللي كيديرو فينا الروح القدس. هاد الحق يقدر يبان واضح وباين، ولكن كنضن بلي تقريبًا 40 في المية ديال الناس اللي درت ليهم المقابلة باش يوليوا أعضاء في الكنيسة ديانا قالو ليا بلي دازو من أوقات فين كانوا فيه أعضاء في كنيسة خرا وفي نفس الوقت ماكانوش فاهمين الإنجيل، وحسب التفكير ديالهم ماكانوش ختابرو التغيير الحقيقي

ديال الروح القدس. هاد الحالة راها كاينة في كل بلاصة. حتى المسيحيين المشهورين بحال دجون ويسلي عطا نفس الشهادة على حياتو وتجربو.

نفهمو التغيير بطريقة كتابية

أكيد راه واحد من الأسباب الرئيسية علاش كنشوفو عدد كبير ديال المسيحيين بالسمية - يعني الناس اللي كيقولو هما مسيحيين غير بالهدرة أولاً حسب الثقافة وصافي - في تاريخ الكنيسة المسيحية هو حيت الكنائس فشلو بينيو تعليم وفهم كتابي للتغيير ديال قلب الإنسان اللي كيأمن بالمسيح. إلا بغينا نفهمو التغيير بشكل صحيح، خاصنا نبدوا بالتشخيص والتحليل ديال الكتاب المقدس للإنسان المُدنب. باش نلقاو العلاج المناسب، في اللؤل خاصنا نعرفو المرض.

كل الناس كيغانيو من المرض ديالو الدنوب. راه البشر ماشي غير كيرتاكبو الدنوب وصافي، يعني المشكل ماشي غير مشكل ديال الأفعال وصافي، راه البشر في الحقيقة في الطبيعة دياهم مُدنيين (أفسس 2: 1-3). الإنسان في الجدور ديالو وفي الجوهر ديالو وفي القلب ديالو بعيد على الله وضد الله. الإنسان كيفضل يشبع الرغبات والشهوات دياولو الخاطئين كتر من يمجد الله ويعبدو - لدرجة أن الإنسان هو عبد للدنوب.

حَيْثْ هَادُوْكَ اللَّيْ كَيَعِيْشُوْ عَلَى حَسَابِ الدَّاتِّ، كَيَدِّيْوْهَا
فَالْأُمُورُ دِيَالِ الدَّاتِّ، وَلَكِنْ هَادُوْكَ اللَّيْ كَيَعِيْشُوْ عَلَى حَسَابِ
رُوحِ اللَّهِ، كَيَدِّيْوْهَا فَالْأُمُورَ الرُّوحِيَّةَ. وَرَاهِ اللَّيْ كَيَدِّيْهَا فَالْأُمُورُ
دِيَالِ الدَّاتِّ كَيَمُوتْ، أَمَّا اللَّيْ كَيَدِّيْهَا فَالْأُمُورَ الرُّوحِيَّةَ كَتَكُونُ
عِنْدَهُ الْحَيَاةَ وَالْهَيَاةَ، غَلَاخْفَاشِ اللَّيْ كَيَدِّيْهَا فَالدَّاتِّ رَاهِ ضِدُّ
اللَّهِ، وَمَا كَيَخْضَعُشْ لِّلشَّرْعِ دِيَالِ اللَّهِ، وَلَا كَيَقْدَرُ يَدِيرْ بِيَهْ.
وَالنَّاسُ اللَّيْ كَيَعِيْشُوْ عَلَى حَسَابِ الدَّاتِّ مَا كَيَقْدَرُوشْ
يُرْضِيُوْ اللَّهَ. (رومية 8: 5-8)

بِما أن الإنسان بطبيعته خاطي، راه قدام المحكمة ديال الله القاضي العادل هو تبت الجرم ديالو، هو مُدنب وكيستحق العقوبة اللّي واعد بيها الله. إلا ماكانش شي تغيير جذري وعميق في حالة الإنسان الروحية، راه هو محكوم عليه. وبِما أن أفكارو مركزة على الشر، راه مايقدرش حتّى تكون عندو رغبة باش يرضي الله. الإنسان محتاج للتغيير. كيجتاح لقلب جديد.

هاد التغيير الجذري كيسمّيه اللاهوت المسيحي "الإهداء" أولاً "التحوّل". الإهداء هو التغيير الجري من حياة العبودية اللّي كتقلب غير على الذنوب لحياة حرة باش الإنسان يقدر يتبع الله ويعبدو. التغيير هو تغيير في الحياة، وماشي غير شي قرار وصافي. هاد التغيير هو ماشي مسألة أخلاقية أولاً مساعدة داتية أولاً غير إصلاح في سلوك الإنسان. وهاد التغيير هو ماشي شي عرض خارجي سطحي أولاً شي ممارسة دينية. هاد التغيير ماكيتحققش بمجهود بشري، كيتحقق عبر بقوة الله بوحدها.

التغيير هو تحوّل جذري وعميق لدرجة أنه كيجتاح التدخل ديال الله من خلال الروح القدس. في هاد التغيير، روح الله كيغطي جوج بركات كبار ديال التوبة والإيمان للمُدنب اللّي كيتخلّى على الذنوب وكيلجأ لله من خلال الإيمان بيسوع المسيح.¹³ المادة التامنة ديال "اعتراف الإيمان نيو هامبشاير" كيغطي هاد التعريف الكِتابي لعملية "التغيير" ديال المؤمن:

كنأمنو بلّي التوبة والإيمان هما واجبات مقدسين من الله، وهما جوج نَعَم مايمكنش ينفصلو، روح الله اللّي كيجدّدنا هو اللّي كيديرهم في نفوسنا. حنا مقتانعين بقوة بدنوبنا والخطر اللّي قدامنا والعجز ديانا ومقتانعين بلّي المسيح هو الطريق الوحيد باش ننجاو، كنلجأ لله وحنا ندمانين بالتوبة، ومعترفين بدنوبنا، وطالبين الرحمة؛ وفي نفس

¹³ متلاً: يوحنا 1: 12-13؛ 3: 8-6؛ 4: 15؛ 16؛ أعمال الرسل 11: 18؛ أفسس 1: 13-14؛ 2: 1-9؛ 1 بط 1: 23؛ و 1 يوحنا 4: 10.

الوقت قابلين الرب يسوع المسيح بقوة بصيفتو نبينا
وكاهنًا وملكنًا، وحنا متوكلين عليه بوحدو كمُخلَّص وحيد
وكافي لينا.

إذن، راه التغيير هو التائب الحقيقي على الذنوب اللّي كيخلّينا نغيّرو
إتجاه حياتنا (التوبة) ونعتمدو غير على الرب يسوع المسيح باش يخلّصنا
وينجّينا (الإيمان).

نعرفو أرواحنا

إذن كيفاش الفهم الكتابي للتوبة يقدر يأتّر على شنو بالحق كنديرو في
كنائسنا؟ خاصنا نفكّرو في كل الأثار الداخلية والخارجية.

في اللّول نبدأو بالأثار الداخلية. خاصنا نسؤلّو ريو سنا واش خدينا قلب
متغيّر بنعمة الله من خلال الإيمان بيسوع المسيح. هاد النوع ديال الفحص
الداقي هو عمل روحي صيحي كنجتاجوه. في الحقيقة، الرّسل ديما شجّعو
الناس باش يديرو هاد الفحص الداقي (2 كورنتوس 13: 5 ؛ فيليبي 2: 12؛
2 بطرس 1: 5-11). أوّل خطوة في هاد العملية هي نعرفو أرواحنا. واش
كنتيقو في عمل المسيح الكامل بوحدو باش ناخذو النجاة؟ واش كاي شي
دليل على نعمة الله في حياتنا؟ واش حنا كنعكبرو في نعمة ومعرفة يسوع
المسيح، في التمار ديال الروح (غلاطية 5: 22-24)، وفي المزاي والتقوى
اللّي هدر عليهم المسيح في الوعض فوق الجبل في متى متى 5: 3-12؟

راه رسالة يوحنا اللّولي هي رسالة مفيدة بزّاف خاصنا ندرسوها ملي
نكونو كنفحصو عمل الله في أرواحنا. يوحنا عطانا مجموعة ديال الطرق
والإمتحانات اللّي يقدرو يعاونو المسيحيين باش يعرفو واش آمنو بالمسيح.
باش نعرفو حالة أرواحنا قام الله، نقدرو نخاتبرو ريو سنا من خلال هاد
الأدلة.

واش كنعيشو في النور أولا في الضلام؟

"إِلَّا كَلَّمْنَا بَلِيَّ عِنْدَنَا الشَّرْكَهَ مَعَاهُ وَحَنَّا كَنَعِيشُو فَالضُّلَامَ، رَاهُ كَنُكْدُبُو وَمَا كَنِدِيرُوش بِالْحَقِّ. وَلَكِنْ إِيَّا كُنَّا كَنَمِشِيُو فَالنُّورَ كَمَا اللَّهُ حَتَّى هُوَ فَالنُّورُ، عَنَّا كُنَّا الشَّرْكَهَ مَعَ بَعْضِيَانَا، وَالذَّمُّ دِيَالِ يَسُوعَ الْمَسِيحِ وَلَدُهُ كَيَطْهَرْنَا مِنْ كَأَعِ الدُّنُوبِ" (1 يوحنا 1: 6-7). الناس اللّي آمنو بالمسيح وبالحق ختابرو التغيير ديال الروح كيحزنو وكيندمو على دنوبهم. هاد المؤمنين كيكرهو دنوبهم، وكتكون عندهم رغبة باش يعيشو حياتهم بالنور ديال المسيح، يعني كتكون عندهم رغبة باش يعيشو بالتقوى والأمانة وكيجتاهدو باش يعيشو هاد الحق. الناس اللّي كنعيشو في الدنوب بشكل عادي واعتيادي وبلا توبة، واللّي كينكرو بلي هما مُدْنِين (الآيات 8-10)، ماكيكونوش بالحق ختابرو التغيير ديال الروح. "كُلُّ وَاحِدٍ كَيْتَبَّتْ فِيهِ مَا كَيْدِيرُوش الدُّنُوبِ، وَاللّي كَيْدِيرُوش الدُّنُوبِ عَمَّرَهُ مَا سَافَهُ وَلَا عَرَّفَهُ." (1 يوحنا 3: 6).

واش كنعبو الله الآب؟

يقدرو بيان بلي بعض الناس كيحبو يسوع "الضريف والحنين" ولكن ماكيعجبهمش الله الآب، اللّي كيعتبروه الإله ديال العهد القديم اللّي ماكيعرفش الحنان والمحبة. راه الفكرة ديال أن يسوع هو إله المحبة والتسامح كتخلي بعض الناس يعتاقدو بلي الله ماغاديش يحكم على الدنوب أولا المُدْنِين. الناس يقدرو يشوفو في الله الآب على أنه الطاغية ديال العهد القديم ويرفضو التعاليم ديال الكتاب المقدس على الله حيت كفكرو بلي هاد التعاليم هما قدام وماكيتوافقوش مع أهوائهم. ولكن راه الرسول يوحنا علم بلي محبة الله الآب هي إمتحان ودليل للإيمان الحقيقي. "مَا تَبْعِيوشُ الدُّنْيَا وَلَا الْحَوَائِجُ اللّي فَالدُّنْيَا. إِيَّا شَيْءٍ حَدَّ كَيْبَغِي الدُّنْيَا رَاهُ مَا فِيهِنَّ الْمُحَبَّةُ دِيَالِ الْآبِ" (1 يوحنا 2: 15). "شُكُونُ هُوَ الْكُدَابُ مِنْ غَيْرِ هَذَاكَ اللّي كَيَنْكُرُ بلي يَسُوعَ هُوَ الْمَسِيحِ؟ هَذَا هُوَ الْعُدُو دِيَالِ الْمَسِيحِ اللّي

كَيْنُكْرَ الْآبِ وَالْوَلَدِ. اللَّي كَيْنُكْرَ الْوَلَدِ كَيْنُكْرَ الْآبِ حَتَّى هُوَ، وَاللِّي كَيْعْتَرَفْ بِالْوَلَدِ كَيْعْتَرَفْ بِالْآبِ حَتَّى هُوَ" (1 يوحنا 2: 22-23). راه كاين إله واحد لا غير - الآب والابن والروح القدس. مايمكنش للإنسان يحب العالم والآب في نفس الوقت. ومايمكنش للمؤمن يقبل المسيح ويحبو بلا مايقبل ويحب الآب ومايمكنش نجيو لعند الآب بلا إيمان بالمسيح. محبة الله الآب هي إمتحان ودليل على التغيير الداخلي الحقيقي.

واش كنبو المؤمنين المسيحيين لخرين؟

نقدرو نشوفو بشكل واضح بلي كاينين بزاف ديال الناس كيعيشو حياة بلا محبة وبلا أي إحساس حقيقي آخر من جيهة المؤمنين لخرين بالمسيح. هاد الناس كيعتاقدو بلي الحياة المسيحية هي "رياضة فردية". ولكن راه الكتاب كيقول "اللِّي كَيَأْمَنُ بَلِّي يَسُوعَ هُوَ الْمَسِيحَ رَاه تَوْلَدَ مِنْ اللَّهِ. وَاللِّي كَيْبِغِي الْبُورَاهَ كَيْبِغِي وَوَلَدَهُ حَتَّى هَمَّ" (1 يوحنا 5: 1). "حَنَا كَنْعَرَفُو بَلِّي دَرْنَا مِنْ الْمَوْتِ لِلْحَيَاةِ، غَالِحَقَاشْ كَنْبِغِيو خُوْتْنَا. اللَّي مَا كَيْبِغِيشْ خُوَهُ كَيْبِغِي تَحْتِ حَكَاَمِ الْمَوْتِ. اللَّي كَيْكْرَهُ خُوَهُ رَاه هُوَ فِتَال، وَنْتَمَّ كَنْعَرَفُو بَلِّي الْفِتَالِ مَا عَتْكُونُشْ عِنْدَهُ الْحَيَاةِ الدَّائِمَةَ" (1 يوحنا 3: 14-15). "آ الْوَلِيدَاتِ، مَا خَاصُّشْ الْمَحَبَّةِ دِيَالْنَا تَكُونُ غَيْرَ بِالْهَضْرَةِ وَلَا بِاللِّسَانِ، وَلَكِنْ خَاصَّهَا تَكُونُ بِالْأَعْمَالِ وَالْحَقِّ. هَكَأْ عَنْعَرَفُو بَلِّي حَنَا مِنْ الْحَقِّ وَغَيْكُونُ قَلْبِنَا مُزْتَاخَ قُدَّامِ اللَّهِ" (1 يوحنا 3: 18-19). يوحنا كيعلّمنا بلي الوصية ديال الله هي أنا نأمنو باسم يسوع المسيح ونحبو بعضياتنا. إلا كانت محبتنا للمؤمنين لخرين باردة، فراه حنا محتاجين نمتاحنو ريوشنا واش بالحق حنا أمنا بالمسيح يسوع ولد الله أولا لا.

واش عندنا شهادة الروح بلي حنا ولاد الله؟

"وَهَكَأْ كَنْعَرَفُو بَلِّي اللَّهُ كَيْتَبْتْ فِينَا بِالرُّوحِ الْقُدُّوسِ اللَّي عَطَاهُ لِينَا" (1 يوحنا 3: 24ب). راه الله الآب ماخلاناش بلا شهادة على. محبتو. الله

بنفسو كي عطينا تأكيد على أنه تبنا في العائلة ديالو، من خلال الروح القدس ديالو. "وَعَلَّاخَقَّاشُ نُنْمُ وُلَادُ اللَّهِ، صَيْفُظُ اللَّهُ الرُّوحُ ذُ الْوُلْدُ ذِيَالَهُ لُقْلُوبُكُمْ، كَيْعُوْتُ وَكَيْكُولُ: «آبَا! آآبَا!»" (غلاطية 4: 6؛ وقرا رومية 8: 15 حتى هي). "وَهَازُ الرُّوحُ نِيْتُ كَيْشْهَدُ لِّلرُّوحِ ذِيَالِنَا بَلِّي حَنَا وَوَلَادُ اللَّهِ" (رومية 8: 16). حنا كنعرفو بلِّي رانا كنعيشو في الله والله ثابت فينا حيث خدينا الروح القدس ملي أمنا بالإنجيل (يوحنا اللولى 4: 13-14).

واش حنا تابتن في الإيمان؟

"عَلَّاخَقَّاشُ اللَّي تُوَلَّدُ مِنْ اللَّهِ كَيْغَلَبُ الدُّنْيَا. وَاللِّي كَيْخَلِينَا نُغَلْبُو الدُّنْيَا هُوَ إِيمَانُنَا. وَشُكُونُ اللَّي كَيْغَلَبُ هَازُ الدُّنْيَا، مِنْ غَيْرِ هَادَاكُ اللَّي كَيْأَمْنُ بَلِّي يَسُوعُ هُوَ وَوَلَدُ اللَّهِ؟" (1 يوحنا 5: 4-5). الناس اللِّي كيامنو وكيتبتو في الإيمان هما الناس اللِّي كيغلبو العالم بالإيمان بالمسيح. الإيمان الحقيقي هو الإيمان اللِّي كيتبت. هادشي ماكيعنيش بلِّي الأمور الصعاب في الحياة ماغاديش يتسببو لينا مزة مزة في بعض الشك أو التوتّر. ولكن هادشي كييعني بلِّي المؤمن المسيحي الحقيقي والصادق غادي يتبت في الإيمان ديالو ويزيد فيه، وغادي يتيق بالله وبالخطط ديالو والإرادة ديالو الصالحة. في الأخير راه الروح اللِّي كيسكن في المؤمن الحقيقي هو نفس الروح اللِّي كيحفص المؤمن حتى لنهار يرجع المسيح (أفسس 1: 13-14؛ 1 بطرس 1: 3-5).

راه أحسن طريقة باش نطرحو هاد الأنواع ديال الأسئلة هي تحت الشراكة الروحية ديال الخوت في الكنيسة المحلية، بين المسيحيين الملتزمين اللِّي غاديين كيكبرو في الإيمان ديالهم واللِّي يقدرو يعاونونا نشوفو الحالة الروحية ديالنا. بعض الناس عندهم "إيمان سهل" اللِّي كيقاوم العلاج الروحي الفردي، وكاينين ناس اللِّي يقدرو بكل سهولة يميلو للشك والياس. في الكنسية، نقدر ونحبو بعضياتنا من خلال أننا نشيرو لدليل نعمة الله في حياة بعضياتنا ومن خلال أننا نطرحو أسئلة صعاب اللِّي كيتحدّاو إيمانًا وسلوكنا في الحياة اليومية. إلا درنا هاد الجوج حوايج، راه غنكونو

كنعاونو بعضياتنا باش نتجنبو أقصى درجات اليأس والإفتخار بالنفس،
وغنكونو كنشجعو بعضياتنا باش نشوفو نفوسنا في ضوء عمل الله الْمُنجِّي
في أرواحنا.

النتائج ديال التبشير

بالإضافة لأننا نشوفو في الأثار الداخلية (ونعاونو الناس باش يديرو
نفس الحاجة)، خاصنا نشوفو في الأثار الخارجية في الفهم ديالنا للتغيير
وكيفاش كياتر على طريقة كنيستنا في التبشير. مَلِّي كنهدرو على التبشير، راه
خاص العضو ديال الكنيسة السليم يفهم بشكل صحيح شكون اللِّي بالحق
كيغير الإنسان المُدنب؛ الله الروح القدس هو اللِّي كيدير هاد الخدمة. وفي
نفس الوقت عضو الكنيسة السليم خاصو يفهم بلِّي التبشير هو ماشي
مسألة شي تقنية دكية ولكن هي عمل كيعتامد على روح الله اللِّي كيبارك
كلمة الله باش يصنع ولادة روحية جديدة وتغيير جذري عميق في حياة
الإنسان اللِّي آمن. غاديين نزيدو نهدرو على موضوع التبشير الكتابي
بالتفصيل في الفصل الجاي.

الخُلاصة

مع الوقت فقدت التواصل مع صاحبي كيني. ماعرفتش واش كيعيش
حياة مسيحية أولاً واش تخلاً على الحق وتبع العالم. أنا عارف بلِّي ضروري
بزّاف باش يفحص ويمتاحن راسو باش يعرف واش بالحق هو مؤمن. وأنا
عارف بلِّي هاد الفحص والإمتحان غيكون صالح ومُفيد غير إلا قلب باش
يشوف واش كينين أدلة على تغيير الروح اللِّي هدر عليهم الله في الكلمة
ديالو.

باش تزيّد تتعمّق في التفكير

مع مجموعة من الأعضاء المسيحيين ديال الكنيسة الناضجين وصحابك، ستعمل هاد الأسئلة باش تتأملو في الدلائل على نعمة الله وباش تلقاؤهم وتحّدوهم، وحسب الإحتياج ديال كل واحد تقدر وتحدّدو النقط والبلايص فين مازال كتححتاجو للنعمة.

1. واش كنعيشو في النور أولا في الضلام (1 يوحنا 1: 6-7)؟
2. واش كتحبو الله الآب أولا محبة العالم كتبان فينا (1 يوحنا 2: 15)؟
3. واش كتحبّو المسيحيين لخرين (1 يوحنا 3: 14-15 و 18-19)؛ (1: 5)؟
4. واش عندنا شهادة الروح القدس بأننا ولاد الله (رومية 8: 15-16؛ غلاطية 4: 6؛ 1 يوحنا 3: 24 ب)؟
5. واش كتنبتو في الإيمان (1 يوحنا 5: 4-5)؟

العلامة 5:

عضو الكنيسة السليم هو مُبشِّر كِتَابِي

في الفصل الرابع، ناقشنا عقيدة التغيير المهمة. لدينا الفصل بالقصة ديال كيني، الصديق ديالي اللي "علن الإيمان" بالمسيح ومن بعد مشا وتبع العالم.

بشكل كيضر في القلب دابا واضح ليّا ولصاحبي كورتيس بلي داك "التقديم ديال الإنجيل" اللي كان سمعو كيني شي سنين قبل كان رسالة سطحية بشكل كبير. ماكانش إعلان كتابي أمين كيعلن على (1) القداسة والبر ديالو الله مول كل السيادة واللي خلق كل الكون؛ (2) والذنوب ديال الإنسان والحكم اللي كيستحق بسباب العصيان ديالو ضد الله؛ (3) و الإحتياج ديال الإنسان لواحد التغيير جذري وقلب جديد وتقوى كاملة من الله؛ (4) وحقيقة أن يسوع المسيح بوحده هو اللي قدّم البر اللي كنحتاجو وكفّر على دنوبنا وهاكدا الله الآب ولأ راضي علينا؛ و (5) الإحتياج باش كيني ينتج تَمَر روجي ديال التوبة ويعتامد ويتوكّل غير على يسوع المسيح بوحده.

أنا متأكد بلي صاحبنا كيني سمع بعض هاد النقط. ولكن في نفس الوقت أنا متأكد بلي الأمانة الكتابية هي كتر من داكشي اللي شاركو كورتيس وكنتطلب كتر من داكشي اللي كيني عطا. حاجة مُخيفة أنّنا نفكّرو في العدد ديال الناس اللي ماداقوش التقوى ديال الله والخلاص ديالو، ماشي حيث المؤمنين المسيحيين ماتاحتش ليهم الفرصة باش يشاركو خبار الخير

معاهم، ولكن حيث حنا كمسيحيين كنعونو سطحيين في الحق اللي كنعشاركوه. العضو السليم ديال الكنيسة كيجتاهد وكيأكد بلي هو براسو ختابر التغيير الروحي، وفي نفس الوقت كيديرو كل ما في جهدهو باش يأكد بلي مجهودو في التبشير بحق الإنجيل جاي من النور ديال الفهم الكتابي بالتغيير ديال القلب والروح اللي كيجتاج ليهم كل إنسان.

فهم كتابي للتبشير

إلا ماكنش الفهم الكتابي للتغيير الداخلي والتبشير، راه عضو الكنيسة ماغتكون عندو فائدة كبيرة في إكمال المهمة اللي الرب كلف الكنيسة بيها اللي هي نتلمدو تلامد المسيح. ولكن راه مع الرغبة القوية ديال الكنيسة المعاصرة باش تتبع أساليب وتقنيات براغماتية، يعني عملية ("إلا نجحو هاد الأساليب، راهم مزيانين")، راه ولا ساهل على الأعضاء باش يمشيو في اتجاهات غير صحيحة إلا مافهموش العقيدة ديال التغيير وديال التبشير. "راه البراغماتية اللي بلا مبادئ هي في الأخير غير أمينة، وماشي غير هادشي وصافي، حتى راها ضد البراغماتية بنفسها"¹⁴.

الخبر المُسجَّع هو أنه ملي كيكون عندنا فهم مزيان بالتغيير، راه تمّا كنعفهمو بلي التبشير ماكيعامدش على الفصاحة ديال اللغة ديالنا أولا القدرة ديالنا باش نتحاورو ونشرحو، أولا على الحماس ديالنا أولا الدكاء، أولا على القصص والترانيم العاطفية، أولا القدرة ديالنا على الإقناع. راه تحزّرننا باش بكل بساطة وبشكل عميق نقدرو نتيقو بالله وبالقوة ديال الإنجيل باش ينتج التمر اللي الله بغا يشوف فينا (رومية 1: 17). حنا كنعرفو بلي واحّا حنا سُفراء ديال المسيح وكنطلبو من الناس باش يتصالحو مع الله، راه الله بنفسو هو اللي كيوجّه التضرّع وديك الدعوة من خلالنا حنا اللي كنعخدمو معاه في الأرض ديالو (1 كورينثوس 3: 9؛ 2 كورنثوس 5:

¹⁴ فيليب دي. جينسن وتوني باين، "الروابط بين الكنيسة والجامعة: النموذج 1"، كتاب "قول الحقيقة: التبشير ما بعد الحداثة"، تحرير د. أ. كارسون (جراند رابينز، ميشيغان: زوندرفان، 2002)، ص 195.

20 و6: 1)، والروح ديال الله هو اللي كيضمن لينا بلّي كلمتو ماعمرها كترجع خاوية (إشعيا 55: 11). خدمتنا هي نزرعو ونسقيو بكل وفاء وأمانة، وحنّا واتفين بلّي الله هو اللي كينمي (1 كورنتوس 3: 7).

إذن راه التبشير الكتابي كيتطلب منّا حاجة وحدة أساسية: باش نكونو أمنا ونشاركو مشاركة البشارة ديال يسوع المسيح مع الناس اللي الله كيحط في طريقنا (1 كورنتوس 4: 1-2). يعني التبشير الأمين خاصّو (1) يكون محدّد وواضح في المحتوى ديالو، خاص نكونو عارفين كيفاش نشاركو الحق على "شكون هو الله، شكون هو الإنسان، شنو هما الذنوب، شكون هو يسوع المسيح، وشنو دار يسوع مع الذنوب ديلنا، وكيفاش خاصنا نتجاوبو مع العمل اللي دارو المسيح" (2) التبشير خاص يكون داخل فيه "الحق ديال أن المسيح هو الطريق الوحيد للخلاص"، ونحيّدو الفكرة ديال أنه كاينين بزّاف ديال الطُرُق باش نوصلو لله (يوحنا 14: 6؛ أعمال الرسل 4: 12)؛ و (3) التبشير خاص يقدم دعوة واضحة للناس باش يتوبو ويأمنو بيسوع المسيح.¹⁵

التبشير الكتابي كيتطلب منّا باش نشاركو خبار الخير اللي كتعلن أن يسوع المسيح مات على ود المُدنيين ومن بعد نعطيو دعوة للناس اللي كيسمعونا باش يتوبو ويأمنو. يوحنا المعمدان بَشّر بهاد الرسالة نفسها (متى 3: 1-2)، علن يسوع نفس هاد الإنجيل (متى 4: 17). وراه الرسول بطرس بَشّر في يوم الخمسين نفس هاد لخبار اللي كتفتح (أعمال الرسل 2: 38). عضو الكنيسة السليم كيخلي هاد الرسالة تكون هي المركز ديال كلشي حيث ديما كيجهتاهد باش يكون مُبَشّر كتابي أمين.

¹⁵ مايكل بي. أندروس، "التوجه لله: التحول لما هو أبعد من غير تفضيل ديني"، في كتاب "قول الحقيقة"، 155-161.

الخدمة ديال المُبشِّر

بَرّاف ديال الكُتّاب كتبو باش يعاونونا في العمل ديال التبشير بالبشارة ديال يسوع المسيح بكل أمانة. وقدمو لينا بَرّاف ديال الإقتراحات والنصائح المُفيدين بَرّاف. مارك ديفر قترح علينا ستة ديال النقط الّلي خاص أعضاء الكنيسة يراعيو ليهم في البشير.¹⁶

- 1) خاصنا نقولو للناس بشكل صريح بَلّي راه الله غادي ينجّيهم إلا تابو وأمنو- لكن ولكن هادشي ماغيكونش ساهل.
- 2) خاصنا نقولو للناس بشكل مستعجل بَلّي راه الله غادي ينجّيهم إلا تابو وأمنو- ولكن خاصهم يقرّرو دغية.
- 3) خاصنا نقولو للناس بكل فرح بَلّي راه الله غادي ينجّيهم إلا تابو وأمنو. و واخّا يجيو الصعوبات، راه هاد الطريق كتستحق!
- 4) ستعمل الكتاب المقدس.
- 5) خاصنا نفهمو بَلّي الحياة الفردية ديال المؤمنين والكنيسة كجماعة هما جزء أساسي من التبشير. بجوجهم خاصهم يعطيو مصداقية للإنجيل الّلي كنبشرو به.
- 6) ديما خاصنا نصلّيو.

مايكل بي. أندروس (Michael P. Andrus) حتّى هو عطانا بعض النصائح الإضافية المفيدة. عطانا بعض النصائح باش نقدر نحافضو على فهم صحيح على عقيدة التغيير وسط مجهوداتنا في إعلان بشارة المسيح:

¹⁶ مارك ديفر، تسعود ديال العلامات لكنيسة الصحية (ويتون، إلينوي: كروسواي، 2004)، 124-130.

1) علّم الناس الّلي كيقلبوا على الحق بطريفة كتركّز على الأفعال وماشي غير الأقوال؛ كتركّز على التغيير في الحياة، وماشي غير تغيير في المعتقدات. ماخصناش نزرعو شي فكرة تقدر تخليّ الناس يعتاقدو بلّي غير خاصهم يقولو أه لشي رسالة وغادي ياخذو الحياة الأبدية.

2) ركّز على نظرة كتابية جديّة على الدنوب.

3) علّم الكتاب المقدس والإيمان المسيحي باش الإنسان يفهم بلّي خطة الخلاص هي من المشورة ديال الله والخطة ديالو، وماشي فكرة أولا حكمة بشرية.

4) بعد من اللغة الساهلة ديال القرارات ("غير أمن وصافي"، "صليّ معايا باش تقبل المسيح"، "طلب من يسوع يدخل لقلبك")، خاصنا نتبعو اللغة العميقة ديال التغيير (عقيدة الإهداء) ("استسلم للسيادة ديال يسوع المسيح" أولا "بعد من الدنوب، وقبل الغفران الّلي شراه يسوع بالموت ديالو وعيش الحياة ديال الطاعة له")¹⁷.

الكنيسة المحلية في التبشير

بالإضافة لهاد النصائح المفيدة، العضو ديال الكنيسة خاصّو يفهم الفائدة ديال الكنيسة المحلية في التبشير وكيفاش هي المركز ديال هاد الخدمة. مليّ كنكونو في كنائس كتبش بالإنجيل، راه بالنعمة ديال الله التبشير غيكون تبشير بالإنجيل في كل اجتماع كتنديرو الكنيسة. وحنا كيكونو عندنا فرص مزيانين باش نعرضو على صحابنا الّلي ماشي مؤمنين

¹⁷ مايكل أندروس، "التوجه لله"، 161-162.

للإجتماعات ديال الكنيسة، هادي طريقة مزيانة بزّاف باش صحابنا يزيدو يتعمقو في الفهم ديالهم للإنجيل من بعد الحِوارات الشخصية الّلي ممكن نكونو درنا معاهم قبل.

وهادي كتكون فرصة إضافية ليهم باش يشوفو الإنجيل "كيتجسد" في الحياة الجماعية ديال المؤمنين. في الكنيسة، الّلي ماشي مؤمن خاصو يشوف الوحدة والمحبة الّلي كيشهدو لحقيقة وقوة الإنجيل ومحبة الله (يوحنا 13: 34-35؛ 17: 20-21). الأصدقاء ديالنا غادي يقدرو يشوفو الإنجيل بعينهم ملي يكونو مع المؤمنين المسيحيين وهما كيحتفلو بالمعمودية وعشاء الرب. راه بالطريقة الّلي كنعيشو بيها مع بعضياتنا ككنيسة وفي الإجتماعات ديال الكنيسة كنكونو كنعطيو صورة واقعية على الإنجيل بطريقة كتكمل كلمة الإنجيل الّلي تعطات من خلال الوعظ والتبشير ديال الخوت.

وزيد على هادشي، راه مزيان ندخلو عائلتنا وأصدقائنا الّلي ماشي مؤمنين في حياة كنيستنا حيث هادشي كيعاونهم باش يشوفو ويفهمو الحياة الّلي غيعيشوها إلا خدم الرب في حياتهم وتابو وأمنو بيه وخدّوا النجاة ديالو. راه مزيان نخلّيو الكنيسة المحلية جزء مركزي وأساسي في مجهوداتنا التبشيرية حيث هادشي غيعاون يحيد فكرة الإيمان الفردي والحياة المسيحية الفردية المعزولة من اللؤلؤ.

في الأخير، الكنائس المحلية غالباً كيقرو لينا بزّاف الحُلفاء في الهدف والخدمة باش يعاونونا - رُفقاء مسيحيين - كل واحد فيهم عندو خبرة خاصة بيه وعندو إختبار كيشجّع وعندو موارد ديالو، وكل واحد فيهم يقدر يبني علاقات خرين مع أصدقائنا وعائلاتنا. الرب كيفرح باش يستعمل خوتنا في الكنيسة باش يشاركو حتى هما الكلمة ديال الإنجيل أولاً باش يعيشو حياة كتشهد للناس لخرين وكتشجّعهم يتوبو ويأمنو بالرب. ماتخلّيش الكنيسة المحلية خارج مجهوداتك في إعلان بشارة الإنجيل!

الخلاصة

واحد المرّة حضرت في واحد المؤتمر على التبشير نضماتو واحد الكنيسة محلية. الشخص الّلي كان كيعلّم سوّل الحاضرين في المؤتمر على رأيهم على شنو هو السبب اللّول والرئيسي الّلي ماكيخليش المسيحيين يبشرو بالإنجيل. الحاضرين عطاو مجموعة ديال الأجوبة المزينة، بداو كيهدرو على الخوف ونقص المعرفة وعدم الإهتمام. الحاضرين في المؤتمر تعجبو مّلي المّعلّم قال بّلي هادو بالصح مشاكل وأسباب حتّى هما، ولكن المشكل الرئيسي هو أن بزّاف ديال المؤمنين المسيحيين ماكيأمنوش برومية 1: 16. ماكيأمنوش بّلي الإنجيل هو قوة الله للخلاص. ما عندهمش تيقّة في الإنجيل.

ونت؟ واش نت أولا نتّي واتق من أنّ الإنجيل هو قوة الله للخلاص؟ واش هاد التيقّة كتبان مّلي كتكون كتعلن الإنجيل وكتبشّر بيه؟ وكنصّلي وكنطلب من الله باش نقدرو كلنا نجاوبو على هاد الأسئلة بشكل إيجابي ونقولو "أه".

باش تزيد تتعمّق في التفكير

1. واش الطريقة الّلي كتهديبها مع الناس على يسوع فيها كل الحقائق والنقط الأساسية ديال الإنجيل؟
2. واش الطريقة الّلي كتهدر بيها مع الناس على يسوع كتبينّ التيقّة ديالك في رسالة الإنجيل، وبّلي الإنجيل هو قوة الله للخلاص؟
3. كيفاش الكنيسة الّلي فيها أعضاء ملتزمين مع بعضياتهم تقدر تغتير فكرة الناس على الكنيسة في المجتمع؟

العلامة 6:

عضو الكنيسة السليم هو عضو ملتزم

بِزَّاف دِيال الناس كيعتاقِدو بَلِّي الكنيسة- وخصوصًا العضوية دِيال الكنيسة، اللَّي يعني الإِنْضمام الفِعْلي - هي حاجة رُوحية قديمة الهدف منها هو تعرقل الحرية الروحية والتمار الروحية.

كايين بزَّاف دِيال الأسباب مورا هاد الفكرة على عضوية الكنيسة. واضح بَلِّي كايين مسيحيين مامهتَمِّينش بالعضوية في الكنيسة. ماعندهم غرض فيها، تكون أولا ماتكون؛ هما ماشي متحمسين وماشي متشائمين عليها. غير زايد ناقص بالنسبة ليهم.

كايئة مجموعة خرا دِيال المؤمنين جاهلين بالموضوع. ما عارفين والو على العضوية. وماعمرهم فكرو في وجهة نظر الكتاب المقدس على الكنيسة المحلية.

وكايئة مجموعة خرا دِيال المؤمنين ماقدروش ياخذو قرار واضح. ماقدروش يقزرو على الإِنْضمام الرسمي للكنيسة من خلال العضوية. كايين ناس في هاد العالم صعب عليهم ياخذو القرارات بشكل عام في حياتهم؛ غير كيتسناو حتَّى كتوقع الواقعة بلا مايحتاجو ياخذو شي قرار.

وكاين واحد النوع آخر ديال المؤمنين اللي بغاو ديما يبقاو مستقلين. هما بحال "المُحاربين الفرديين" اللي مابغاوش يتقلو على راسهم بالعضوية ديال الكنيسة. هما مابغاوش الناس يتدخلو "في مسألهم". بغاو يجيو للكنيسة، ومن بعد يمشيو أحرار بلا أي إرتباط أولاً أي مسؤولية.

في الأخير، كاين نوع ديال المؤمنين اللي كيتعطلو في الالتزام مع الكنيسة المحلية حيث أحاسيسهم مقلوبين. عندهم ارتباطات قوية بـ"الكنيسة الأم" ديالهم في المدينة اللي كبرو فيها، وواخا هكداك هما ساكنين بعاد بزاف منها. مايقدروش ينضمو للكنيسة اللي كيعيشو قراب منها حيث بأحاسيسهم هما مازال مرتابطين بالماضي وبالكنيسة الأم.

في الأساس، كل هاد الأفكار على الكنيسة المحلية هما نابعين من نفس المشكلة: الفشل في فهم غرض الله باش تكون الكنيسة المحلية مركزية في حياة الشعب ديالو أولاً عدم الجدية مع هاد الموضوع. الناس ماكيويوش أعضاء ملتزمين في الكنيسة- ومسيحيين سليمين - حيث غالباً ماكيهفموش بلي بحال هاد الالتزام هو بالضبط الطريقة اللي بيها الله بغا شعبو يعيش الإيمان ويختابر المحبة المسيحية.

واش "العضوية ديال الكنيسة" هي فكرة كتابية؟

الناس اللي أول مرة كيسمعو فكرة أن عضوية الكنيسة هي ضرورية ومهمة، الأغلبية فيهم كيسولو هاد السؤال: "واش فكرة عضوية الكنيسة مهمة؟ فين نقدرو نلقاوها في الكتاب المقدس؟"

العضوية ديال الكنيسة بحالها بحال بزاف ديال الحقائق الكتابية لخر، مايمكنش نحلو الكتاب المقدس ونمشيو لكتاب "عضوية الكنيسة" أولاً لشي فصل العنوان ديالو "كيفاش تولي عضو في الكنيسة". ماكينش وضوح

بحال هاكدا على هاد الموضوع، ولكن وَاخًا هكداك راه فكرة العضوية كايئة تقريبًا في كل بلاصة في الكتاب المقدس.

واش سبق ليك فكري في شحال من ممارسة أولا وصية معطية لكنيسة العهد الجديد ماغيكونش عندها شي معنى إلا العضوية في الكنيسة ماكانتش كتمارس، وساهل نشوفوها، وكتعتابر مهمة؟ بغيت نشارك معاك بلّي بعض النقط الأساسية اللي الكتاب المقدس وصّا بيها الكنيسة المحلية اللي ماغيكون عندها حتّى شي معنى إلا ماكانش شي مفهوم عملي واضح على العضوية.¹⁸

القيادة ديال الكنيسة

كاينين جوج ديال الفقرات معروفين في الكتاب المقدس كيوضحو للكنيسة الشروط اللي خاص يكونو في القادة ديالها (تيموثاوس الأولى 3: 1-13؛ تيطس 1: 5-9). وزيد على هاد الشروط، راه كاينين وصايا واضحين من الله باش القادة يراعوا شعب الله وباش المسيحيين يخضعو للقادة الروحانيين ديالهم (عبرانيين 13: 17). ولكن إلا ماكانتش عضوية محددة و واضحة، راه القادة مايقدروش يديرو خدمتهم ويرعاو الجماعة. والخضوع لسلطة ديال القادة اللي كتوصينا بيه عبرانيين 13: 17 كيويّ بلا معنى وغير هدرية في الريح إلا القادة ماكانوش مسؤولين على مجموعة محددة ومعروفة، وهاد المجموعة ماكانتش مرتابطة بيهم بشي بطريقة.

التأديب ديال الكنيسة

في 1 كورنتوس 5، الرسول بولس كيوصي المؤمنين في كورنتوس باش "يخرّجو من الشراكة" ديال الكنيسة واحد الراجل كان كيزني. الرب يسوع

¹⁸ مارك ديفر وبول ألكسندر، الكنيسة المقصودة: بني خدمتك على الإنجيل (ويتون، إينوي: كروسواي، 2005)، 60-61.

عطا وصية بحال هادي في متى 18: 15-17. واحد الجزء من السبب علاش الكتاب المقدس كيوضي الكنائس باش تمارس التأديب هو باش تقدر تحافض على التميّز والإختلاف الواضح بين شعب الله، يعني الكنيسة، والعالم اللي ضاير بيها (1 كورنتوس 5: 9-13). إلا ماكانتش شي طريقة واضحة وباينة باش نحددو شكون كينتمي للكنيسة وشكون كينتمي للعالم، فراه هاد الفرق والتمييز ماغيكونش ممكن، و "الخروج من الشراكة" غيكون مستحيل في هاد الحالة حيت ماغتكونش شي طريقة حقيقية و واضحة باش الخوت يدخلو في ديك الشراكة في إطار الكنيسة.

القائمة ديال الأعضاء والتصويت

كاين دليل صغير على أن الكنيسة اللّولى ستعملات شي قائمة كيكتبو فيها أسماء الأعضاء ديال الكنيسة. متلاً، كانت عندهم قائمة بأسماء العيالات اللي ماتو ليهم رجالهم (الأرامل) (1 تيموتاوس 5: 9). وحتى صوتو المؤمنين في الكنيسة المحلية على ود بعض الإجراءات والقرارات. كانت "الأغلبية" صوتات باش يحيديو واحد الراجل من عضوية الكنيسة في كورنتوس (2 كورنتوس 2: 6).

الانتخاب ديال القادة، والخضوع ليهم، وتنظيم العضوية، والاحتفاض بالقائمت، والتصويت ماغيكون عندهم معنى من غير إلا كان واحد الجسد محلي معترف بيه ومعروف وباين. واحّا الكتاب المقدس ماكعطيناش أطروحة كتابية على العضوية في حد ذاتها، راه كاينين أدلة كافيين في كلمة الله اللي وحى بيها واللي كيشيرو لواحد الشكل من أشكال العضوية اللي كانت الكنيسة اللّولى كتمارسو وكان ضروري في الخدمة ديال الكنيسة. عضوية الكنيسة عندها نفس الأهمية اليوم كيما قبل.

الجوهر ديال العضوية: المحبة الملتزمة

ربنا يسوع حدد واحد العلامة كتميز تلامدو. أكيد راه كابين بزاف ديال
العلامات كيميزو التلمدة الحقيقية، ولكن راه الرب علن بلي كينة علامة
ضرورية ومهمة هي اللي كتوري للعالم اللي كيشوفنا بلي حنا دياول المسيح:

"وَرَانِي كُنُوصِيكُمْ وَصِيَّةَ جَدِيدَةٍ: بَغِيُو بُعْضِيَّاتِكُمْ. وَكَمَا
بَغَيْتُكُمْ أَنَا، بَغِيُو حَتَّى نُنْتُمْ بُعْضِيَّاتِكُمْ. بِهَادِيَّيْ غَيَعْرِفُو
النَّاسُ كُلَّهُمْ بَلِّي رَاكُم تَلَامِدِي: إِلَّا كُنْتُمْ كَتَّبَعِيُو بُعْضِيَّاتِكُمْ"
(يوحنا 13: 34-35)

العلامة اللي كتميز التلاميذ ديال المسيح هي المحبة- داك النوع ديال
المحبة اللي مارسها يسوع من جبهة التلامد دبالو، المحبة الضاهرة بشكل
كافي لدرجة أن كل إنسان يقدر يعرف بلي حنا كنبعو المسيح يسوع.

إذن ماخصناش نتعجبو حيت المسيحي السليم خاص يكون هو
الشخص اللي كيلتزم بهاد النوع ديال المحبة تجاه المسيحيين لخرين.
وأحسن بلاصة فين يقدرو المسيحيين يحبو بعضياتهم بهاد الطريقة هي
الكنيسة المحلية فين شعب الله كيكون جماعة وحدة. وماخصناش
نتعجبو من الكلام اللي في الرسالة للعبرانيين اللي كيقول "خَاصَّنَا نَرُدُّو الْبَالُ
لِبُعْضِيَّاتِنَا بِأَشْ نُتَشَجُّعُو عَلَى الْمَحَبَّةِ وَالْأَعْمَالِ الْمُرِيَّةِ. وَمَا نَعْيَبُوشْ عَلَى
الْإِجْتِمَاعَاتِ ذِيَالِنَا كَيْفِ وَلُفُو شَيْ وَخُدِينْ يَدِيرُو، وَلَكِنْ خَاصَّنَا نَسْجَعُو
بُعْضِيَّاتِنَا بِزَافْ، وَبِالْخُصُوصِ وَنُنْتُمْ كَتَشُوفُو بِالْيَوْمِ الرَّبِّ غَادِي وَكَيَقْرَبْ"
(عبرانيين 10: 24-25)؟ الحضور الأمين للإجتماعات ديال الكنيسة
مرتابط بشكل قوي مع التشجيع على المحبة والأعمال ديال الخير.
الكنيسة المحلية هي البلاصة فين كتبان المحبة بشكل واضح ومُقنع وسط
شعب الله. هي البلاصة فين كيبان "جسد المسيح" بشكل واضح وسط
العالم.

شكون هو عضو الكنيسة الملتازم؟

من واحد الناحية راه السؤال "شكون هو عضو الكنيسة الملتازم؟" هو السؤال اللي كيدور عليه هاد الكتاب كامل. ولكن حنا بغينا ندرسو هاد السؤال من خلال علاقتو بالوصية الأساسية وعلامة المحبة. غادي نشارك معاكم بعض الأمور اللي كتميز العضو الملتازم ديال الكنيسة.

كيحضر للإجتماعات بنتضام

هادا هو العمل اللول والأهم في الحياة الروحية ديال كل مسيحي في الكنيسة المحلية. كاينة مجموعة وحدة ديال الأمور اللي يقدر يخليو المحبة المسيحية تكون ممكنة، هاد الأمور هما أن المسيحي خاص يكون حاضر، ويكون معروف عند الخوت، ويكون نشيط (عبرانيين 10: 24-25).

كيقلب على السلام

عضو الكنيسة الملتازم كيجتاهد باش يحافظ على السلام في الجماعة. "إيوا خاصنا نقلبو على الأمور اللي فيها الهنا، والأُمُور اللي كتقوينا فالإيمان" (رومية 14: 19). "والغلة ديال التقوى كترزع فالهنا بهادوك اللي كيديرو الهنا" (يعقوب 3: 18).

كيقوي لخرين

الهدف أولا الغرض الأساسي للإجتماعات العامة ديال الكنيسة هو نبنو وتقويو بعضياتنا في الإيمان (1 كورنتوس 12، 14؛ أفسس 4: 11-16). العضو السليم والملتازم هو بحال يسوع كيحي باش يخدم خوتو ماشي باش خوتو يخدموه (مرقس 10: 45)؛ وكيجتامع مع خوتو باش يعطي وماشي غير ياخذ ويستهلك.

كِيحْدَر وَكِيئْبَه خوتو

العضو الملتازم كيجتاهد باش يقول الحق بمحبة لخوتو وخواتاتو، وكيدير كل ما في جهدو باش يعاونهم مايزلقوش ويطيحو، وكيشجّعهم على القداسة والفرح المسيحي. العضو الملتازم ماكيتدخّلش في الأمور الخاصة ديال حياة الناس لخرين - فضولي كتر من الزايد - ولكن في نفس الوقت "ماكيهزش يديه" ويبعد من الناس حيت كيبيغي يعاون خوتو المؤمنين في الكنيسة وكيبغي يقدّم ليهم المشورة.

كيقَلَب على المُصالحة

المؤمنين بالمسيح هما ناس تصالحو مع الله من خلال المسيح. وهاد المُصالحة مع الله كتعطينا "خدمة المُصالحة" (2 كورنتوس 5: 18-21). هادشي علاش العضو الملتازم كيدير كل ما في جهدو باش يصلح المشاكل بالزرية، حتى قبل تبدا العبادة العامة في الكنيسة (متى 5: 23-24).

كيصبر من الناس لخرين

المؤمنين اللي دابا عندهم خدمة المُصالحة خاصهم يتميزو بالفضيلة ديال الصبر. خاصهم يتميزو بالضرافة ومايكونوش متكبرين (متى 5: 5). خاصهم يتبتو قدام الفشل والألم ديال خيبات الأمل، والإحباطات، والخسارة، والهجوم، والمعيور، والإهانة (متى 18: 21-22؛ رومية 15: 1). إلا هزينا التقل ديال بعضياتنا راه غنكونو كنكملو الوصايا ديال المسيح (غلاطية 6: 2).

كيستعد للفرائض ديال الكنيسة

من بين الامتيازات التي كيجيو مع العضوية ديال الكنيسة هما المشاركة في الفرائض التي المسيح أسسهم في الكنيسة- المعمودية وعشاء الرب. وراه هاد الامتيازات كي عطونينا إعلام باين واضح على أن المسيح مات من أجل المُدنيين وقام وتبع من الموت للحياة الأبدية. إدن رها كارتة باش بزاف ديال المسيحيين يتجاهلو الفرائض ديال الكنيسة التي أسسهم الرب يسوع بنفسو هادي 2000 عام. العضو الملتزم كيفرح بالمعمودية ديال المؤمنين الجداد، وكيفحص قلبو ملي كينضم للعائلة ديال الله ملي يشاركو العشاء ديال الرب. هنا المؤمن من خلال هاد الفرائض كياخد وسائل ديال النعمة، يعني هاد الفرائض كيقدمو شهادة باينة واضحة على التأثير ديال الإنجيل في حياة المؤمن وفي حياة الكنيسة المجتمعة.

كيدعم الخدمة الروحية

العضو الملتزم كيعطي من الموارد، والوقت والموهب ديالو باش الإنجيل يزيد ينتشر في الكنيسة المحلية. هو كيعيش الدعوة ديال الكتاب المقدس لجسد المسيح. كيقول الرسول بولس "عَنْدَنَا مَوَاهِبٌ مُخْتَلَفَةٌ، كُلٌّ وَاحِدٌ عَنْدُهُ عَلَى حَسَابِ النِّعْمَةِ الَّتِي عَطَاهُ اللَّهُ. الَّتِي عَنْدُهُ الْمَوْهَبَةُ دِيَالِ النُّبُوَّةِ، خَاصُّهُ يُنْتَبَأُ عَلَى حَسَابِ الْإِيمَانِ دِيَالِهِ. وَالَّتِي عَنْدُهُ الْمَوْهَبَةُ دِيَالِ خُدْمَةِ الرَّبِّ، خَاصُّهُ يُخَدِّمُ. وَالَّتِي عَنْدُهُ الْمَوْهَبَةُ دِيَالِ التَّعْلِيمِ خَاصُّهُ يَعْلَمُ. وَالَّتِي عَنْدُهُ الْمَوْهَبَةُ دِيَالِ التَّشْجِيعِ، خَاصُّهُ يُشَجِّعُ. وَالَّتِي عَنْدُهُ الْمَوْهَبَةُ بَاشْ يُعْطِي خَاصُّهُ يُعْطِي بِالسَّخَا، وَالَّتِي عَنْدُهُ الْمَوْهَبَةُ دِيَالِ الْقِيَادَةِ خَاصُّهُ يُدِيرُهَا بِكُلِّ جُهْدِهِ، وَالَّتِي عَنْدُهُ الْمَوْهَبَةُ دِيَالِ الرَّحْمَةِ خَاصُّهُ يُرْحَمُ بِالْفَرَحَةِ" (رومية 12: 6-8). عضو الكنيسة السليم والملتزم كياخد نعمة الله وكيطبقها من خلال مجهودو باش يدعم خدمة الكنيسة المحلية وماكيخلص باش يعطي كل بركة عطاها ليه الله للخدمة ديال الإنجيل. هاد المؤمن الملتزم خاصو يديرو بحال الخوت ديال مَكِدُونِيَّةِ، التي لتازمو باش يعطيو من فلوسهم، ضحَاو وعطاو، كانوا سخييين، وكان الإيمان بالمسيح

هو الّلي محرّكهم وَاخًا كانوا كيدوزو بضروف قاسحين (2 كورنتوس 8-9).
واش عندنا شي حاجة ماخديناهاش من الله؟ واش كايّنة شي حاجة عطاها
لينا الله والّلي ماخصناش نعطيوها ليه من خلال عبادتنا ليه وإيماننا بيه؟

الْخُلَاصَة

راه إلا ماقدرناش نربطو نفوسنا بطريقة دائمة وملتازمة بالراس ديال
الكنيسة (يعني المسيح) من خلال الانضمام للجسد (يعني الكنيسة) راه
هادشي غيكون دليل على نكران الجميل وعدم الشكر للمسيح، سواء كان
هادشي من قلب جاهل أو مامهتمش بأمر الرب. المؤمن الّلي عندهم
الفرصة يعيشو في البلدان فين كايّنة الحرية باش المؤمن ينضم للكنيسة
المحلية، راه خاصهم يسمعو للنصيحة ديال ديتريتش بونهوفر (Dietrich
Bonhoeffer) الّلي قال:

راها نعمة من الله باش أي جماعة تقدر تجتمع بشكل ضاهر
وباين في هاد العالم وباش يشاركو كلمة الله والفرائض ديال
كنيستو. راه ماشي كل المؤمنين المسيحيين في هاد العالم
عندهم هاد الفرصة وهاد البركة. الناس المسجونين، المرضى،
الّلي بعاد وبوحدهم، المبشرين بالإنجيل في البلدان فين
ماكاينش مؤمنين بالمسيح وماكاينين كنائس كلهم كيوقفو
بوحدهم بالإيمان ديالهم. هاد الناس هم الّلي بالحق كيعرفو
بلي الشراكة العلنية ديال الكنيسة هي نعمة. وبحال كاتب
المزموز 42 حتّى هما كيتفكرو وكيقولو: "مشينا مع جماعة
كبيرة ... لبيت الله، بصوت الفرح والتسبيح، مع جماعة الّلي
كتحفّض النهار المقدس (مزمور 42: 4) ... هادشي علاش
كل مؤمن عندو الإمتياز يعيش حياة ديال الشراكة مع
مسيحيين خرين خاصو يسبح النعمة ديال الله من أعماق

قلبو. أحيو نشكرو الله ونعلنو ونقولو: راها نعمة كبيرة أنّنا نقدرو نعيشو في الجماعة مع خوتنا المؤمنين المسيحيين.¹⁹

باش تزيد تتعمّق في التفكير

1. في مقياس من 1 إلى 10، شنو هي النقطة الّتي تقدر تعطي للإلتزام ديالك بالعضوية في كنيستك المحلية؟ إلا التقييم ديالك ماشي هو 10، علاش؟
2. بشكل عام، واش كنيستك المحلية كتهتم بالعضوية ديال الكنيسة بشكل كافي؟ واش تقدر تستشهد بأيات من الكتاب المقدس باش تدعم الجواب ديالك؟
3. كيفاش تقدر شي كنيسة عندها أعضاء ملتازمين بشكل عميق مع بعضياتهم تغيّر المفهوم ديال الكنيسة في المجتمع؟

¹⁹ ديتريش بونهوفر، الحياة مع بعضنا (نيويورك: هاربر و راو، 1954).

العلامة 7:

عضو الكنيسة السليم هو عضو كيقلب على التأديب (التربية)

الحياة محتاجة للتربية والنضام. هادي واحد الحقيقة بسيطة غالبًا كمنساوها أولاً كنتجاهلوهها. باش نزداهرو ونوليو ناضجين، كحتاجو للتربية والنضام في حياتنا كلها.

إدن راه الفوضى هي عُدوة ديال النُضج والنُمو. عدم الإنتضام والتشويش وعدم الانتباه بشكل عام كينتجو واحد النوع من عدم الاستقرار اللّي كيصغف عوض يقوي. في حالة إلا ما كانش النضام والتربية، راه كايين إحتمال كبير باش ماتكونش واحد البيئة فين الإنسان يقدر يتبت وينضج. الحياة محتاجة للنضام والترتيب.

الشباب اللّي كيتزوجو شوي بكري كيفهمو هادشي ملى الله كيرزقهم بولاد صغار. حتى لهاد النقطة تقدر تكون حياتهم "فضفاضة شوية" وإحساسهم بالمسؤولية والتربية كيكون مازال ضعيف، ولكن غير كيجيو الأولاد ودغية كيفهمو بلّي باش يربيو ولادهم تربية صحيحة، راهم كيتحاجو يديرو نضام في حياتهم وخاصهم يعيشو بالنضام. خاصهم ينضمو الوقت ديال النعاس والوقت ديال الماكلة. خاصهم يحيدو أولاً يخبو الحوايج اللّي يقدرو يأديو الدراري الصغار في الدار. خاصهم يسدو الهريزات ديال الضو. خاصهم يبدلو ليكوش ديال الدراري في الوقت المناسب وخاصهم يدوشو ليهم ويصبنو حوايجهم بالوقت باش يحافظو على النضام والإنضباط. راه كحتاجو للنضام إلا بغينا نشوفو النُمو. هادي حقيقة و واقع ديال الحياة.

راه النظام ضروري حتى في الحياة الروحية. إلا مادرناس نضام وروتين مرتّب وصحيح ومادرناس حدود لحياتنا الروحية، راه غنعيشو بشكل عشوائي وماغاديش نكبرو و ننضجو في الروح. كلمة خرى كتشرح الترتيب والنظام اللّي كحتاجو باش نكبرو في الروح هي كلمة التربية أولا التأديب.

شنو هي التربية؟

اليوم، ملّي الناس كيسمعو كلمة تربية أولا تأديب، يقدرو يفكرو في شي عقاب سلبي قاسح، بحال تعاقب شي ولد صغير متمرد بالأعمال الشاقة. بزّاف ديال الناس كيفكرو بلّي التربية هي حاجة قاسحة، أولا هو حاجة خاصنا نتجنبوها أولا حاجة كيديروها الناس القاسحين واللّي ماشي حنان وضريفين. بالنسبة لناس خرين، التربية كتبان ليهم أنها ضد الحرية والفرح. أكيد راه التربية أولا التأديب ماشي ديما تجربة ممتعة. الكاتب ديال الرسالة للبرانيين هدر على هاد النقطة، قال: "كُلُّ تَرْبِيَّةٍ فَالُلُّوْلُ كَثَقْلُقْ، وَمَا كَتَبَانُشْ بِاللّي هِي شِي حَاجَة اللّي كَتْفَرُحْ، وَلَكِنْ مِنْ بَعْدُ رَاهَا كَتْعَطِي الغَلَّةُ ذُ الهَنَّا وَالْتَفْوَى فَهَادُوْكَ اللّي تَرْبَاوْ." (عبرانيين 12: 11).

ولكن في الحقيقة، كلمة تربية عندها معنى أعمق، معنى إيجابي كتر من غير شي "عقوبة قاسحة". كلمة "تربية" وكلمة "تلمذة" كيجيو من نفس الأصل في اللغة اللاتينية وبجوج مرتابطين بفكرة التعليم والترتيب. التلميذ هو طالب كيتعلّم، كيشارك في واحد النوع من التربية والتعليم، أولا كيتعلّم شي مهنة. بحال هاد الشخص، راجل أولا امرأة، كتكون حياتو أولا حياتها منضمة من خلال مجموعة ديال القواعد اللّي كتبني النظام. هادشي علاش الرياضيين المحترفين كيتزمو بالقواعد والقوانين ديال الرياضات اللّي كيمارسوها. الأساتذة ديال علم النفس كيكرسو نفوسهم لشي إيديولوجيا محددة ولواحد المجموعة ديال القوانين. والأطباء كيتلازمو بالمبادئ والقوانين ديال قسّم أبيقراط أولا القوانين اللّي كتحددها الدولة فين

كيخدمو. في الأخير كلهم تلاميذ وكلهم تحت التربية والتنظيم ديال المبادئ اللي كيفرضها عليهم المجال ديالهم.

نفس الحاجة كتنتطبق على الكنيسة. الكنيسة هي بلاصة فين خاص كلشي في الاجتماعات وبين الجماعة يتدار بنضام وترتيب، كيقول الرسول بولس: "وَلَكِنْ خَاصُّ كَلِّشِي يُكُونُ بِالْإِحْتِرَامِ وَبِالنَّصَامِ" (1 كورنتوس 14:40). هاد الترتيب والتربية هما ضروريين للبنيان ديال الكنيسة.

راه التربية والنضام هما ضروريين في حياة المؤمنين بشكل فردي حتى هو.²⁰ جاي آدامز (Jay Adams) لخص العلاقة بين التربية المنتظمة، التعلّم، والحياة المسيحية بشكل واضح ومزيان، قال: "ملي كنتعمدو وكننضمو للكنيسة، راه حنا كندخلو في المدرسة ديال المسيح. ومن بعد هادشي، في كل حياتنا الأرضية اللي مازال قدامنا، خاصنا نتعلمو (ماشغير الحق بوحده وصافي، ولكن حتى نطيعو وصايا ديال المسيح). هادي هي القوة ديال التعليم، التعليم المدعوم بالتربية ديال النضام، التربية ضرورية باش نتعلمو".²¹

هادشي علاش راه التربية عندها علاقة بالتعليم والتعلّم، عندها علاقة بالنضام والنمو. راه التربية في حياة الجماعة وفي حياة عضو الكنيسة السليم هي اللي كتوقّر جو للنمو والإزدهار الروحي. هي اللي كتوصلنا للكز والنعمة باش نولّيو شوية بشوية كنشبهو للمسيح.

كيفاش داير الانضباط (التربية) في حياة عضو الكنيسة السليم؟

²⁰ متلا قرا 1 تسالونيكي 4: 22 و2 تسالونيكي 3: 6، 11.
²¹ جاي آدامز، دليل الانضباط في الكنيسة: حق وامتياز لكل عضو في الكنيسة (جراند رابيدز، ميشيغان، زوندرفان، 1974)، 16.

جوج أنواع ديال الإنضباط (التربية) كيوقعو في حياة الكنسية السليمة وأعضاء الكنيسة السليمين. وبجوجهم هما نابعين من كلمة الله، وهما في الحقيقة جوج طُرُق باش نفهمو هدف وتأثير كلمة الله في حياة الشعب ديالو.

الرسول بولس قال في 2 تيموتاوس 3: 16: "وَكُتَابُ اللَّهِ كُلُّهُ جَا بِلُوحِي مَنْ عِنْدُ اللَّهِ، وَنَافِعٌ لِلتَّعْلِيمِ وَالتَّنْبِيهِ وَالتَّصْحِيحِ وَالتَّأْدِيبِ فَدَاكُشِّي اللَّي كِيْرَضِي اللَّهِ".

يعني راه الكتاب المقدس اللي جا من عند الله، عندو جوج أهداف عامة: الانضباط التعليمي والانضباط التصحيحي. ملي كتب الرسول بولس وقال بلي الكتاب المقدس "نَافِعٌ لِلتَّعْلِيمِ" و "التَّأْدِيبِ فَدَاكُشِّي اللَّي كِيْرَضِي اللَّهِ"، فراه كان كيهدر على التربية الإيجابية أولا التربية التعليمية. التربية التعليمية كتشير لكيفاش الكتاب المقدس كيشكل وكييني المؤمن المسيحي وهو كيشرب أولا كياكل التعاليم اللي فيه وكييتدرب باش يعيش من أجل الله. كيما الأطباء كيخضعو للمعايير والقسم ديال خدمتهم؛ راه المؤمنين بالمسيح كيخضعو لكلمة الله.

بنفس الطريقة، ملي الرسول بولس كيقول بلي الكتاب المقدس نافع "لِلتَّنْبِيهِ وَالتَّصْحِيحِ"، فراه هنا كيوصف كيفاش كتواجهنا كلمة الله وكتخرجننا من الغلط وكتوصلنا للتقوى اللي كترضي الله. هادا هو الإنضباط التصحيحي (التربية التصحيحية).

الأغلبية الكبيرة ديال التربية أولا التأديب في أي كنيسة غتكون تربية إيجابية أولا تكوينية من خلالها المؤمن كيكبر بالكلمة اللي كيسمعها في التبشير والوعظ، هادشي كيوقع ملي كيكون المؤمن كيدرّس كلمة الله بانضمام وأمانة، وكيبتشكّل من خلال الشراكة الروحية والتشجيع مع الخوت ديالو في المسيح. ولكن مرّة مرّة، الأخ أولا الأخت في الإيمان كيطيحو في شي

دنب وكيحتاجو للتنبيه أولا للتصحيح بالمحبة من أعضاء الكنيسة لخرين اللي عندهم إلتزام ومسؤولية تجاه السلامة والصحة ديال روح الأخ اللي دنب. وزيد على هادشي، راه الكتاب المقدس هدر لينا على مواقف مختلفة فين خاص الكنيسة تتدخل بالتصحيح. ربنا يسوع حدّد لينا الخطوط الرئيسية باش نطبقو عملية التربية أولا التأديب التصحيحي في الحالات اللي فيهم كيخطأ شي أخ أولا أخت ضد مؤمن آخر (متى 18: 15-17). الرسول بولس شجّع كنيسة كورنتوس باش يواجهو واحد الأخ اللي كان طاح في الدنوب كبار وشجّعهم باش يخرجوه من الشراكة ديال الكنيسة (1 كورنتوس 5). التصحيح ديال الكنيسة ضروري ماشي غير ملي يوقع شي "دنب كبير" بحال الزنا، ولكن حتى مع الدنوب الصغار اللي كيبانو ماشي شي حاجة كبيرة، بحال الكسل والتعليم الخاطيء، حتى هما كيتطلبو التصحيح (2 تسالونيكي 3: 6 و11؛ تيطس 3: 10).

حتى واحد مايقدر يعيش حياة كاملة بلا ما يحتاج للتربية أولا الإنضباط، يا كان الإنضباط الإيجابي أولا التصحيحي. هادشي علاش راه عضو الكنيسة السليم كيقبل التربية والتأديب على أساس أنه وسيلة ديال النعمة الإلهية في الحياة المسيحية.

كيفاش نقبلو التأديب بفرح؟

الموضوع ديال التأديب ديال الكنيسة يقدر يكون جديد عليك. أولا تقدر تكون فايت سمعتيه أولا درستيه، ولكن الممارسة والتطبيق ديالو في كنيستك المحلية يقدر يكون حاجة جديدة أو ماعمر الكنيسة طبقاتو. بعض الناس خاصهم يكبرو في الفهم ديالهم بهاد الموضوع المهم، وفي نفس الوقت يواجهو المخاوف ديالهم أولا الأفكار الغالطة، ويساهمو في الصحة الروحية ديال كنيستهم. بغيت نشارك معاكم بعض الاقتراحات باش نبنو رغبة سليمة بالتأديب الإيجابي والتصحيحي باش نكونو أعضاء سليمين في كنائسنا.

قبل كلمة الله بتواضع

الرسول يعقوب كيشجع المؤمنين بالمسيح وكيقول ليهم: "زَمِيؤْ عَلِيكُمْ كُلُّ حَاجَةٍ مُنْجُوسَةٍ وَكَثْرَةُ السَّرِّ، وَفَبَلُّوْا بِالتَّوَاضُّعِ الكَلَامَ الَّذِي رَزَعَهُ اللهُ فِيكُمْ، رَأَهُ هَازِءُ الكَلَامِ هُوَ الَّذِي قَادِرٌ يُنَجِّي حَيَاتِكُمْ" (يعقوب 1: 21). في الكلام والتعليمات ديال الرسول يعقوب كنعلقوا واحد التمييز بين الحياة الفاسدة بالنجاسة والشر والحياة التي كتبشه للمسيح بالتواضع. خاص المسيحيين يقبلو كلمة الله بتواضع. يعني ملي المؤمن يسمع الوعض أولا التبشير بكلمة الله أولا ملي يقرأ الكتاب المقدس، راه خاصو يحط نفسو تحت السلطان ديال الله وخاصو يتواضع قدام كلمة الله، وخاصو يعترف بلي هاد الكلمة هي مصدر النجاة والتعليم في الحياة التي كترضي الله. ملي نوقفو قدام كلمة الله، راه خاصنا نكونو معترفين بالطبيعة المذنبة ديالنا، والفقر ديالنا الروحي قدام الله، واحتياجنا للخدمة ديال الله التي كتعاود تشكنا من خلال الكلمة ديالو.

كيفاش نقدرو نعرفو واش حنا كنسمعو كلمة الله وكنقبلوها بتواضع؟
هاد الأسئلة غاديين يعاونوك باش تلقا الجواب:

- ملي كنقراو الكتاب المقدس، واش كنكونو كنقراو غير باش نعمرو عقولنا بالمعلومات أولا باش نعمرو قلوبنا بالإيمان التي الله كيهدر عليه في كلمتو؟
- ملي كنسمعو الوعض من كلمة الله، واش هدفنا هو نسدو شي إحتياج (متلاً، غير باش ندوزو الوقت أولا باش نستافدو من شي نصائح) أولا هدفنا الرئيسي هو نفهمو المعنى الأصلي ديال الآيات ونطبقوه في حياتنا؟
- واش رد الفعل ديالنا قدام كلامو هو أننا نسؤلور يوسنا: "شنو هو إحساسي مع هاد الكلام؟" أولا نسؤل راسي: "واش أنا قابل هاد الكلام على أنه حق من الله؟" واش كنخليو

- لمشاعرنا يقرّرو شنو اللّي حق وشنو اللّي ما عندو قيمة، أولا
 كنخليو الكتاب المقدس هو اللّي يحدّد مشاعرنا؟²²
- ملّي كنسمعو للوعض أولا كنقراو كلمة الله واش كنكونو
 كندافعو على ريوسنا وكندخلو معا كلام الله في الحرب باش
 يتبت لينا بلّي هادشي اللّي قدّامنا حق؟²³
 - واش كنحكمو على الفلسفات والأفكار من خلال كلمة الله،
 أولا كنجاولو نوافقو بين الكتاب المقدس وهاد الأفكار ديال
 العالم؟ أولا واش كنحكمو على كلمة الله من خلال هاد
 الفلسفات والأفكار لخرين ديال العالم؟

قبول كلمة الله بتواضع يعني قبول الكتاب المقدس بالإيمان، بقلب
 ضريف وخاضع، وبشهادة روح الله. وكيعني بالضبط أنّنا نقبلو حقيقة أن
 الكتاب المقدس هو صحيح وحق، وبلّي هو السلطة الوحيدة اللّي كافية
 باش تشكّل حياتنا، وهو اللّي خاصو يرشد يوگوّد مشاعرنا وأفكارنا. إلا عضو
 الكنيسة السليم دار هادشي، راه كيكون كيوجد راسو للتأديب والتربية ديال
 كنيسة المسيح.

تدرّب باش تشوف التأديب كدليل على محبة الله

إلا كنتي خايف ومشوّش بفكرة أن التربية ديال الكنيسة هي ماشي
 ضريفة وضد المحبة، ماتنساش حقيقة أن الكتاب المقدس كيعلّمنا بلّي
 الله براسو هو أب محب وكياّدب وكيربّي ولادو: "آ ولّدي، ما تُحتَقَرْش
 التّربيّة دُبال الرّب، وّما تُفْسلْش إلا خاصّم عليك. حيث اللّي كينبغيه الرّب
 كيربّيه، وكيضرب كاع ولّاده اللّي كيقبلهم" (عبرانيين 12: 5-6).

²² سي. جي. ماهاني، عيش حياة كنتمحو على الصليب: الجفاض على مركزية الإنجيل (سيسترز، أوريجون:
 مولنتوماه، 2006). الفصل 2.

²³ كان هادا هو موقف الناس الأشرار في رومية 1: 18، 21 اللّي "كينضركو الحق" و"ما عطّوهش العزّ
 والشكّر اللّي كليلق بيه".

راه التربية الّتي كتجي من عند الله هي دليل على محبتو لينا. في أي فرصة الله كيوبّخنا وكيرتينا، خاصنا نكونو متأكّدين من أنه كيتعامل معنا كما الأب كيتعامل مع ولدو. التربية هي عمل ديال المحبة، وماشي انتقام أولا كراهية. والكاتب ديال الرسالة للعبرانيين زاد في كلامو وقال " إِيوَا صُبْرُو مَلِي يُكُونُ الرَّبُّ كَبِيرِيكُم، زَاهُ كَبِيرِيكُم مَعَاكُم بُحَالُ الْبُوعِ وَوَلَادُهُ. وَأَشْنُ كَابُنُ شِي وَوَلَدُ مَا كَبِيرِيهَشُ بَاهُ؟" (عبرانيين 12: 7).

وشنو هو الهدف من التربية والتأديب ديال هاد الأب المُحب؟ كيدير هادشي "باش نخضعو للأب ديالنا الّلي في السما" و "باش نكونو مقدسين بحالو" (عبرانيين 12: 9-10). بالأب السماوي ديالنا بكل محبة كيحمي حياتنا وكيقدّسنا مَلِي كيرتينا وكياؤبنا. عضو الكنيسة السليم كيشوف في هاد التأديب على أنه محبة من الأب ديالو الّلي في السما وكيقبلو على أساس أنه دليل على محبة الله، حيت الكتاب كيقول بلي الناس الّلي ما كياؤبهمش الرب هما ماشي ولادو: "وَلَكِنْ إِلَّا مَا كُنْتُمْ مَرْتَبِينَ بُحَالُ وَوَلَادُهُ لُخْرِينُ، هَادُسِّي كَبِيرِي بَلِي نَتَمُّ مَا شِي وَوَلَادُ شَرَعِيِّينَ" (عبرانيين 12: 8).

قبل التصحيح من الخوت بتواضع

أعضاء الكنيسة السليمين في الروح ماشي غير كيقبلو التربية والتأديب ديال الرب وصافي، ولكن في نفس الوقت كيقبلو بكل تواضع التصحيح ديال الخوت لخرين في الكنيسة. هما كيكونو عارفين وفاهمين بلي التصحيح ديال الرب غالباً كييجي من خلال الأعضاء لخرين في الكنيسة، الخوت المقدسين من الرب الّلي كيديرو جهدهم ماشي غير باش يشجعو بعضياتهم مَلِي يكون كلشي هاني، ولكن حتّى كيواجهو بعضياتهم بمحبة وكيصحّحو بعضياتهم مَلِي واحد من الخوت كيكون محتاج لشي أخ أولا أخت يهدر معاه أولا معاه. عضو الكنيسة السليم كيعرف بلي "التأديب الواضح حسن من محبة مخفية. الجروح ديال الأخ هما جروح أمينة" (أمثال 27: 5-6)

الأغلبية ديال الكنائس اللي كياخدو العضوية بشكل جدي كيطلبو من الأعضاء الجداد يقرأو ويدعمو عهد الإيمان ديال الكنيسة (بيان الإيمان) وبعض المرات كيطلبو من العضو الجديد يسني عليه. عهد الإيمان ديال الكنيسة هو إعلان مكتوب بشكل مختصر كيوضح البنود ديال الإلتزام اللي داروه أعضاء الكنيسة قدام الرب ومع بعضياتهم باش يعيشو الإيمان المسيحي بطريقة كتابية.

ومن بين البنود اللي كيعجبوني بزاف في عهد الإيمان ديال الكنيسة عندو علاقة مع الموضوع ديال قبول المحبة والتصحيح ديال الخوت في الكنيسة، عادة هاد البند كيقول شي حاجة بحال هاكدا:

غادين نتمشّاو في هاد الحياة مع بعضياتنا بمحبة أخوية، كأعضاء في الكنيسة المسيحية، غادي نعتانيو ببعضياتنا وغادي نراقبو بعضياتنا، وغادي نهبو بعضياتنا بأمانة ونصححو بعضياتنا ملي تجي الضرورة.²⁴

"الجاهل كيحتقر الحكمة والتعليم" (أمثال 1: 7)، ولكن راه عضو الكنيسة السليم اللي كيعيش بالتقوى الحقيقية والنضج وكيقبل العليم والتأديب ديال الخوت في الكنيسة.

خاصنا نكونو جديين مع مسؤوليتنا في تأديب خوتنا

الطريقة الرابعة اللي من خلالها نقدرو نقويو رغبة صحّية للتأديب الإلهي هي أننا نكونو جديين مع مسؤوليتنا باش نعاونو خوتنا لخرين بهاد الطريقة. بغيت نشارك معاكم بُند آخر في عهد الكنيسة كيشرح هاد المسؤولية: "غادين نخدمو مع بعضياتنا باش الخدمة إنجيلية الأمانة في كنيستنا تزيد تستمر، من خلال أننا نحافظو على العبادة ديال الكنيسة،

²⁴ تقدر في الملحق تلقا مثال على عهد الكنيسة.

الفرائض الروحية ديالها، التأديب ديالها، والعقيدة ديالها". راه كل عضو في الكنيسة عندو هاد المسؤولية الأساسية وهاد الامتياز باش يعاون في الحفاظ على الإنضباط في الكنيسة المحلية. هادشي علاش دوك الآيات الكلاسيكية، بحال متى 18 و1 كورنتوس 5، اللي كيهدرو على موضوع الدنوب ديال العضو اللي ماتابش، التعليم في هاد الآيات كيكمل بقرار وعمل أخير وحاسم كتديرو الجماعة كلها.²⁵ ولكن التصحيح هو ماشي عمل غير ديال الجماعة بوحدها؛ هاد الخدمة كتبدا ملي كيكون كل مؤمن بشكل فردي منغمس وخدام في المحبة الأخوية وكيدير جهدو باش يعاون الخوت اللي طاحو في الدنوب باش يتوبو ويتجددو.²⁶

ماتنساش تفرح!

يقدر يكون ساهل علينا نفكرو في التأديب ديال الكنيسة غير بالحزن والألم اللي كيجيو من الدنوب وحيث كنكونو فقدنا واحد الأخ أولا الأخت. وهاد الحزن عندو بلاصتو ووقتو، يعني غادي يكون وخاصو يكون حيث كيجي من التأنيب ديال روح الله فينا ومن المحبة ديالنا للخوت وللرب (متى 5: 4؛ 1 كورنتوس 5: 2). ولكن راه عملية التأديب كاملة، من الإنضباط التعليمي والتكويني ديال كلمة الله حتى للتصحيح والتأديب ديال الكنيسة ملي كيخرجو العضو اللي كيعيش في الدنوب بلا مايتوب، راه خاصنا نديرو كل هادشي على رجاء وهدف التوبة اللي كينتجو الفرح والتعزية (2 كورنتوس 2: 6). حنا كنديرو جهدنا باش نربحو خوتنا وخواتاتنا للحق (يعقوب 5: 19-20)، وملي كيوقع هادشي راه خاصنا نفرحو مع الله والملائكة حتى هنا. ربما ماكاينش شي منظر أحسن وأجمل من أننا نشوفو شي أخ أولا أخت كانو مخدوعين ومهدومين بالدنوب كيتحررو من الشدة القاسية ديال الدنوب ونشوفوهم كيعاودو يكتاشفو الحرية والغفران ديال

²⁵ قرا متى 18: 17 و1 كورنتوس 5: 4-5.

²⁶ متلاً قرا متى 18: 15 وغلطية 6: 1.

مُخْلِصَنَا الرَّحِيمِ. كَأَعْضَاءِ سَلِيمِينَ فِي الْكَنِيسَةِ الَّتِي بَاغِبِينَ يَقْوِيُوا الشَّرَاكَةَ فِي الْكَنِيسَةِ دِيَالَهُمْ، نَقْدَرُوا نَشَارِكُوا فِي التَّأْدِيبِ دِيَالِ الْكَنِيسَةِ بِفَرْحٍ وَإِيمَانٍ، وَحِنَانٍ عَارِفِينَ بَلِيَّ الْأَبِّ دِيَالِنَا السَّمَاوِيِّ الْمُحِبِّ كِيرِيَّ وَكِيصَحِّحَ النَّاسَ الَّتِي فِي عَائِلَتِنَا وَالَّتِي كِيحِبُّهُمْ بِكُلِّ أَمَانَةٍ وَحِنَانٍ. خَاصِنَا نَفْرَحُوا بِأَشْ نَشُوفُوا عَمَلَ اللَّهِ الَّتِي كِييَانُ مِنْ خِلَالِ النَّضْجِ وَالتَّوْبَةِ وَالتَّجْدِيدِ دِيَالِ الْخَوْتِ الَّتِي خَدَاوْ نِعْمَةَ التَّأْدِيبِ.

الخُلَاصَةُ

رَاهِ مَسْتَحِيلٌ بِأَشْ أَعْضَاءَ الْكَنِيسَةِ يَهْتَمُّ وَيَعَاوَنُوا بَعْضِيَاتِهِمْ بِشَكْلِ مُفِيدٍ إِلَّا مَاكَانُوا بِزَافٍ دِيَالِ الْخَوْتِ فِي الْكَنِيسَةِ جَدِيَّينَ مَعَ الْمَسْؤُولِيَّةِ دِيَالَهُمْ دِيَالِ تَصْحِيحِ أَوْلَا إِرْشَادِ الْخَوْتِ الَّتِي مَحْتَاجِينَ لِلْمُسَاعَدَةِ. إِلَّا الْأَعْضَاءُ مَاالتَزَمُوا بِأَشْ يَخْدَمُوا وَيَعَاوَنُوا بَعْضِيَاتِهِمْ وَمِنْ خِلَالِ تَعْلِيمِ الْكَلِمَةِ فِي مَدْرَسَةِ الْأَحَدِ أَوْلَا الْقِيَادَةَ دِيَالِ مَجْمُوعَاتٍ صَغِيرَةٍ، وَإِلَّا كَانُوا دِيمَا كِيحَشَمُوا وَمَاكِتَعَرَفُوا عَلَى بَعْضِيَاتِهِمْ وَمَاكِتَحَاكَّوْشَ مَعَ بَعْضِيَاتِهِمْ فِي الْحَيَاةِ الْيَوْمِيَّةِ، رَاهِ مَاغَادِيشَ يَكُونُ الْإِنْضِبَاطُ الْإِيجَابِيَّ وَلَا التَّصْحِيحِيَّ. وَهَاكَذَا الْكَنِيسَةُ دِيَالِ اللَّهِ مَاغَادِيشَ تَكُونُ مَنضَابَطَةً، وَالتَّعْلِيمُ غَادِي يَكُونُ نَاقِصًا، وَالشَّهَادَةُ دِيَالِ الْكَنِيسَةِ غَادِي تَكُونُ مَوْسُومَةً بِالْعَارِ بِسَبَابِ الدَّنُوبِ الَّتِي مَاتَصَحَّحُوا.

بَاشْ تَزِيدُ تَتَعَمَّقُ فِي التَّفْكَيرِ

مَعَ مَجْمُوعَةٍ مِنْ صَحَابِكَ الْمَسِيحِيِّينَ وَأَعْضَاءِ الْكَنِيسَةِ، تَأْمَلُوا وَنَاقِشُوا الْأَسْئَلَةَ الَّتِي كَايْنِينَ فِي هَادِ الْفَصْلِ تَحْتَ الْعِنْوَانِ الْفَرَعِيِّ: "قَبْلَ كَلِمَةِ اللَّهِ بِتَوَاضَعٍ".

العلامة 8:

عضو الكنيسة السليم هو تلميذ كيزيد كيكبر

عضو الكنيسة السليم هو عضو ديما كيزيد كيكبر وينضج.

راه مُستحيل نفضلو الصحة ديال الكنيسة المحلية من الصحة ديال أعضائها. ومُستحيل نفضلو السلامة والصحة الروحية ديال عضو الكنيسة من النمو الروحي والتلمذة ديالو.

ملي المؤمن ماكيزيدش كيكبر

هادي فكرة ديالي، كنضن بلي أكبر مشكلة كتواجه الكنائس والمؤمنين المسيحيين هي عدم وجود نمو روحي متناضم ودايم وغادي كيتطوّر في عملية التلمذة ديال المؤمنين. كلنا نقدر نعرفو شي مؤمنين عتارفو بالإيمان وتابو، ولكنهم للأسف كيعتارفو وكيقولو بلي هما ماكبروش في الإيمان ديالهم من مدة طويلة. هاد الحالة كتبان في جوج أشكال. المؤمن المسيحي مرّة مرّة كيوواجه بحال الصعوبات أولا المشاكل الروحية الوقتية وخاصو يتغلب عليهم. هادي حاجة طبيعية ماخصهاش تخوفنا أولا تفسّلنا. في هاد الحالة ممكن خاصنا نغيّرو الروتين ديالنا أولا نعاودو نصلحو ونوجّهو التركيز ديالنا، ولكن هنا المشكلة مازال ماشي خطيرة.

ولكن كينين صعوبات اللي كيكونو خطر على المؤمن. في هاد الحالات، الإنسان ممكن مايكونش قادر كيكبر في الإيمان ديالو لمدة طويلة. كيكونو بحال طاحو في حفرة غارقة وماشي غير زلقو وخاصهم ينوضو

وصافي. وماكيكونوش غير "واحلين" وكيديرو كل ما في جهدهم باش يتحرّر؛ بحال كيكونو طاحو في شي كومة روحية وصعيب يفيقو منها. إلا بقاو ناعسين في هاد الكومة لمدة طويلة، ممكن غيفكرو بلّي مابقاوش قادرين يزيدو يكبرو في المسيح أولا حتى يقدرو يفكرو بلّي باش يتبعو المسيح هو حاجة خاوية أولا سطحية. وهنا النمو الروحي في المسيح ماكيقاش في الرادار ديالهم. التكبر اللّي كيسيطر عليهم يقدر يخليهم يفكرو ويقولو: "أنا وصلت للغاية الروحية ولخط النهاية ديال السباق، مابقا فين نزيد".

إلا وقع هادشي، راه هادشي خاصو يكون إنذار كبير وضو حمر كيشعل! في العالم الروحي الفردي والخاص ديال المؤمن، ممكن هاد المشاكل يدوزو بلا مايلاحضوهم الخوت لخرين في الكنيسة، وبلا ميهدر عليهم حتى واحد، وبلا أي تصحيح لمدة طويلة.

التقدم في معرفة المسيح والتشبه به والنضج الروحي والتقدم الدائم فيه خاصهم يكونو أمور طبيعية في حياة المؤمن بالمسيح. هادشي علاش كلمة الله في الرسالة للعبرانيين كشتجعنا وكتقول: "خَاصْنَا نُخَلِّيو الدُّرُوسَ اللُّوْلِيْنَ اللِّي تَعَلَّمْنَاهُمْ عَلَى الْمَسِيحِ، وَنَزِيدُو نْتَعَلَّمُو بَاشْ نُكُونُو كَامِلِينَ" (عبرانيين 6: 1). كلمة الله في هاد الفصل كتقول بلّي المؤمن من بعد واحد المدة ديال الوقت خاصو يتقدم ويكبر في حياتو الروحية، كتقول كلمة الله: "رَاهْ كَانْ خَاصُّكُمْ نُكُونُو مُعَلِّمِينَ حَيْثُ كَانْ عِنْدَكُمْ الْوَقْتُ الْكَافِي، وَلَكِنْ نُنَّمِّ بَاتِي خَاصُّ اللِّي بَعَلَّمَكُمْ الدُّرُوسَ اللُّوْلِيْنَ فِكَلَامِ اللَّهِ، وَمَا زَالْ مُخْتَاجِينَ لِلْخَلِيْبِ مَا شِي لِلْمَاكَلَةِ دِيَالِ الْكِبَارِ. حَيْثُ اللِّي كَيَعِيشْ بِالْخَلِيْبِ، مَا كَيْفَهْمَشْنْ كَلَامِ الْحَقِّ، حَيْثُ مَا زَالْ دَرِّي صَغِيرُ فَا لِإِيْمَانْ" (عبرانيين 5: 11-13).

حتى الرسول بولس كان هدر على راسو وعطانا مثال على كيفاش نقدر ونبقاو متواضعين باش نقدر ونبقاو نكبرو في الروح:

"وَرَأَيْتُ مَا كُنْتُ كُؤُلُوسُ بَلِي زَبْحَتْ وَلَا وُلَيْتُ كَامِلًا، وَلَكِنْ كُنْدِيرُ جُهْدِي بَاشْ نَزْبِحْ دَاكْسِي اللَّي عَلَيَّ وَدُهُ زَبْحِي الْمَسِيحُ يَسُوعُ مِنْ قَبْلُ. وَفَالْحَقِيقَةُ آ الْخُوتْ، رَاهَ مَا كُنْخَسْبَشْ رَاسِي زَبْحَتْ، وَلَكِنْ كُنْدِيرُ حَاجَةَ وَحْدَةَ: كَسِّي دَاكْسِي اللَّي وَرَايَ وَكُنْدِيرُ جُهْدِي كَلَّهُ بَاشْ نُوَصَلْ لِدَاكْسِي اللَّي فُدَّامِي. كُنْجَرِّي لَجَهَّةُ الْغَرَضِ اللَّي بُغِيَتْ نُوَصَلْ لِيهْ، بَاشْ نَزْبِحْ الْجَائِزَةَ اللَّي عَيْطُ لِي عَلِيهَا اللَّهُ مِنْ السَّمَا بِالْمَسِيحِ يَسُوعُ" (فيلبي 3: 12-14)

ومن بعد في الآية 15 عطا هاد النصيحة للمؤمنين: " وُحْنَا اللَّي كَامِلِينَ، خَاصَّةً نَفْكَرُو بَهَاذِ الطَّرِيقَةِ" (فيلبي 3: 15أ).

راه طبيعي باش المؤمن بالمسيح ينمو ويكبر، وطبيعي باش يخدم ويجتاهد باش يكبر، وطبيعي باش يتسنَّ يشوف نمو روجي متناضم ومستمر. هادو هما أعضاء الكنيسة السليمين والصحيين.

المشاكل في فكرتنا على النمو

ولكن راه المشكل ما كيتحلش غير إلا قلنا بلي المؤمن المسيحي خاصو يتوقَّع النمو، وخاصو يجتاهد باش ينمو، وخاصو يعيش ويختابر النمو في حياتو الروحية. راه باش المؤمن المسيحي يكبر بطريقة صحية وسليمة، راه خاصنا في اللول نوضحو شنو هو النمو وشنو اللي هو ماشي نُمُو. تقافتنا وأفكارنا هما سطحيين كيركزو على العلامات الخارجية وكيتجاهلو الحالة الواقعية الداخلية. كترتأحو باش الناس يفكرو بلي حنا ناضجين كتر من أننا بالحق نكونو ناضجين، هدفنا ماشي هو أننا نكونو ناضجين، هدفنا هو الناس يفكرو أننا ناضجين.

التعليم ديال المسيح في لوقا 18 كيعاوننا نحدِّدو على الأقل جوج ديال المواقف في تفكيرنا اللي كيكون عائق قدام النمو الكتابي والتلمذة الكتابية:

وَكَاُنَ هَآذِ الْمَتَالِ لِلنَّاسِ اللَّيِّ كَانُو كَيَحْسَبُو رُبُوسَهُمْ عَلَى حَقِّ،
 وَكَيَحْتَقِرُو لِحَرِينِ: «هَادُو جُوجُ رَجَالِ ظَلَعُو لُبَيْتِ اللّٰهِ بَاشِ يَصَلِّيُو،
 وَاحُدْ مِنْهُمُ فَرَيْسِي وَلَاخُرْ مِنْ مَالِيْنَ الصَّرِيْبَةِ. وَقَفْ الْفَرَيْسِي كَيَصَلِّي
 وَكَيَكُوْلُ فَخَاطِرُهُ: كُنْشَكَرْكَ آ رَيِّي، عَلَاحْقَاشْ رَايِي مَاشِي بُحَالِ كَآغُ
 النَّاسِ الشَّفَارَا وَالصَّالَمِيْنَ وَالْفَاسِدِيْنَ، وَمَاشِي بُحَالِ هَآذِ مُوْلِ
 الصَّرِيْبَةِ! أَنَا كُنْصُومُ جُوجُ مَرَاتِ فَلِلسِيْمَانَةِ، وَكُنْعَشْرُ عَلَى كَآغُ دَاكْنِي
 اللَّيِّ كَرْبِيْحُ. أَمَا مُوْلِ الصَّرِيْبَةِ، بُعِي وَاقْفُ بُعِيْدُ وَمَا فُدْرَشْ يَهْرُ عَيْنِيَه
 لِّلْسَمَا، وَلَكِنْ كَانْ كَيَضْرِبُ عَلَى صَدْرِهِ وَكَيَكُوْلُ: اللّٰهُمَّ رَحْمِنِي، أَنَا
 الْمُدْنِبُ!». نَكُوْلُ لِيَكْمُ: «رَاَهْ هَآذِ مُوْلِ الصَّرِيْبَةِ هُوَ اللَّيِّ مَشِي لَدَارِهِ
 وَاللّٰهُ رَاضِي عَلَيْهِ، مَاشِي هَآدَاكُ الْفَرَيْسِي. عَلَاحْقَاشْ كَآغُ اللَّيِّ كَيَعَلِّي
 مِنْ سَانِهِ، سَانَهُ غَيَطِيْحُ. وَلَكِنْ اللَّيِّ كَيْتَوَاضِعُ، سَانَهُ غَيَعَلَا». (لوقا
 14:9-18)

ثلاثة ديال الحوايج في التفكير ديال الفريسيين منعاتهم من النمو في
 التقوى.

1) فخ الأداء. في كل الرياضات، الحُكام كيسجلو الإحصائيات الخاصة
 بالأداء ديال كل لاعب – عدد الأهداف، أولا السرعة في السباق، شحال من
 قوانين خالف اللاعب، شحال من مرّة سرق الكورة، شحال المسافة اللي
 يقدر ينقز، وغيرها من الأمور حسب الرياضة. غالبًا كتتلخص القيمة ديال
 الرياضي في هاد الإحصاءات. والناس اللي كيقدرو يعمرّو الإحصائيات
 ديالهم بالأداء المزيان والإنجازات هما اللي كيوليو أبطال، والناس كيفرحو
 بيهم وكيمجدوهم وكبخادو الجوائز.

الفكرة ديالنا على النمو المسيحي تقدر تتأثر بهاد العقلية ديال الإنجازات
 والأداء. لاحظ معايا كيفاش أن هاد الراجل الفريسي هدر مع الله على راسو
 وعلى كل الأعمال الصالحة ديالو. هو عبر النمو حسب الأهداف والأداء
 الخارجيين اللي ممكن يتشافو – صام جوج مرّات في السيمانة وعطا العشور

على فلوسو. حتّى حنا نقدر نديرو هادشي. نقدر نكونو كنركزو على شحال من مزة قربنا الكتاب المقدّس في السيمانة، وشحال من مزة عطينا شي نسخة من الإنجيل للنّاس، أولا شحال من مزة شاركنا فيها الإنجيل مع شي شخص جديد. نقدر نطرحو في فخ ديال الأداء والأعمال، وهكدا غنوليو نفكرو بليّ النمو الروحي والتلمذة كيغنويو أنّا نديرو أعمال صالحة. إلا طحنا في هاد الفخ، راه النمو والقيمة دياولنا كيوليو مرتابطين بشكل غلط "بالأداء" ديالنا.

2) كنهكمو من خلال المعايير الخاطئة. حاجة خرا غالبًا كتشوّش المسيحيين في الموضوع ديال النمو هو أنّا كنقارنو نفوسنا مع ناس خرين. بزاف ديال المؤمنين كيديرو هادشي. الفريسي فتاخر قدام الله بليّ هو "ماشّي بحال كاع النّاس الشّقازا والضّالمين والّفاسدين، وماشّي بحال هاد مول الصّريّة". تخيل معايا هادشي! تكون راع كتصليّ قدام الله وفي نفس الوقت كتتحكم على الشخص الليّ كيصليّ حداك وكتشكي بيه وكتعايرو! جونتان إدواردز عطانا طريقة حسن من الطريقة ديال الفريسي في الصلاة. قال:

أنا خديت قرار، باش نتصرف بالكلام وبالفعل، من كل النواحي، بحال لو أنني أكثر شخص خاطي في العالم وماكين حتّى واحد بحالي، أولا درت نفس الدنوب الليّ دارو الناس لخرين وكتر، أولا كنتصرف على أساس أنني عندي نفس العيوب والدنوب بحال الناس لخرين، وهادشي غادي يخليني نحس بالعار وبالذنب بسباب دنوبي أنا، وقدام الله غادي غير نعتارف وصافي.²⁷

إلا ركّزنا على الناس لخرين باش نحاولو نبررو نفوسنا قدام الله أولا باش "نمجدو نفوسنا" على أنّا "عضماء ديال الإيمان"، فراه ماغاديش نكبرو في

²⁷ أعمال جونتان إدواردز، الجزء 1 (بيبودي، ماساتشوستس: هنديكسون، 1998)، 62.

الإيمان كيما لازم، ولكن تما غاديين نكونو كنخدعو ريوسنا في التفكير على أننا حسن من الواقع والحقيقة ديال حالتنا. ونقدرو نكونو متيقنين على أن الله غادي يهرس التكبر ديالنا باش يخلينا نتواضعو. هادشي علاش مزيان ليانا نتواضعو ونتيقو في النعمة ديال الله حسن ليانا من أننا نقاوموه بسباب التكبر ديالنا (يعقوب 4: 6؛ 1 بطرس 5: 5).

3) الاعتماد على القوة أولا الجهد الشخصي في النمو الروحي. هادا خطأ آخر من الأخطاء اللي دارهم الراجل الفريسي. بالنسبة ليه الله خاصو يرضاه عليه بسباب الجهد ديالو الداتي والقوة ديالو. ولكن راه الجهد الداتي ماشي هو مصدر النمو الروحي الحقيقي. كلمة الله في الرسالة للعبرانيين كتشجع المؤمنين بهاد الحق: "خَاصَّنَا نُخَلِّيوُ الدُّرُوسَ اللُّوْلِينَ اللِّي تَعَلَّمْنَاهُمْ عَلَي الْمَسِيحِ، وَنُزِيدُو نَتَعَلَّمُو بَاشْ نُكُونُو كَامِلِينَ، وَهَادِشِي اللِّي غَنْدِيرُو إِلَّا بَعَا اللّهِ" (عبرانيين 6: 1، 3). الكتاب المقدس كيعلما بلي التقدم ديالنا في التلمذة والنضج الروحي كييعتمد على نعمة الله وعلى المشيئة ديالو، وماشي على الجهد ديالنا الداتي والقوة ديالنا. هادشي علاش الرسول بولس شكر الله على النمو ديال المؤمنين بالمسيح (2 تسالونيكي 1: 3) وهادشي علاش صلى لله باش يزيد يستمر هاد النمو (1 تسالونيكي 3: 11-13؛ كولوسي 1: 10). الله بغانا ووضانا باش نكبرو ونضجو ونتقوا في الروح (2 بطرس 1: 8-5، 3: 18)، ولكن راه كل المجهودات ديالنا كييعتAMDو على الله وعلى بيه باش نوصلو للنمو الكيتابي.

هادشي علاش ماخصناش نخلطو بين النمو الكيتابي والأداء الخارجي بوحدو، ومايمكنش نعبرو النمو الروحي ديالنا من خلال أننا نقارنو نفوسنا مع الناس لخرين. كخلاصة، راه النمو الروحي ديالنا ماكييعتمدش على مجهوداتنا الداتية والشخصية وعلى إنجازاتنا. إذن شنو هو النمو الكيتابي وكيفاش يقدر عضو الكنيسة السليم يوصل ليه؟

النمو اللّبي بغينا نشوفوه

عضو الكنيسة السليم عندو إهتمام ورغبة باش يكبر وينمو بشكل شخصي وباش أعضاء كنيستو حتّى هما يكبرو. مارك ديفر قال: "الخدمة اللّبي كنديرو باش نقوِّو التلمذة وباش نشوفو النمو ديال المؤمنين كييعطي مجد لله وماشي لينا حنا. هادي هي الطريقة اللّبي الله كيورّي بيها نفسو في العالم".²⁸ بما أن الاهتمام بمجد الله خاصو يكون هو الأهم في حياتنا كمؤمنين، راه اهتمامنا بالنمو خاص يعمر حياتنا وفكرنا.

كابين بزّاف ديال الفقرات والآيات في الكتاب المقدّس كيعلّمونا نوع النمو اللّبي خاص أعضاء الكنيسة السليمين يقلبو عليه ويشوفوه في نفوسهم وفي الناس لخرين. مثلاً، غلاطية 5: 22-25 كتعلّمنا على تمار الروح، اللّبي هما أدلة على عمل الروح القدس فينا، والشخصية اللّبي كتتميّز الناس المؤمنين اللّبي ماكيعيشوش حسب القوة دياهم والطبيعة دياهم الخاطئة، ولكن كييعيشو حسب الروح. كييقول الرسول بطرس "كَبُرُو فَالْتَّعْمَةَ وَفَمَعْرِفَةَ رَبَّنَا وَمُنْجَبًا يَسُوعَ الْمَسِيحُ" (2 بطرس 3: 18).

الرسالة ديال أفسس 4: 11-13 كتفكرنا بلّبي الرب كيزرع ناس موهوبين في الكنيسة بغرض النمو "يُبْنِيُو الدَّائِثَ دِيَالِ الْمَسِيحِ، حَتَّى نُؤَلِّيُو كَلَّنَا مُتَّأَخِّدِينَ فُالْإِيمَانَ وَفَمَعْرِفَةَ وَوَلَدِ اللَّهِ، وَنُؤَلِّيُو نَاضِحِينَ وَكَامِلِينَ فَالْمَسِيحِ".

نقدرو نلخصو كل هاد الصور والنصائح إما في كلمة "تقوى (يعني البر)" أولاً كلمة "القداسة". النمو اللّبي بغينا يكون فينا، هو ماشي غير نمو خارجي وسطحي، هو نمو في التقوى أولاً القداسة، النمو باش "نولّيو ناضحين وكاملين في المسيح". عضو الكنيسة السليم واللّبي كيزيد كيختابر النمو هو

²⁸ مارك ديفر، تسعود ديال العلامات لكنيسة الصحية (ويتون، إلينوي: كروسواي، 2004)، 214.

المؤمن الّلي شوي بشوي كيوي كيشبه للمسيح في القلب والفكر والكلام والعمل. هادشي الّلي بغينا نشوفو في كنائسنا وفينا حنا وفي خوتنا.

النمو باش نولي بحال المسيح

كيفاش عضو الكنيسة السليم يقدر يوصل لنمو بحال هادا؟ بغيت نشارك هنا بعض الاقتراحات والنصائح باش نزيدو نكبرو في التقوة أولا القداسة في الحياة ديالنا.

تبت في المسيح

قال المسيح:

"أَنَا الدَّالِيَّة وَنُتَمَّ العُرُوش. الّلي تُتَبَّ فِي وَأَنَا فِيهِ رَاهُ هُوَ الّلي عَيْعِي غَلَّةٌ كَثِيرَةٌ، حَيْثُ رَاكُم بَلَايِي مَا تُقَدَّرُو تُدِيرُو حَتَّى حَاجَةٌ. وَإِلَّا كَانَ شَيْ وَاحِدٌ مَا تَابَّشُن فِي عَيْتَرَمِي عَلَي بَرَّا بِحَالِ العُرُوشِ وَعَيْيَبَسُن، وَعَيْجَمَعُوهُ وَعَيْزَمِيُوهُ فَالعَافِيَةُ وَيُتَحَرَّقُ. وَلَكِنْ إِيَّا تَبْتُو فِي وَتَبَّتْ كَلَامِي فِيكُمْ، طَلَبُوا الّلي بَغِينُوا وَرَاهُ عَيْكُونُ لِيكُمْ. وَبِهَادِشِي كَيْتَعَطَى العُرُ لَبَا: مَلِي تُعْطِيُو غَلَّةٌ كَثِيرَةٌ وَتَكُونُوا تَلَامِيْدِي." (يوحنا 15: 8-5)

الحل باش نكبرو في القداسة هو نتبتو في الكرمة الحقيقية الّلي هي المسيح يسوع. في هاد الحالة راه نتبتو في المسيح ونعطيو تمار الروح هو النتيجة ديال حاجة وحدة الّلي هي "التبات والإعتماد ديالنا الكامل على الكرمة، والإيمان ديالنا، ونقبلو نعيشو في شراكة معاه ومع كل المؤمنين".²⁹ هاد النتيجة كتجي مَلِي كلمة الرب كتزرع وكتتبت في تلميذ المسيح. "بحال

²⁹ د. أ. كارسون، إنجيل يوحنا: مقدمة وتعليق، تعليق بيلار على العهد الجديد (جران رابينز، ميشيغان: إيردمانز، 1991)، 517.

هاد الحق خاصو يتبت في الفكر وفي القلب ديال التلميد بشكل كيخلي التَّشْبُه بالمسيح وطاعتو يكونو هما أمور طبيعية في حياة هاد التلميد".³⁰ راه التبات في المسيح، والتبات في كلمتو، هما أساسيين في التلمذة المسيحية ديال المؤمن والنمو ديالو السليم.

ستعمل الوسائل العاديين ديال النعمة

بزاف ديال المؤمنين المسيحين كيفكرو بلي التقدم في النمو الروحي ممكن نوصلو ليه غير بخطوات كبار وقاسحين. كيفكرو بلي النمو الروحي هو نتيجة للأعمال والعادات الصعاب. ولكن كيما يآلاه شفنا في يوحنا 15، راه الوسائل العاديين ديال النعمة هما اللي عادة كينتجو النمو والنضج في الحياة الروحية. في الحقيقة، راه الأمور الصعبة والعجبية يقدرو يتلقو الناس ويشوشوهم وماشي العكس، أما كلمة الله من خلال الفهم ديالها والدراسة ديالها راه معمرها غتلقنا. "الوسائل العاديين ديال النعمة" كتلقاو فيهم دراسة كلمة الله، والمشاركة في المعمودية وعشاء الرب مع خوتنا في الكنيسة، والصلاة. هادو هما الطرق المعروفين اللي من خلالهم الله كيغطي النعمة ديالو وكيستعمل حياة المؤمن. راه كلمة الله هي اللي كتعلن لينا على المسيح وكتمجدو. ولكن راه في المراسيم ديال المعمودية وعشاء الرب فين كنشوفو المسيح والإنجيل ملي كنكونو كنتفكرو الموت والدفن والقيامة ديالو على ودنا وعلى ود النجاة ديالنا.

المسيحي السليم ماكيهملش وماكيتهاهلش هاد المراسيم أولا الفرائض وماكيتهاهلش الوسائل ديال النعمة، بالعكس، كيقلهم وكيفرح بيهم، وكيجد راسو على ودهم، ومن خلالهم كيتأمل بكل الحواس ديالو المجد ديال المسيح المُخْلِص ديالنا. من خلاهم كنتفكرو النعمة ديال الله "اللي فيها النَّجَا لِكُلِّ النَّاسِ، وَاللي كَتَعَلَّمْنَا نُبْعُدُ عَلَيَّ الْفُسَادِ وَعَلَيَّ شَهَوَاتِ"

³⁰ كارسون، إنجيل يوحنا، 517.

الدُّنْيَا، وَنُعِيشُو بِالْعَقْلِ وَالصَّلَاحِ وَالتَّقْوَى فَهَذَا الدُّنْيَا" (تيطس 2: 11-12).
المؤمن المسيحي السليم كيبدا كتر وكتر يعتامد على نعمة الله الّلي كييعطيها
ليه الله من خلال كلمتو والفرائض الّلي عطا للكنيسة المحلية.

شارك في الكنيسة المحلية

كلمة الله في العبرانيين 10: 25 كتوصينا باش مانهملوش الجماعة ديال
المؤمنين. ولكن خاصنا نجتعمو ونشجعو بعضياتنا كتر وكتر ماحد النهار
الّلي غيرجع فيه المسيح غادي وكيقرب. الإجتماعات ديال الكنيسة
المحلية هما مهمين وضروريين باش المؤمنين يكبرو ويتقواو. إلا هملنا
المشاركة في الحياة الجماعية ديال الكنيسة أولا فشلنا باش نخدمو خوتنا
ونعطيهم فرصة باش يخدمونا راه غنكونو كنديرو عقبة قدام النمو ديالنا.
الرسول بولس في رسالة أفسس 4: 11-16 كييعطي حُجّة وسبب قوي
علاش المُشاركة في جسد المسيح هي الطريقة الرئيسية الّلي بيها كيقيونا
المسيح وكيخلّينا نكبرو في حياتنا الروحية. ملي كنخدمو خوتنا في الكنيسة،
وكنصبرو مع بعضياتنا، وكنحبو بعضياتنا، وكنصححو بعضياتنا، وكنشجعو
بعضياتنا، راه هنا كنكونو كنشاركو في نوع من "النضج الروحي المُتبادل"
وهنا الموارد ديالنا كيتضاعفو. والنتيجة النهائية هي النمو والتلمذة ديالنا
كمسيحيين.

رگز عينيك على الرجوع ديال المسيح

وفي الأخير، راه المؤمن كيكبر في القداسة من خلال أنه كيتأمل في
الرجوع ديال المسيح وكيخلّي عينيه مركزين في هاد الحق. الأغلبية ديال
الإشارات على الرجوع ديال المسيح في العهد الجديد هما مرتابطين مع
التشجيع على القداسة والنقاوة الروحية. متلاً، في متى 24 ملي يسوع سالا
من تعليم التلامد ديالو على الرجوع ديالو الثاني، ختم كلامو بواحد النصيحة
بسيطة، شجعهم باش "يكونو واجدين"، وباش يتستاو الرجوع ديالو، وباش

يعيشو حياة كتناسب الإيمان ديالهم وهما كيتسناوه يرجع. ومن بعد في الفصل 25 كتنلقاو ثلاثة ديال الأمثال، كلهم كيشجعو المؤمنين باش يتسناو الرجوع ديال المسيح، يعني يركزو عينهم على هاد الحق، وباش يبقاو أمناء حتى نهار يرجع. الرب يسوع علمنا بلّي خاصنا ديما نتفكرو ومانسناوش الرجوع ديالو، وراه إلا درنا هادشي راه غادي نكونو كنعميو حياتنا روحية وكنكبرو في الإيمان ديالنا.

رسالة تيطس 2: 13-14 كتقول: " وَحَنَّا كُنْتَسْنَاوُ النَّهَارُ الْمُبَارَكُ الَّذِي كُنْتَرَجَاوُهُ، وَالْعَزُّ الَّذِي عَيَّبَانُ دِيَالِ إِلَاهِنَّا الْعَظِيمِ وَمُنَجَّبِنَا يَسُوعُ الْمَسِيحِ، الَّذِي عَطَى حَيَاتَهُ عَلَيَّ وَدَنَا بَاشْ يُفِيدِنَا مِنْ كُلِّ إِثْمٍ، وَبَدَدْنَا شَعْبَ دِيَالِهِ ظَاهِرٌ وَمُنْتَحَمَسٌ بَاشْ يُدِيرُ أَعْمَالَ الْخَيْرِ". يعني أننا كمؤمنين كنشوفو في الصليب والرجوع الثاني ديال المسيح وكنتفكرو بلّي المسيح دار كل ماخص يتدار باش يفدينا ويطهرنا ويقدّسنا. الرسول يوحنا قال تقريبا نفس الكلام في الرسالة ديالو اللّولى:

"آخُوتِي الْعَزَّازُ، حَنَّا دَابَا وَوَلَادُ اللَّهِ، وَمَا زَالَ مَا بَانَ آشْنُو عَنكُونُو مَنْ بَعْدُ، وَلَكِنْ كُنْعَزْفُو بَلِّي فَأَلَوْفْتُ الَّذِي عَيَّبَانُ فِيهِ الْمَسِيحِ، عَنكُونُو بَحَالِهِ غَلَاخْقَاشْ عَنشُوفُوهُ كَمَا هُوَ. الَّذِي عَنَدُهُ هَادُ الرَّجَا فَالْمَسِيحِ، كَيُولِّي نَقِي كَمَا الْمَسِيحُ نَقِي" (1 يوحنا 3: 2-3)

راه الشوق ديالنا باش نكونو مع يسوع وباش نشوفوه كيشجعنا وكيقويننا باش شوية شوية باش نوليو كنشبهو ليه في القداسة ديالو. الشوق للرجوع ديال المسيح كيخلينا نكبرو ونضجو باش نوليو كتر وكتر أعضاء سليمين في الكنيسة.

الخلاصة

عضو الكنيسة السليم هو عضو الكنيسة الّتي كيستمر في النمو في حياتو الروحية. وبالتحديد هو أولاً هي عضو في الكنيسة الّتي شوي بشوي كيولي كيشبه للمسيح، وكينضج، وكيكبر في القداسة ديالو. هاد النّضج والقداسة هما نتيجة للإعتماد على المسيح وعلى كلمتو وعلى خوتنا في الكنيسة المحلية. وحاجة خرا زوينة في هادشي هي أنّنا ماعمرنا غادين نحسبو في النمو ديالنا حتّى نوليو بحال المسيح بشكل كامل نهار نكونو معاه!

باش تزيد تتعمّق في التفكير

1. واش كنتي كتبع شي طُرُق غالطين مّلي كتعبر النمو أولاً كتفكّر فيه؟ إلا الجواب هو أه، شنو هما هاد الطُرُق؟ شنو كتضن خاص يتبدل في المنضور ديالك على النمو؟ شنو هما النصائح الّتي أعضاء مجموعتك كينصحو بيهم في هاد الشي؟
2. مع مجموعة من صحابك الأصدقاء المسيحيين وأعضاء الكنيسة، ناقشو كيفاش كبرتو في الإيمان مؤخرًا. كيفاش النعمة ديال الله كتزرع فيكم رغبات وعادات مقدسين؟
3. شمن استراتيجيات ديال النمو الروحي نت محتاج في حياتك حاليًا؟ كيفاش غتطبّق هاد الاستراتيجيات؟

العلامة 9:

عضو الكنيسة السليم هو مؤمن متواضع

الصحة الروحية ديال الكنيسة المحلية كيعتامدو على التعامل والتجاوب ديال الأعضاء مع القيادة ديال الكنيسة. راه الطريقة اللي الخوت في الكنيسة بيها كيقبلو القادة في كنيستهم أولا كيرفضوهم عندها تأثير كبير ومباشر على الخدمة الأمانة ديال الكنيسة والصحة الروحية ديالها. واش الجماعة ديال المؤمنين كتقبل الوعض الكتابي كتعطيه قيمة كبيرة؟ واش الأعضاء ديال الكنيسة كيتبعو القادة في المواقف الصعاب أولا في المواقف ملي الطريقة ماشي واضحة؟ واش كيقفوا مع القادة ديال كنيستهم أولا كيهاجموهم إلا فشلات شي فكرة أولا شي حُطة؟

اللي بغيت نقول هو أن أعضاء الكنيسة بشكل عام هما اللي قادرين يشكّلوا الكنيسة المحلية أولا يهدموها. راه التشكيل ديال الكنيسة أولا الهدم ديالها بجوج عندهم علاقة كبيرة بالمواقف والتعامل ديال الأعضاء مع القادة ديالهم أولا القيادة في الكنيسة بشكل عام.

إذن راه إلا بغينا نفهمو مزيان شكون هو عضو الكنيسة السليم راه مانقدروش نهملو العلاقة بين أعضاء الكنيسة والقادة ديال الكنيسة. وراه طبيعي إذن باش نشوفو الكلمة ديال الله اللي وحا بيها كتقدم تعليمات كثيرة على شنو خاص يفكرو ويديرو أعضاء الكنيسة اللي باغيين يساهمو في الصحة ديال كنائسهم المحلية من خلال أنهم يتبعو القيادة اللي عين الله في الكنيسة.

موقف عضو الكنيسة السليم من القيادة

كابينين على الأقل ثلاثة ديال مواقف كتميز عضو الكنيسة السليم في موضوع طاعة القادة ديال الكنيسة المحلية.

1) كيكترم الشيوخ. بزاف ديال الآيات في الكتاب المقدس كيوصيو أعضاء الكنيسة باش يكرمو شيوخ والقادة ديال الكنيسة. متلاً، رسالة تيموتاوس اللولى 5: 17 كتقول: "زاه المسؤولين ذ الكنيصة اللي كيديرو خدمتهم مزيان، كنيستاهلو يتغظاهم كتر (نكرموهم)، خصوصاً اللي عندهم مسؤولية كبيرة فالوعظ والتعليم". كيفاش نقدر نديرو هادشي؟ الرسول بولس هدر على جوج ديال الحوايج في الآيات اللي جاو من بعد. التكريم ديال الشيوخ حسب الآية 18 كييعني نعاونوهم مع إحتياجاتهم المادية والجسدية. الجماعة والعضو اللي كيكرمو القادة ديالهم كيوفرو أجر مناسب وكافي للقادة ديالهم، خصوصاً القادة اللي عاطين وقتهم كامل للكنيسة وخدمة الرب.

الآية 19 الرسول بولس قال بلي التكريم ديال القادة ديالنا داخل فيه حماية السمعة ديالهم. الرسول بولس كيوصينا وكيقول: "ما نقبلش شي تهممة على شي مسؤول ذ الكنيصة، من غير إلا كانوا جوج شهود ولا ثلاثة". الرسول بولس كييعرف كتر منا كلنا بلي الخادم ديال الرب هو ساهل يتعرض للتهم والانتقادات والشكاوي من خارج الكنيسة ومن الداخل ديالها. عضو الكنيسة السليم كيعاون في الحماية ديال الراعي من الهجمات والضربات اللي ماعندهم لا ساس لا حق. الشائعات والظلم والكذب كيموتو عند الودن وماكيدخلوش للفكر ديال عضو الكنيسة السليم اللي كيرفض يعطي قيمة للقبص اللي ماعندها لا ساس ولا دليل.

عضو الكنيسة السليم كيكترم الخدمة ديال الشيخ وكيعطيها قيمة كبيرة. هو أولاً هي كيقدر، وكيحترم المؤمنين المقدسين اللي كيخدمو شعب

الرب كشيوخ وكيشكروهم. كؤمنين كنكروم الرُعاة ديالنا حيت في النهار اللي فيه غادي نشوفو الرب غادي يكونو إفتخار ديالنا (2 كورنتوس 1: 14).

(2 كيوزي محبة للقادة بقلب مفتوح. راه التكريم والاحترام اللي كيعطيه عضو الكنيسة للشيوخ ديال الكنيسة ماشي بحال التكريم والإحترام الرسمي اللي كيعطيه شي عسكري للقائد ديالو من بعيد. الكرامة اللي كيستحقها الراعي خاص تجي مع محبة مفتوحة. الرسول بولس وصى الكنيسة ديال كورنتوس بزاف ديال المرات باش يفتحو ليه قلوبهم باعتبارو هو الشخص اللي كيهتم بيهم روحياً:

"زَاه تَكَلَّمْنَا مَعَاكُمْ بُصْرَاةَ آسْكَانْ كُورِنْثُوسْ الْعَزَّازْ، وَقَلْبِنَا زَاه كَبِيرْ.
حَنَا مَا سُدِّيْنَا شْ قَلْبِنَا مِنْ جَهْتِكُمْ، وَلَكِنْ نُنْتَمِ الْيَّ سُدِّيْتُو قَلْبِكُمْ مِنْ
جَهْتِنَا. وَهَادِشِّيْ عَلَاشْ كَنْكُولْ لِيكُمْ بِحَالْ إِلَّا كَنْتُو وُلَادِي، حُلُو لِينَا
حَتَّى نُنْتَمِ قَلْبِكُمْ" (2 كو 6: 11-13)

خاص يكون تبادل في المحبة بين الراعي والجماعة ديال الخوت في الكنيسة. وهما كيعيشو وكيكبرو وكخدمو مع بعضياتهم، شوي بشوي قلوبهم كيتفتحو على بعضياتهم. عضو الكنيسة السليم ماكيخبغش وماكيشكش في المحبة ديالو للراعي والقادة ديال الكنيسة؛ بالعكس، خاصنا نعطيو المحبة بشكل مفتوح ونكشفو عليها.

عضو الكنيسة السليم ماخاوش يتسنا حتى يسمع الراعي ديالو كيترجاه بحال دار الرسول بولس مع الكنيسة ديال كورنتوس، قال ليهم الرسول: "ديرو لينا بلاصة فقلوبكم، زاه ما ضلمنا حد، وما آديننا حد، وما ظلمنا فحد، 3 ما كنكولش ليكم هادشي باش نلومكم، حيث كلت ليكم من قبل بلي نتم فقلوبنا، وزاه حنا متاخدين معاكم فالموت وفالحياة" (2 كورنتوس 7: 2-3).

العضو السليم كيُعطي نفسو أولاً للرب ومن بعد كيخضع لخدام الرب وهو عارف بلِّي هادي هي مشيئة الله (2 كورنتوس 8: 5). هاد العضو السليم كيشوف كيفاش الراعي الأمين كيُعطي نفسو لجسد المسيح بكل محبة. وهاد العضو كيحشم يسمع الراعي كيقول: "وَأَنَا رَاهُ فَرِحَانُ بَرَّافُ نُعْطِي كُلَّ مَا عِنْدِي، وَغُنْعُطِي حَتَّى حَيَاتِي عَلَى وَدُّكُمْ. إِيوَا وَاشْ كَثْبِغِيُونِي غَيْرَ شَوِيَّةٍ إِلَّا كُنْتُ كَثْبِغِيَكُمْ بَرَّافُ؟" (2 كورنتوس 12: 15). المحبة الغير المتبادلة صعبة، هي بحال شي دراما في شي مسرحية ديال شكسبير، وبلاصتها ماشي في الكنيسة المحلية. راه الفرح بالرعاة ديالنا والمحبة ديالنا ليهم خاصهم " يعمرو قلوبنا في المسيح" (فيليمون 20).

3) مفتوح باش يتعلّم. عضو الكنيسة السليم خاص يكون عندو قلب قابل يتعلّم. القلب اللّي رطب وقابل يتعلّم كيدل على التواضع ديال المؤمن والرغبة ديالو باش يكبر وينضج في المسيح. بلا هاد التواضع، القلب ديال المؤمن غادي يولي بحال الحجرة وغادي يفسد مع الوقت.

نقدرو نختاصرو الخدمة والمسؤولية ديال القائد أولاً الراعي في خدمة واحدة: التعليم. إلا شي عضو أو أولاً مجموعة كبيرة من الجماعة ماقابلينش يتعلمو، راه الخدمة ديال الراعي كتولي تقبل فوق الكتاب، وحتى ماغاديش يقدر ينقدها، حيث هاد المؤمن غيكون ضدو في هاد النقطة الأساسية والرئيسية. الرسول بولس كتب رسالة لتيموتاوس، وعطاه فيها تعليمات ميزانين للرعاة، وحتى تعليمات ميزانين للأعضاء ديال الكنائس حتى هما. الرسول بولس هدر على الدور ديال الشيوخ وقال:

"وَالْعَبْدُ ذُ الرَّبِّ مَا حَاصُوش يَتَخَاصِمُ، وَلَكِنْ حَاصُوه يُكُونُ ضَرِيفُ مَعَ كَثْبِي، قَادِرُ يَتَلَمَّ وَصَبَّارُ، وَحَاصُوه يَصْحُحُ اللِّي كَيَعَارِضُوه غَيْرُ بِالضَّرَافَةِ، لَعَلَّ وَعَسَى اللّهُ يَهْدِيَهُمْ بَاشْ يُعْرِفُو الحَقَّ، وَيُرْجَعُو لِعَقْلَهُمْ وَيَهْزُبُو مِنْ المَصِيدَةِ ذِيَالِ إِنْطِلِسِ اللِّي صَيِّدَهُمْ بَاشْ يُدِيرُو المُرَادُ ذِيَالَهُ" (2 تيموتاوس 2: 24-26)

كائنين برّاف ديال النقط مهمين ومفيدين في هاد الأيات وخاص أعضاء الكنيسة يردو البال معاهم. أولاً، خاص التعليم والقيادة ديال الراعي يكونو بطريقة ضريفة وحنينة ولصالح الأعضاء من الناحية الروحية. ماخصناش نستعملو المسؤوليات اللي كيعطينا الله بشكل جسدي عامر بالدنوب. وراه حنا خاصنا نقبلو هاد التعليم على أساس أنه توبيخ من الرب ودعوة لينا باش نتوبو. عضو الكنيسة السليم ماكيشوف في الضرافة ديال الراعي على أنها ضعف فيه ويستغالها، ولكن كيستافد من الفرصة وكيفحص قلبو وكيقلب على البلايص فين هو محتاج للتوبة. ثانيًا، خاصنا نفهمو شحال ساهل "نعارضو" الراعي ملي يكون كيعلّمنا وكيرشدنا. خاصنا نظورو في حياتنا العادة ديال أننا نسولو ريو سنا هاد السؤال "واش أنا كنعارض التعليم ديال الراعي بشي طريقة؟" ثالثًا، خاصنا نصلبو باش نعرفو الحق، وباش فكرنا يكون صافي، وباش الله يحمينا من الهجومات ديال الشيطان كل مرة كنعكشفو ولو معارضة أولا رفض صغير للتعليم ديال الراعي. الرعاة كيراقبو أرواحنا حيت هادي مسؤولية عطاها ليهم الله وغادي يتحاسبو عليها؛ هادشي علاش خاصنا نتيقو في القيادة ديال كنيستنا ونقبلوها بكل فرح على أساس أنها هدية من الله لمصلحتنا الأبدية. خلي قلبك يبقا مفتوح للتعليم.

تعامل أعضاء الكنيسة السليمة مع القيادة

زيد على هاد المواقف الأساسية، كائنين بعض النقط المحددة اللي خاص العضو ديال الكنيسة السليم يديرهم باش يقبل ويتبع القيادة ديال الكنيسة المحلية بشكل يفيدو ويفيد الكنيسة.

كيشارك بكل صبر في الاختيار ديال القادة

كنضن بلي من بين أهم القرارات اللي خاص تاخذهم الكنيسة المحلية هو قرار اختيار القادة ديالها. ومن خلال اختيار القادة، الجماعة كتحدّد التّغمة الروحية ديال الكنيسة والاتجاه ديالنا، في بعض الحالات هاد

الإختيار كىكون عندو تأثير على طول أجيال. ممكن هادا هو السبب علاش
الرسل وصابو الكنيسة اللولى باش تقلب على بعض الصفات الروحية
المحددة والنضج في القادة ديالها (أعمال الرسل 6: 1-6؛ 1 تيموتاوس 3).
خاص الجماعة تختار القائد بكل صبر وبالمشاوره والصلاة. والرسول بولس
نصح تيموتاوس وقال ليه "مَا تُرْزُبْشِنْ وَتُحْطُ نِدْبِكُ عَلَى شَيْءٍ حَدْ... (1
تيموتاوس 5: 22 أ). "الْمُدَبِّرِينَ" (يعني الشمامسة) ديال الكنيسة اللولين
كان خاصهم يكونو "عَامِرِينَ بِالرُّوحِ الْقُدُسِ وَالْحِكْمَةِ" (أعمال الرسل 6:
3). كحتاجو للصلاة والصبر والوقت باش نقدرو نشوفو هاد الصفات في
شخص. وإلا بغينا الكنيسة ديال الرب باش تكون صحية وسليمة، راه
خاص الأعضاء ديالها يلقاو القادة اللي كيعيشو بالروح وناضجين في المسيح
ويعينوهم كقادة ديال الكنيسة.

الأعضاء ديال الكنيسة السليمين ما كيتجاهلوش الأهمية ديال هاد
الخطوة الأساسية. يقدرو متلاً يعرضو على المؤمن اللي كيفكرو يختاروه
كراعي أولاً قائد هو وعائلتو باش ياكل معاهم وباش يتعرفو عليه بشكل
شخصي كتر. غاديين يبغيو يسمعو كتر على الشهادة والإختبار ديالو، وعلى
الرغبة ديالو باش يقود الخدمة، وعلى الخدمة ديالو قبل في الكنائس. بعض
الكنائس كيتسناو شهرين بين الترشيح ديال المؤمن للقيادة وبين التصويت،
كيديرو هادشي باش الأعضاء ديال الكنيسة تكون عندهم فرصة يشاركو في
الإختيار وفي التعرّف على الراعي أولاً القائد اللي غيصوتو عليه.

كيطبع وكيخضع للقادة

خلّيني نشارك معاك سبب قوي على خاصنا نشاركو بالصلاة وبالصبر
في الاعتراف بالقادة ديال الكنيسة: خاص عضو الكنيسة السليم يطبع
ويخضع للقيادة في كنيستو. بزّاف ديال الناس كيفكرو بلّي الطاعة
والخضوع هما "كلام خايب" باش يتقال في شي عراس، وحتى كايين ناس
في الكنيسة كياعتابروه كلام ماشي مزيان وحشوما يتقال. ولكن واخا هكداك،

راه الكتاب المقدس واضح مع هاد النقطة: "طبعو المسؤولين ذيالكم وديرو بگلأفهم (يعني خضعو ليهم)" (عبرانيين 13: 17). طاعتنا هي باش تخلي خدمتهم تكون فرح وماشى تقل فوق كتافهم. وطاعتنا كترجع علينا بالنفع حتى حنا، حيث ماشى في صالحنا لينا باش نقولو بلي عندنا قادة في الكنيسة ومن من بعد مانسمعوش ليهم. عضو الكنيسة السليم كيحط راسو تحت القادة ديال الجماعة بحال واحد العسكري كيخضع للجنرال ديالو اللي عندو رتبة كبر متو في الجيش. خاصنا نخضعو بفرح وشغف وبشكل كامل للقادة دبالنا في الكنيسة المحلية على ود الخير دبالنا والخير ديالهم والخير ديال الكنيسة كاملة.

كيتبع الميتال ديال القادة

واحد من الأسباب علاش الرب كييعين قادة في الكنيسة المحلية هو باش يقدر يكونو ميتال حي من لحم ودم للمؤمنين من جبهة حياة القداسة والأمانة. القادة دبالنا هما "صورة حية" باش نفهمو كيفاش نتبعو يسوع. الله بغا باش القادة يكونو قدوة لينا في كلشي (1 تيموتواس الأولى 4: 12 ؛ 1 بطرس 5: 3). هادشي علاش كيقل الرسول بولس: "آخوتي، كونو كلكم بحالي، وتعلمو مزيان من الناس اللي كنعيشو على حساب الطريقة اللي وزيانهم يعيشو بيها" (فيلبي 3: 17). عضو الكنيسة السليم كيبيني حياتو أو حياتها حسب أسلوب حياة التقوى اللي كيتبعوه الشيوخ ديال الكنيسة. خاصنا نتبعو الميتال ديال القادة دبالنا مع رغبة باش شوي بشوي نوليو بحال المسيح.

بالنسبة لبرّاف ديال الناس في هاد العصر دبالنا، فكرة التقليد كتبان بحال شي فكرة ديال شي طائفة. وبالصح راه كاينين برّاف ديال الطوائف في العالم فين خاص الأتباع يكونو بحال الببغاء كيتبعو كل حاجة كيديرها القائد ديالهم المشهور. راه خاصنا نردو البال مع الأفكار اللي ماكاينينش في الكتاب المقدس. ولكن راه الصورة اللي كييعطيها الكتاب المقدس باش

نتبعو المِيتال دِيال الراعي هي صورة على التقوى الحقيقية "فَالْكَلامُ،
وَالْتَّصَرُّفُ، وَالْمَحَبَّةُ، وَالْإِيمَانُ، وَالنُّقَاوَةُ" (1 تيموتاوس 4: 12) من خلال
"بِالأَعْمَالِ الْمُزَيَّاتَةِ" (تيطس 2: 7). الرعاة عَيِّط عليهم الله باش يكونو مِتال
بهاد الطريقة، وأعضاء الكنيسة السليمين خاصهم يتبعو بحكمة أسلوب
القادة في حياة القداسة.

كَيْصَلِّي من أَجْلِ القادة

مع كل هادشي اللِّي خاص القادة دِيال الكنيسة يديره ويتعاملو معاه،
واش تقدر تفكر في شي حاجة أهم من أنك تصلي من أجلهم؟ حتى الرسول
بولس فهم الأهمية والإحتياج دِيالو للصلاة الأمانة دِيال المؤمنين
المقدسين:

"دَاوُمُو عَلَى الصَّلَاةِ، وَكُونُوا دِيمًا مَوْجُودِينَ بَاشْ تُشْكِرُوا اللَّهَ
فُضْلًا تَكُمُ. وَصَلُّوا مِنْ جِهَتِنَا حَتَّى حَنَا بَاشْ يُحَلُّ لِينَا اللَّهُ الْبَابُ
لِلْكَلامِ دِيالِهِ، وَنَحْبِرُو بِالسَّرِّ ذُ الْمَسِيحِ اللِّي عَلَى وَدِّهِ أَنَا مُشْدُودُ
فَالْحَبْسِ، وَهَكَأَ غَادِي نُبَيِّنُهُ كَيْفَ وَاجِبٌ عَلَيَّ نُدِيرُ" (كولوسي 4:
2-4؛ وقرا حتى أفسس 6: 19-20)

خاصنا نصليو من أجل الشجاعة دِيال القادة دِيالنا، والوضوح والتبات
ديالهم في رسالة الإنجيل، وباش يزيد يعطيهم الرب فَرَصْ باش يبشرو
بالمسيح. أعضاء الكنيسة السليمين كيكرسو نفوسهم باش ينوبو على
القادة دِيالهم في الصلاة. كمؤمنين خاصنا نستجابو للدعوة دِيال يسوع باش
نداومو في الصلاة ومانملوش (لوقا 18: 1)، وخاصنا نعاونو القادة دِيالنا في
الكنيسة من خلال أنها نديرو هادشي في بلاصتهم.

في كنيستنا المحلية، كتجتمع مجموعة من المؤمنين الأعضاء كل نهار
الثلاث بالليل باش يصليو من أجل القادة دِيال الكنيسة. كل أسبوع كيطلبو

طلبات جداد للصلاة وكيتابعو فين وصولو الطلبات اللي دازو. ملي المجموعة كنتجامع، كيصليو من أجل الحياة الشخصية والعامّة ديال شيوخ الكنيسة والخدمة الروحية ديالهم في الكنيسة. راه الله بارك الكنيسة بشكل كبير من خلال هاد الصلوات.

كيدعم الخدمة والتعامل الخارجي ديال القادة

كنضن بلي هادي هي النقطة اللي الأغلبية ديال المؤمنين ماكيعرفوهاش أولا ماكتعجبهمش وماكتكونش واضحة ليهم. بزاف ديال أعضاء الكنائس كيكونو أنانيين مع الرعاة ديالهم، يعني كيفكرو بلي الراعي هو ديالهم بوحدهم وخاصو ديما يخدم غير كنيستهم. كاين واحد الجانب إيجابي في هاد الفكرة ديال الملكية. حيث هاد الحب ديال الملكية ديال الراعي متلاً كتوري بلي كاين رتباط مفتوح وقوي بن الراعي والكنيسة.

ولكن واطًا هاكداك يقدر هاد الإحساس بالملكية يولي أنانية في حالة الكنيسة رفضات تدعم المشاركة ديال الراعي في شي خدمة روحية خارج الكنيسة المحلية. غالبًا ماكيكون الشخص اللي كيتألم بسباب هاد الأنانية هو الراعي براسو، حيث الراعي كينشف وكيفشل إلا ماكانش شي تشجيع خارجي من رعاة وقادة آخرين من كنائس خرين، كيولي بحال الشجرة اللي مع الوقت كتدبل إلا ماترواوش. عضو الكنيسة السليم كيساهم في الصحة ديال القائد بشكل مستمر وكيقوي الخدمة ديالو من خلال أنه يشجع ويدعم المشاركة ديال الراعي في المؤتمرات أولا الإجتماعات الخارجية وأي فرص باش يكون قريب من القادة ديال كنائس خرين.

الكتاب المقدس فيه أمثلة كتار وواضحين على كيفاش شي كنيسة كتخدم وكتدعم شي كنيسة خرا. راه الكرم ديال الكنيسة المحلية مع الكنائس لخرين هو حاجة كتستحق مجهوداتنا والكتاب المقدس وصانا باش نديروها في 2 كورنتوس 9: 13. وبحال هاد الكرم، ملي كييان على

شكل أن الكنيسة "كتسلف" الراعي ديالها لشي خدمة خرا وقتية، هو قادر باش يدعم خدمة إنتشار الإنجيل في مناطق خرا (2 كورنتوس 10: 15-16). عضو الكنيسة السليم خاص تكون عندو رغبة قوية باش يشوف الإنجيل كيزيد ينتاشر وعندو رغبة باش يساهم في صحة ديال الكنائس أولا الجماعات لخرين إلا كان ممكن. راه دعم خدمة القائد الخارجية هي طريقة مزيانة باش نوصلو لهاد الأهداف الكتابية.

الخُلاصة

الله كييعين القيادة في الكنيسة المحلية باش يبارك الشعب ديالو. ولكن باش القيادة تكون فعّالة ومفيدة، راه أعضاء الكنيسة خاص يشجعوها ويدعموها. راه بزاف ديال القادة الأمناء غرقو قدام المواجه الكبار ديال المقاومة والرفض ديال بعض الأعضاء الفاسدين. ماخاص يكون هادشي وسط شعب الله. بالعكس، خاص الأعضاء السليمين ديال الكنيسة المحلية يجاهدو ويشجعو بعضياتهم باش يتبعو القادة ديالهم بقلوب منفتحة وبكل طاعة شغوفة وخضوع سعيد.

باش تزيد تتعمق في التفكير

1. تأمل التعليمات اللي تعطاو لأعضاء الكنيسة في العبرانيين 13. كيفاش الخضوع لقادة كنيستك جاب في حياتك شي امتياز أولا بركة؟
2. كيفاش تقدر تصلي من أجل القادة ديالك؟
3. كيفاش تقدر تشجع أعضاء الكنيسة لخرين في كنيستك باش تقويو الثقة ديالكم في القادة ديال الكنيسة وهما كيتبعو المسيح وكيعلمو كلمة الله؟

العلامة 10:

عضو الكنيسة السليم هو مؤمن مُحارِب في الصلاة

تسعود الفصول اللّولين في هاد الكتاب هما مرتابطين بكتاب "تسعود ديال العلامات لكنيسة سليمة" وكتاب "شنو هي الكنيسة السليمة". أما هاد الفصل العاشر في هاد الكتاب فهو واحد الفصل إضافي كيزيد في المنفعة.

حياتي كلها ماعمرّي عرفت شي مؤمن بالمسيحي ماكياًمنش بلّي الصلاة هي مهمة، وماشي غير مهمة وصافي، ولكن في نفس الوقت هي جزء حيوي في الحياة المسيحية. غيكون غريب بزّاف نلقاو شي مؤمن بالمسيح كيحاول يعيش الحياة المسيحية بلا صلاة.

ولكن واخّا مكانة الصلاة في حياة الإيمان هي معروفة، راه الصلاة كتبتقا بالنسبة لبزّاف ديال المسيحيين واحد العمل صعب، واحد الفرضية ثقيلة وبلا تأتير واضح. المؤمنين بالمسيح غالبًا كيكونو هاملين الصلاة أولاً فاشلين معاها (يعني فقدو تقّتهم بيها).

علاش كيوقع هادشي؟ علاش الأغلبية ديال المؤمنين المسيحيين السليمين وأعضاء الكنائس كيلقاو بلّي الصلاة هي عمل صعب وتقليل؟

دار الصلاة لكل الناس

الصعوبة في الصلاة كتولي حاجة خطيرة ملي كنفهمو بلي الكنيسة خاصها تكون بلاصة ديال الصلاة. النبي إشعيا هدر لينا على واحد الوقت فين الأمم وشعوب العالم كيلقاو موطن ديالهم بين شعب الله. هاد الشعوب اللي خارج شعب إسرائيل غاديين يحفضو عهد الله، والله واعد هاد الشعوب:

هاد الشعوب غادي نجيبهم للجبل المقدس ديالي،
وغادي نفرّحهم في دار الصلاة ديالي.

الدبايح والتقديمات ديالهم
غادي نقبلها على المذبح ديالي.

حيث داري غادي تتسمي دار الصلاة
لكل الشعوب. (إشعيا 56: 7)

الرب يسوع قتبس الكلام من هاد الوعد، كنعول كلمة الله "ذخّل يسوع لبيت الله وجرى على كاع هادوك اللي كيبيعو وكيشريو تم، وقلب الطباي ديال اللي كيصرّفو الفلوس والكراسي ديال بياعين الحمام، وكال ليهم: «راه تكتب فكتاب الله بلي داري غادي تسمى دار الصلاة، ولكن نتم زديتوها غار ديال الشفار!»" (متى 21: 12-13؛ مرقس 11: 17).

إلا درسنا الأنشطة اللي كانت الكنيسة اللولى كتديرهم حسب الكتاب المقدس، غادي نكتاشفو بلي الحاجة الرئيسية اللي أعضاء الكنيسة اللولين كرسو نفوسهم ليها كانت هي الصلاة. وملي كانو كيتسناو الموعد ديال الروح القدس اللي واعدهم المسيح بيه، كانو كيجتمعو في البيت الفوقاني و "كانو كيدأومو على الصلاة بقلب واحدا" (أعمال الرسل 1: 14). بعد عيد يوم الخمسين، ملي الله زاد في الكنيسة الناس الجداد اللي آمنو، كرسو أعضاء الكنيسة المسيحية اللولين الأغلبية ديال وقتهم لأربعة ديال الحوايج، كانو

كلهم كيداومو على: "التَّغْلِيمُ ذِيَالُ الرُّسُلْ، وَغَلَى الشَّرْكَةَ مَعَ بُغْضِيَّاتُهُمْ، وَأَلْغَشَا ذِيَالُ الرَّبِّ، وَالصَّلَاةُ" (أعمال الرسل 2: 42). المشاركة ديال المسيحيين اللولين في الصلاة كانت مشاركة قوية لدرجة لدرجة أن الكتاب قال "كانو كيداومو".

الصلاة كعادة روحية هي مهمة بزّاف لدرجة أنها الحاجة الوحيد اللي الكتاب كيقول أنها السبب الكافي والوحيد باش الزوج والزوجة يقدرو يبعُدو على بعضياتهم لواحد الوقت محدد (1 كورنتوس 7: 5). واش تقدر تتخيل الانتعاش والطاقة اللي يقدرو يشعلو في الحياة الروحية إلا لقينا في الزوج والزوجة كيقولو: "حبيبة أجي دابا نكرسو وقتنا للصلاة" عوض يقولو "حبيب دابا لا بغيت نبقا بوحدني حيث راسي كيضرنني". راه الصلاة مهمة وضرورية في الكنيسة وفي الدار.

شنو هي الصلاة؟

ولكن راه غير باش نهدرو على الأهمية ديال الصلاة في الكنيسة اللولى هادشي ماكيخلىناش نولّيو محاربين في الصلاة. وماشي غير هادشي وصافي، راه غالبًا ماكنعرفوش أولا كمنساو بالضبط شنو هي الصلاة. كاينين بزّاف ديال الأفكار الغالطين على الصلاة منتاشرين بين المؤمنين. نعطيك بعض الأمثلة:

- إلا ماصليناش، الله ماغيدير والو في العالم.
- الله سبق ليه قرّر كلشي، هو سامي وكلشي في يده، إذن
علاش نصلّيو؟
- الله مشغول وماعندوش الوقت يسمع لصلواتي.

في الأساس، الأغلبية ديال هاد الأفكار الغالطين على الصلاة جايين من سوء فهم طبيعة الله وعلاقتنا بيه. ساهل نخليو الصلاة تولّي بحال شي

مسرحة حنا هما الأبطال ديالها، والإحتياجات ديالنا وأفكارنا هما الأساس، والله غير كيدير داكشي اللي حنا كنطلبو متو. وفي نفس الوقت راه ساهل نطicho من الجبهة لخر عوتاني ونفكرو بلي الله هو اللي كيتحكّم في كلشي وسبق قرّر كلشي وحنا غير خاصنا نسكتو ومانطلبو والو حيت هو ماباغيش يسمع لينا ومامهتمش يسمع متا.

حنا كنجتاجو فهم كتابي للصلاة خارج من كلمة الله. عالم اللاهوت
گرايم گولدسووردي (Graeme Goldsworthy) كيشرح لينا هاد
الموضوع بهاد الطريقة:

الإنجيل في الأساس عندو علاقة بشنو دار ولد الله. كيفاش
كنعرفو ولد الله غادي يحدد كيفاش كنشوفو في علاقتنا مع
الله الأب اللي كيهدر معنا من خلال الكلمة ديالو. وراه الطريقة
اللي بيها كنشوفو في هاد العلاقة هي اللي غادي تحدّد كيفاش
كنجيو لعند الله من خلال الصلاة وكيفاش كنتيقو بيه. راه
الصلاة ماعمرها تكون بحال شي نُزهة عاطفية أولا شي هجوم
ديال الخوف. وماغتكونش بحال شي فكرة ديال أننا عندنا
واحد الحق فطري باش نطلبو من الله يسمعنا. بكل بساطة،
الصلاة هي تعبير على دخولنا للمحضر المقدّس ديال الله
السماوي، وهاد الدخول عطاءه علينا رئيس الكهنة ديالنا
العظيم.³¹

الإيمان بالإنجيل كبيغّر مكانتنا في عينين الله، من أجانب وناس بعاد
كنولي من عائلة الله، كنولي وولد الله بالتبني من خلال الإيمان بالمسيح.
على هاد الأساس – وولد الله من خلال الإيمان بالمسيح - نقدرو نهדרو مع

³¹ جرايم جولسوورتي، الصلاة ومعرفة الله: كيفلم الكتاب المقدس كلو كيفلمنا (داونرز جروف، إلينوي: إنترفارستي، 2003)، 51.

الله بصيفتنا ولادو اللّي فداهم. "الصلاة هي استجابتنا لله مّلي كيهدر معانا"³²، أولاً في إنجيل المسيح، ومن بعد من خلال كلمتو.

الصلاة ماشي هي " ندافعو على شي حاجة الله مابغاهاش"³³، وهي ماشي أنّا نديرو شرع يدينا قدام إله ناعس ماقادر يدير والو بلا بينا. في الصلاة، نكونو بحال ولاد صغار متّاحدين بالمسيح اللّي هو المحامي ديالنا ورئيس الكهنة ديالنا، اللّي وارت كل شي، من خلالو كنوقفو قدام الله وكنسمعو ليه. وبما أنّا واقفين قدام الله من خلال المسيح، راه ماكينش شي سقف فوقنا كيمنع صلواتنا باش مايوصلوش لله، وّا كاينين بزّاف ديال المؤمنين كيفكرو بلي كايين سقف كيمنع صلواتنا. في الصلاة حنا "كندخلو نفوسنا في الخدمة اللّي كيدير الله في العالم" من خلال أنّا نصلّيو "باش المشيئة ديال الله اللّي وحا بيها تتحقّق في العالم كامل" من خلال "الإنجيل والنتائج ديالو الإلهية". الصلاة هي "نفكرو بحال الله ومع الله"³⁴ - الأفكار اللّي ديما غيسمهم وغيستاجب ليهم.

كيفاش نصلّيو وفوقاش نصلّيو؟

كاينين بزّاف ديال الكتب كيهدرو على موضوع الصلاة. كاينين كتوب اللّي كيشرحو بعض الطّرق للصلاة. كاينين كتوب خرين كيحلّو حياة الصلاة ديال المؤمنين في الكتاب المقدس أولاً ديال بعض المؤمنين المعروفين في تاريخ الكنيسة. بما أنه كاينين بزّاف ديال الكتب كيهدرو على موضوع الصلاة، وبما أنّي عارف شحال خاصني نتحسّن ونكبر في حياة الصلاة ديالي، راني شوية متردّد باش نعطي شي اقتراحات أولاً نصائح للناس. ولكن، باللطف ديال الله والرحمة ديالو، هو كشف ليّا على كيفاش نصلّي وفوقاش نصلّي.

³² جولدزورتي، الصلاة ومعرفة الله، 16.

³³ جولدزورتي، الصلاة ومعرفة الله، 35.

³⁴ جولدزورتي، الصلاة ومعرفة الله، 60-61.

الوقت والطريقة ديال الصلاة نقدرو نلخصوهم في جوج تعاليم كتابية:
الصلاة الدائمة والصلاة بالروح.

الصلاة الدائمة

بَرَّاف ديال المرآت الرسول بولس شجَّع الكنائس اللي كتب ليهم باش
يصلُّو بشكل دايم ومستامر. الرسول بولس وصَّى الخوت في تسالونيكى
باش "يداومو على الصلاة" (1 تسالونيكى 5: 17). وكتب بولس للمؤمنين
المسيحيين في مدينة روما وقال ليهم "فَزُحُو بُسْبَابَ الرَّجَا اللِّي عِنْدَكُم،
وَصُبِّرُو فَأَلْمُحَنَّة، وَصَلِّو عَلَى الدَّوَام" (رومية 12: 12). وقال للخوت في
كولوسي: "دَاوُمُو عَلَى الصَّلَاة، وَكُونُو دِيمَا مُوجُودِينَ بَاشْ تُشْكُرُو اللَّهَ
فُضْلَاتُكُم" (كولوسي 4: 2). هادي هي الطريقة اللي هاد الكنيسة في
كولوسي قدرو يوصلو للوصية ديال بولس اللي سبق هدر ليهم عليها في
الفصل الثالث ملي قال: "قَلْبُو عَلَى الْأُمُورِ اللِّي الْفُوق، فِينْ كَأَنَّسِ الْمَسِيحِ
عَلَى لِيْمَنْ دِيَالِ اللَّهِ" (كولوسي 3: 1-2). والرسول بولس عطانا أبفراس
كِمِتَالِ عَلَى هَادِ الْحَقِّ الْعَظِيم، قال: " كَيْسَلْمُ عَلَيْكُمُ أَبْفِرَاسُ اللِّي هُوَ وَآخُدْ
مُنْكُمُ وَهُوَ عَبْدُ ذِ الْمَسِيحِ يَسُوعُ، رَاهُ دِيمَا كَيْكَافُحْ بِالصَّلَاةِ عَلَى وَدُّكُمُ"
(كولوسي 4: 12). بِمَا أَنَّ الْحَيَاةَ الْمَسِيحِيَّةَ عَامِرَةٌ بِالتَّجَارِبِ وَالْمَخَاطِرِ
والاحتياجات، راه خاص عضو الكنيسة السليم يكون ملتازم بالوصية ديال
الله باش يصلِّي على الدوام.

الصلاة بالروح

راه عضو الكنيسة السليم ماشي غير كيصلِّي على الدوام وصافي، ولكن
راه في نفس الوقت كيصلِّي بالروح. راه كل جماعة مسيحية كتفهم "الصلاة
بالروح" بشكل مختلف، وكاين بَرَّاف ديال التشويش على هاد النقطة.
ولكن، وآخا هكداك راه رسالة بولس للخوت ديال روما قادرة تعاونا بَرَّاف
في هاد الموضوع، كيقول الرسول: "وَالرُّوحُ الْقُدُسُ حَتَّى هُوَ كَيْعَاوُنْ

الضَّعْفُ دِيَالْنَا، حَيْثُ حَنَا مَا كَنَعْرِفُوشْ كَيْفَاشْ خَاصَّنَا نَصَلِّيُوْ، وَلَكِنْ الرُّوحُ
الْقُدْسُ بَرَّاسُهُ كَيْشْفَعْ لِيْنَا عِنْدَ اللّٰهِ بَكْلَامْ مَا كَيْتَوَصَّفُشْ. وَاللّٰهُ اللّٰي كَيْفَحْصَن
الْقُلُوبْ، كَيْعَرَفْ الْقَصْدُ دِيَالِ الرُّوحِ الْقُدْسِ، عَلَاحَقَّاشْ كَيْشْفَعْ لِلْمَقْدُسِيْنَ
عَلَى حَسَابِ مُرَادِ اللّٰهِ" (رومية 8: 26-27).

وللأسف راه كتره التشويش على رومية 8: 26-27 كيخلي بزاف ديال
المؤمنين يتجاهلو الحق المشجع والواضح في هاد الجوج آيات. راه كاين
تعليم عظيم هنا كيشجعنا في صلواتنا. لاحض كيفاش أن الروح "كيعاؤون
الضَّعْفُ دِيَالْنَا". سبق ليْنَا لاحتنا كيفاش أن الصلاة هي وحدة من البلايص
فين المؤمنين المسيحيين كيعترفو بسهولة بالضعف ديالهم. شحال عجيب
وعظيم أن الروح القدس الإله كيعاوننا في هاد المجال بالضبط! واش عمرك
لقيتي راسك حاير وماعارفش شنو تقول في الصلاة ديالك؟ راه روح الله
براسو هو اللّي كيشفع ليْنَا وكيهدر في بلاصتنا. واش عمرك تمنيتي تعرف
بالضبط شنو هي المشيئة ديال الله لحياتك باش تقدر تطلبها في الصلاة؟
راه روح الله كيشفع ليْنَا "حسب المشيئة ديال الله" بالضبط.

كل هادشي هو دليل رئيسي على شنو كتعني الصلاة بالروح. الصلاة
بالروح هي صلاة كيسيتر عليها الروح ديال الله. والصلاة اللّي يسيطر عليها
الروح ديال الله هي صلاة حسب مشيئة الله. راه مَلِيْ كَنْصَلِّيُوْ حسب مشيئة
الله اللّي كتبان في كلمتو، تما كنعونو كنعليو بالروح. هاد الصلاة هي حق
لكل شخص تولد من الروح و ولى ولد الله بالتبّي (رومية 8: 14-17).
بصلاة بحال هادي نقدر ونحاربو الحرب الروحية كمسيحيين (أفسس 6:
18).

صَلِّيْ عَلَى وَدِ الخُدَامِ وَرُعَاةِ

في إنجيل متى كنقراو على واحد اللحضة مَلِيْ يسوع تأثر وبقاو فيه
شعب إسرائيل اللّي كانوا تالفين ومخدوعين من رجال الدين، والمسيح

شافهم بحال "خرفان بلا راعي". يسوع وصّى تلامدو بالزربة وقال ليهم "ظَلُّبُو مَثْ مَوْلُ الْخُصَاذُ بَاشْ يُصَيِّفُطُ الْخُصَاذَا لِلْخُصَاذُ دَيَالُهُ" (متى 9: 36-38). كنضن بلّي المؤمنين اللّي كانوا في الكنائس اللّي بقاو لمدة طويلة بلا راعي، غير هما اللّي غاديين يفهمو القوة والضرورة ديال هاد الصلاة وكيفاش أنّها صلاة مستعجلة. شعب الرب محتاج لزعاة، وعضو الكنيسة السليم كيطلب من الله باش يصيفط رعاة وخذّام للكنيسة ديالو والكنائس لخرين اللّي محتاجين للرعاة. وهاد الأعضاء السليمين ماشي غير كيصليو باش الله يصيفط رعاة وخذّام، ولكن في نفس الوقت كيصليو للرب باش يعاون ويقوّي هادوك اللّي كيخدمو الرب والكلمة ديالو وسط أوقات الضيق والمشاكل والضعف (فيلبي 1: 19-20)؛ وكيترجّوا الرب باش يعطي للرعاة فُرص باش يبشّرو بإنجيل المسيح (أفسس 6: 19-20)؛ ويعطي فرصة باش الخدمة ديال الرب والإنجيل يزيديو يكبرو وينتاشرو (كولوسي 4: 3-4).

صَلِّيْ عَلَى وَدِ كَلِّ الْمُؤْمِنِينَ الْمُقَدَّسِينَ

الصلاة من أجل المؤمنين المسيحيين لخرين هي تعبير ملموس وواضح على المحبة والإهتمام بلخرين (قرا أفسس 6: 18). الحياة المسيحية هي ماشي بحال شي رياضة فردية، والصلاة هي ماشي بحال شي رحلة فردية. الحياة المسيحية هي حياة عائلية، وخاص الصلوات ديالنا يركزو على العائلة كاملة، وخاصنا نكونو كنعقدرو الناس لخرين كتر من كنعقدرو نفوسنا. واحد من الطرق باش نديرو هادشي هو نصليو ديما من أجل كل واحد في كنائسنا المحلية، مزيان تكون عندي قائمة ديال أسماء كل الأعضاء إلا ممكن. كل نهار هز ديك القائمة وصلّي من أجل العدد اللّي تقدر عليه حسب الوقت اللّي عندك. كاينة طريقة خرا باش تقدر تصلّي من أجل كل المؤمنين المقدسين وهي الصلاة من أجل الكنائس لخرين في منطقتك والكنائس اللّي ممكن صحابك أولا شي واحد من العائلة هما أعضاء فيهم. ملّي كنتلاقوا مع الرب في القرابة اليومية ديال كلمتو، نقدرو نحبو المؤمنين

المسيحيين لخرين من خلال أننا نصليو من الحق ديال كلمة الله على حياتهم كل نهار. نقدرو نصليو من أجل التقديس ديالهم (1 تسالونيكي 4: 3)؛ نقدرو نصليو ضد التجربة وباش الله يعاونهم ببقاوا فايقين في الروح (متى 26: 41)؛ ونقدرو نصليو باش يعمررو بالروح القدس ديال الله (غلاطية 5: 16-25) نقدرو نصليو على ود أي حاجة خرا كيوصينا بيها الكتاب المقدس.

صلي على ود الناس اللي في السلطة

الرسول بولس قال هاد الكلام للتلميذ ديالو والراعي الشاب تيموتاوس: كَئِطْلَبْ مِنْكُمْ قَبْلَ مَنْ كَلِّسِي، بَاشْ تَطْلُبُو اللَّهَ، وَتُصَلِّبُو، وَتُدْعِبُو، وَتُشْكِرُوهُ عَلَى وَدُّكَاعِ النَّاسِ، وَعَلَى وَدِّ الْمُلُوكِ وَكُلِّ هَادُوكِ اللَّيِّ عِنْدَهُمْ السُّلْطَةَ، بَاشْ نَعِيشُو حَيَاةَ مَرْتَاةَ وَهَائِيَةِ بَالْتَقْوَى وَالْإِحْتِرَامِ، هَادِشِي مَرْيَانِ وَمَقْبُولِ عِنْدَ اللَّهِ الْمُنَجِّي دِيَالِنَا" (1 تيموتاوس 2: 1-3). وبما أن الله هو اللي كييعن كل سلطة كاينة في هاد الحياة، من قادة الحكومات (رومية 13: 1-2) للوالدين (أفسس 6: 1-3)، وبما أن البركات اللي كييعطيهم الله راهم كييعطيو السلطات اللي الله بنفسو أسسهم، راه طبيعي ومنطقي باش المؤمنين المسيحيين يصليو من أجل الناس اللي في السلطة. أعضاء الكنيسة السليمين ديما كييفكرو في صلواتهم الناس المسؤولين واللي عندهم السلطان في بلادهم، والموظفين ديال الحكومة، والمعلمين اللي في المدارس، والوالدين، غيرهم اللي عندهم أي نوع من السلطة معطية من الله. راه مزيان باش تكون عندك قائمة مكتوبين فيها الأسماء ديال بحال هاد الناس ومزيان تحتافض بيها في كتابك المقدس أولا في شي دفتر ديما كتهزرو معاك باش يفكر ك تصلي ديما من أجل الناس اللي في السلطة.

صَلِّيْ عَلَى وَدِ النَّاسِ الَّتِي كَيْتَعَدَّوْا عَلَيْكَ وَكَيْضَلْمُوْكَ

هادي هي وصية من الرب بنفسو: " بَارِكُو الَّتِي كَيْسَبُّوْكُمْ، وَدُعِيُوْ مَعَ هَادُوْكَ الَّتِي كَيْضَلْمُوْكُمْ" (لوقا 6: 28). طبيعي وعادي باش نصليو من أجل الناس الَّتِي كَنْحَبُّوْهُمْ. حَتَّى النَّاسِ الَّتِي مَا كَيْعْرِفُوْشِ الرَّبِّ يَسُوْعُ كَيْدِيْرُوْ هَادِشِي. وَلَكِنْ رَاخْ مَحَبَّةَ الْمَسِيْحِ كَتَخَلِّيْنَا نَصَلِّيُوْ حَتَّى مِنْ أَجْلِ النَّاسِ الَّتِي كَتَعَدَّوْا عَلَيْنَا وَكَيْجَرْحُوْنَا وَكَيْضَلْمُوْنَا (متى 5: 46-47). عَجِيْبُ كَيْفَاشْ أَنْ بِحَالِ هَادِ الصَّلَوَاتِ كَيْكُونُوْ بِحَالِ دَلِيْلِ عَلَى أَنْنَا بِالْحَقِّ وِلَادِ اللَّهِ السَّمَاوِيِّ (متى 5: 45)، رَاهِ الْإِضْطِهَادِ مِنْ أَجْلِ التَّقْوَى هُوَ سَبَبٌ لِلْفَرَحِ حَيْثُ الْمَسِيْحُ وَاعَدْنَا بَلِيَّ غَيْكَافُنَا وَغَيْبَارِكُنَا فِي مَمْلَكَتُو (متى 5: 10-12). مَا شِي بِحَالِ الْعَبْدِ الَّتِي مَا كَيْرَحْمَشْ، الَّتِي وَاحَا تَغْفِرُوْ لِيْهِ كُلِّ الدِّيُونِ دِيَالُوْ، هُوَ زَادَ تَعَامَلِ بِشَكْلِ خَائِبِ وَقَاسِحِ مَعَ النَّاسِ الَّتِي كَيْسَالَهُمْ (متى 18: 21-35). خَاصِنَا نَحَارِبُوْ دِيَكِ الْفِطْرَةِ الْجَسَدِيَّةِ بِاشْ مَا نَحْبُوشِ النَّاسِ الَّتِي كَيْتَعَدَّوْا عَلَيْنَا وَمَا نَصَلِّيُوْشِ مِنْ أَجْلِهِمْ، وَلَكِنْ بِالْعَكْسِ خَاصِنَا نَخْتَارُوْ الْفَرَحَ وَالتَّقْوَى دِيَالِ وِلَادِ اللَّهِ الَّتِي كَيْصَلِّيُوْ حَتَّى مِنْ أَجْلِ النَّاسِ الَّتِي كَيْتَعَدَّوْا عَلَيْهِمْ وَكَيْدِيْرُوْ لِيْهِمْ الْمَشَاكِلِ.

الْخُلَاصَةُ

وَاشْ كَايْنِ شِي امْتِيَازِ أَوْلَا بَرَكَةِ حَسَنِ مِنَ الْبَرَكَةِ الَّتِي اللَّهُ عَطَاهَا لِلْمَسِيْحِيِّينَ مِنْ خِلَالِ يَسُوْعِ الْمَسِيْحِ: بَرَكَةُ أَنْنَا نَقْدُرُوْ نَوْقِفُوْ قِدَامَ اللَّهِ بَانَا مِنْ خِلَالِ الصَّلَاةِ بِالرُّوحِ دِيَالُوْ نَجَاوِبُوْهُ عَلَى الْكَلِمَةِ الَّتِي كَيْشَارِكُ مَعَانَا فِي الْكِتَابِ الْمَقْدَسِ؟ إِلَّا بَغِينَا نَسْمَعُوْ كَلِمَةَ اللَّهِ بِشَمَلِ لَاهَوْتِي، وَنَشْبَعُوْ بِالْإِنْجِيلِ، خَاصِنَا نَصَلِّيُوْ وَحْنَا وَمَتَأَكْدِيْنِ وَوَاتْقِيْنِ مِنْ شَنُوْ كَيْدِيْرُوْ اللَّهِ فِي الْعَالَمِ مِنْ خِلَالِ الْمَسِيْحِ وَلِدُوْ وَنَصَلِّيُوْ مِنْ أَجْلِ التَّقَدُّمِ دِيَالِ الْإِنْجِيلِ وَمَشِيئَةِ اللَّهِ فِي الْعَالَمِ كَامِلِ.

باش تزيّد تتعمّق في التفكير

1. واش عندك شي خطة محددة للصلاة؟ راجع الخطة ديالك اللّي كتستعمل دابا أولا كتب خطة جديدة باش تصلّي، وكتب فيها هاد الأمور:
 - (أ) أوقات الصلاة الخاصة والجماعية؛
 - (ب) الأوقات والبلايص ديال الصلاة.
 - (ج) شكون هما الناس والجماعات اللّي غتصلّي من أجلهم؛
 - (د) المشاكل اللّي كيوافهها الإنجيل والكنيسة؛
 - (هـ) آيات من الكتاب المقدس اللّي كيشجعوك وكيعاونوك في الصلاة.

كلمة أخيرة

كتابة هاد الكتاب كانت بركة عليًا وإمتياز. وأنا شاكر بزّاف للفرق في خدمة "تسعود علامة" (9Marks) وخدمة "كروسواي (Crossway)" اللّي عطاوني هاد الفرصة، وكنشكر خصوصًا جوناثان ليمان (Jonathan Leeman) وليديا براونباك (Lydia Brownback) على المساعدة والتوجيه ديالهم الكبير اللّي قيمتهم كبيرة بزّاف. وحتى كنشكر خوتي اللّي معايا في خدمة الرب في الكنيسة المعمدانية الأولى في جزيرة كايمان؛ الكنيسة كلها بالأعضاء دياولها، والقادة كلهم هما متال حي وقوي على هادشي اللّي مكتوب في هاد الكتاب. وحتى كنشكر بزاف مراتي "كريستي"، يدي ليمنا، هي بركة كبيرة في حياتي، كل حاجة كنديرها كانت تكون بلا فرح وبلا تمر في حياتي كون ماكانتش في جنبي. أنا شاكر بزّاف لله على النعمة دIALO والإرشاد دIALO ليا وأنا كنكتب هاد الكتاب. كل حاجة نافعة في هاد الكتاب راها جات من عند الله وماشي من عندي.

ملّي كنتفكر في نُقْط الضعف دIALO كمؤمن مسيحي وراعي وعضو في الكنيسة، ديما كنتفكر في نفس الوقت بلي راک حتى ننا تقدر تكون عندك نُقْط ضعف كياترو على قرابتك لهاد الكتاب. جوج نُقْط ضُعب بالضبط كيجيو للفكر دIALO.

أولاً، كينة إمكانية كبيرة باش تقرا هاد الكتاب وتراجع نفسك وفي نفس الوقت تهمل بشكل كامل يسوع المسيح والصليب دIALO. يعني راک تقدر تقرا هاد الكتاب وتمشي و ننا كتفكر غير في "الأعمال، الأعمال، والأعمال" عوض تفكر في "النعمة، النعمة، والنعمة" أولاً "التيقة، التيقة، التيقة". يقدر كل فصل في هاد الكتاب يوّلّي بالنسبة ليك خريطة دIALO الطريق أولاً

برنامج باش تحسن الدات ديالك وتجاهد بشكل داتي ولكن ماشي تعتمد على المسيح.

راه المشورة والنصائح اللي في هاد الكتاب ماتقدرش تاخدهم وتحاول تطبقهم بعيد من نعمة الله من خلال إنجيل يسوع المسيح. كنصلي لله وكنطلب متو باش يعاونك تكون قادر باش تقرا هاد الكتاب " شكون هو عضو الكنيسة السليم؟" بقلب متواضع كنترجا رب الكنيسة يفيق بشكل عجيب كل مؤمن بيه باش يخدم الرب والكنيسة بشكل عجيب. كنصلي لله باش الإعتماد العميق على المسيح-اللي بلا بيه مانقدرو نديرو والو- يزيد يكبر ويتقوى في قلوبنا وحنا شوي شوي كنوليو كنشبهو للمسيح. ولكن واحا هكداك، راه الرب غيعوانك باش تطبق النصائح والاقتراحات اللي في هاد الكتاب، وكنصلي لله باش يعاونك تطبقهم ملي الفهم ديالك والإعتماد ديالك على حياة المسيح كيزيدو يكبرو. راه المسيح والروح ديالو خدامين دابا فيك، هما اللي كيقويوك وكيشجعوك على كل عمل صالح.

ثانيًا، ممكن تقدر تقرا هاد الكتاب بروح فردية. يعني من بعدما تكمل القراءة ديال هاد الكتاب تقدر تفكر مع راسك وتقول: "مزيان، خاصني دابا ندير تغيير في راسي". وبغيت نأكد بلي بالصح كلنا كحتاجو نكبرو ونضجو في حياتنا الروحية، وبفضل النعمة ديال الله غاديين نزيدو نكبرو حتى نهار يرجع المسيح. ولكن راه هاد الكتاب كيهضر على الكنيسة بشكل أساسي، جسد المسيح كامل في بلاصة محددة. تقال بزاف على الدور ديالك والدور ديالي فيها، ولكن أنا وأنت تخلقنا في الروح باش ننتميو لجسد كامل، باش نكونو وسط جماعة المؤمنين باش كلنا نكونو شعب الله (رومية 12: 5). هادشي علاش راه أحسن طريقة باش تطبق النصائح اللي في هاد الكتاب هي أنك تخدم على التطبيق مع الدعم والمحبة والشراكة ديال خوتك لخرين في كنيستك المحلية. ماتكونش "مسيحي وحيد في الحرب الروحية"، ماتكونش مؤمن كيهتم غير براسو والنصر ديالي قصير ومركز

غير على راسو. دير يدك في يدين خوتك في الكنيسة، خوتك اللي حتى هما
كيحبو الرب وكيحبو الكنيسة ديال المسيح، ومع بعضياتكم تقدر تكبرو
وتنضجو في النعمة وفي معرفة ربنا يسوع المسيح.

الكاتب جيرى بريدجز (Jerry Bridges) شارك معنا الفهم ديالو
للكنيسة المحلية خلال دوک السنين اللولين من حياتو في الإيمان. هو قال:

شحال من عام وأنا كنعيش حياتي الروحية بشكل فردي. كنت
كنخمم في النمو ديالي كمسيحي، والنضج ديالي في القداسة،
والتطور ديال مهارات الخدمة اللي عطاني الرب. صلّيت لله باش
يقوّيني باش نكبر في القداسة في حياتي الشخصية وباش نتحسن في
الشهادة ديالي للناس لخرين على إنجيل المسيح. طلبت بركة الله
لكنيستي وللخدمة المسيحية اللي كنت كنخدم معاها. ولكن ملي
زدت تعلّمت كتر على الشراكة الحقيقية، بديت كنصلي لله باش
يعاوننا نكبرو في القداسة حنا بصيفتنا جسد المسيح، وباش نكونو
شهود لنعمة المسيح بشكل أقوى. راه الجسد كامل كيحتاج النمو
في القداسة، وماشي غير أنا بوحدى.³⁵

كنتمّي باش هاد التحول من "أنا" ل "حنا" اللي هدر عليه جيرى
بريدجز باش يكون حقيقة وواقع في الحياة ديال شعب الله والكنائس كلهم.
كنصلي باش هاد المساهمة الصغيرة يكون عندها تأثير وتخلينا نكبرو في
محبّتنا لجسد المنجّي ديالنا، وكنصلي باش هادي يخلي الكنيسة تختابر
قوة وصحة روحية كبر.

³⁵ جيرى بريدجز، أزمة الرعاية: استعادة معنى الشراكة الحقيقية (فيليبسبرج، نيوجيرسي: بي اند رى،
1985)، 71-72.

المُلْحَق: عهد نمودجي ديال كنيسة سليمة

بِما أَنَّ النعمة الإلهية هي الّتي جابتنا للتوبة والإيمان بالرب يسوع المسيح وهي الّتي نسلمو نفوسنا ليه، وبِما أَنّنا تعمّدنا باسم الآب والابن والروح القدس بعدما أمنا، راه حنا دابا كنعتامدو على المعونة ديالو الكريمة باش نجددو عهدنا مع بعضياتنا بكل فرح.

غاديين نجتاهدو ونخدمو على الوحدة ديال الروح برباط السلام وغاديين نصليو من أجلها.

غاديين نسلكو ونعيشو الحياة مع بعضياتنا بالمحبة الأخوية كأعضاء الكنيسة. غاديين نمارسو ونطبقو المحبة والحنان مع بعضياتنا، وبكل أمانة وإخلاص غاديين نحدرو ونصححو بعضياتنا حسب الإحتياج.

ماغاديينش نتخلّاو على إجتماعاتنا، وماغاديينش نهملو الصلاة من أجل نفوسنا ومن أجل بعضياتنا.

غاديين نفرحو مع خوتنا ملي يفرحو، ونسعى وبكل حنان ومحبة غاديين نهزّو التقل والأحزان والمشاكل ديال بعضياتنا.

بالمعونة ديال الله، غاديين نعيشو الحياة في هاد العالم وحننا رادّين البال وفايقين، وغاديين نكرو الذنوب والشهوات ديال العالم، وديما غاديين نتفكرو بلي كيما بخاطرنا أمنا وتدفتنا مع المسيح بالمعمودية وقمنا عوتاني من الموت الرمزي، راه دابا خاصنا كأتباع ديال المسيح نعيشو حياة جديدة ومقدسة.

غادي نجاهدو مع بعضياتنا باش تستمر خدمة الإنجيل الأمانة في هاد الكنيسة، غاديين نحافظو على العبادة ديال الكنيسة والنضام ديالها والتعاليم حتى هما. غاديين نساهمو بكل فرح وانتضمام في دعم الخدمة، والإحتياجات والمصاريف ديال الكنيسة، وغاديين نعاونو الناس المساكن، ونبشرو بالإنجيل لكل الشعوب.

ملّي نتحولو من هاد المنقطة، في أقرب وقت ممكن، غاديين نتأحدو مع كنائس خرين فين نقدرو نزيدو نعيشو بالروح ديال هاد العهد والمبادئ ديال كلمة الله.

كنصلي باش تكون نعمة الرب يسوع المسيح ومحبة الله وشركة الروح القدس يكونو معنا كلنا. أمين.

IX 9Marks

واش كنيستك صِحِيَّة؟

خِدْمَة "تسعود دِيال العلامات" (9Marks) موجودة باش تجهّز القادة دِيال الكنائس برؤية كتابية وموارد عمّلية باش يضره مجد الله للأمم من خلال كنائس صِحِيَّة.

على هاد الغرض، بغينا نعاونو الكنائس يكبرو فتسعود دِيال العلامات دِيال الصّحة اللي غالباً ما كنتجاهلوهم:

1. الوعض التفسيري.
2. عقيدة الإنجيل.
3. فهم كتابي للإيمان والتبشير.
4. العضوية الكتابية في الكنيسة.
5. التأديب الكتابي في الكنيسة.
6. اهتمام كتابي بالتلمذة والنمو.
7. قيادة كتابية في الكنيسة.
8. فهم كتابي لممارسة الصلاة.
9. فهم وممارسة كتابية للإرساليات.

فخدمَة "تسعود دِيال العلامات" كنكتبو مقالات وكتوب ومراجعات دِيال الكتوب وفي مجلة على الأنترنت. كنضمّنو مؤتمرات وكنسجلو مُقابلات وكننحو موارد خرين كيعاونو في تجهيز الكنائس باش مجد الله يبان.

زور موقعنا على الأنترنت وغلقي المُحتوى بكثر من 40 لغة وتسجّل باش توصلك مجلتنا على الأنترنت فابور. غادي تلقا القائمة الكاملة دِيال مواقعنا لخرين باللغات الأجنبية هنا: <https://www.9marks.org/international>

كيفاش المسيحيون يقدرود يضمنو الصحة الروحية ديال كنائسهم؟

الله بغا باش تكون الكنيسة المحلية دار أكثر روعة وأكبر معنى من أي بلاصة خرا على الأرض. وباش يتحقق هاد الهدف، خاص كل المؤمنين يلعبو دور نشيط في جسد المسيح. ولكن شنو يعني أنك تكون عضو سليم في الكنيسة؟

في هاد الكتاب القصير، تابيتي أنياوبيل كيوري للقرء كيفاش يقدرود يخدمو من أجل الصّحة ديال كنيستهم. وكيقدم عشرة ديال المواضيع الأساسية - بما فيها التبشير والتلمذة والانضباط الداتي والصلاة - وكيوصح كيفاش أن المساهمة في مهمة الكنيسة المحلية كتساعد المسيحيين حتى هما يختابرو نمو روحي عميق في حياتهم الخاصة.

"في عصر فين كيبانو المسيحيين بشكل عام مشوشين من جبهة نوع المجتمع اللي خاص الكنيسة تكون عليه، هاد الكتاب هو مُرشد مُفيد كيوضح الأولويات الكتابية الحقيقية للكنيسة، خصوصاً كيفاش كينطابقو على أعضاء الكنيسة بشكل فردي".
— **جون ماكآرثر**، رئيس خدمة "نعمة ليك"

"بالنظر لحالة بزّاف ديال الكنائس اليوم، هدا الكتاب جا في الوقت المناسب".
— **آر. ألبرت مولر جونيور**، رئيس كلية اللاهوت المعمدانية الجنوبية

"هاد الكتاب كيغطي تركيز مزيان وضروري بزّاف على عضو الكنيسة الفردي. كلنا نقدرود نستافدو بزّاف من هاد الكتاب الرائع".
— **آر. سي. سبرول**، رئيس المجلس ومدير خدمة
Ligonier Ministries؛ الراعي اللؤلؤ ديال الوعض والتعليم في كنيسة
القديس أندروز، سانفورد، فلوريدا

تابيتي إم. أنياوبيل (ماجستير، جامعة ولاية كارولينا الشمالية) كيخدم كراعي في كنيسة نهر أناكوستيا في واشنطن العاصمة، وهو مؤلف بزّاف ديال الكتب. وهو عضو مجلس في تحالف الإنجيل، وهو كاتب رئيسي في خدمات 9Marks، وكيكتب بانتظام في مدونات The Front وPorch وPure Church. هو ومراتو كريستي عندهم ديالة الدراري الصغار.

* هاد الكتاب هو جزء من السلسلة ديال تسعود ديال العلامات لكنيسة صالحة.